

# Huanopa Jesocristo tahimari dsodo inajaro Juan

Huanopa aba cocorode tojaporaha Jeso pohuadsa huahua nadsapa pocca dodosse tojajari. Puhuapa Carireacca madija. Pocca abipa Sebedeo. Ajajari Huanopa Huano Baotista jarahi.

Huanopa Jeso tahimari dsodo inajaro, madija Jesodsa: —Pajissa, Jesopa Dio Bedi –quinahijine. Pocca dsodonijipi: Jesopa Dio Atti, pohua naco Dio, najaro. Jesopa pina edede cacahuadessa najari, pina jahuissa najari Diodsa bacco inanijine. Jesopa Dio Corime iadsa dosse inaronahitohui huati tajari dsodo inajaro.

Ajajari Huanopa dsotode Jesodsa jehe quinaridenidsa ima teppe 3 nehe dsodo inajaro. Najaropi Huanocca ima teppe tahidecca (1 Huano), dsotodecca (2 Huano), dsotodemanicca (3 Huano) inajaro.

Dsotode jadahi tocajadsa naco Dio Corimejine pohuadsa ahuato inanajarocca ima dsodo inajaro. Najaropi Apocalipsis.

## *Jesopa Dio Attiraha madija tojajari*

<sup>1</sup> Jesopa ajijaro nami nahato-geraccadsama nadsama madipojari. Puhuapa Dio Atti. Puhuapa nadsama Diodsa madipojari. Pohua naco Dio. <sup>2</sup> Nami nahato-geraccadsama Jesopa Diodsa

madiridsapojari. <sup>3</sup> Nadsama aji huapima tojaridsajaropi Jesona inanaridsajaro. Jeso nohueradsapa nassa aja namicca huapima tojaridsajaranaja. <sup>4</sup> Nadsama Jeso pohuapa camittehe jinede. Najaricca camittehena madijadsa ssiajani tojaridsajaro. <sup>5</sup> Najaro ssiajanina dsidsinihuaji jororo canadsa tossiajabaqquijaro. Nadsama dsidsinipi Jeso ssiejene inadsidsinijinepi ssamo tani.

<sup>6-7</sup> Maqquideje onipa Huano. Pohuadsa: Baotista, quiquinajari. (Ettidsapi: Totopade, inajaro.) Pohuana Dio icadossedsa: —Jesona ssiajani jinede —naridsahijine. Nama naridsadsa ssiajani jinede Jesodsa pajissa quinahijine. <sup>8</sup> Huanopa ssiajani jinede jarahi. Pohuapa ssiajani jinedecca ima cacomerade madijari. <sup>9</sup> Ssiajani pajissapi aji namihuaji bacco naronajaro. Najaro ssiajanina madija huapimadsa tojaridsajaro.

<sup>10</sup> Ssiajani jinedea aja namidsa ccaronadsa madijaripaja. Aja huapima cajiridsajaripa pohuana inahatoridsajari. Naraha madijapa pohuadsa noccodeni jidsaqqui ri najari. <sup>11</sup> Pocca madijadsa bacco naraha pohuadsa jiperacquiri najari. <sup>12</sup> Naraha madija Jesodsa pajissa nadsa: —Jeso ohuadsa tojana —nadsapa najaridsana Dio huati huati tajari: —Occa ejedeni tijajaro bica tani —nanaja najari. <sup>13</sup> Madija Diocca ejedeni toquejenahijinecca imapi pina madija tossonajaricca imassa nejerani. Pina maqquideje amoneje tohuini nadsa inajiadsa ejedeni dsati tossonajaricca imassa nejerani. Naraha Diojine

pocca ejedeni toquejenajaripa Dio Pohuajinena bodideni dsati totoja najaro.

<sup>14</sup> Dio Attiraha assire tojadsapa Jeso iadsa madijaripaja. Pocca nahatonijipi bicabote deni tojani qqui inade. Nadsama pocca nahatohuepi ojariana nahato tajari. Abi Dio Bedina ojarihi. Pohuapa huati huana tadsa ia todinibaqquijari. Pohuapa pajissehe jinede. <sup>15</sup> Nadsama aja Huanopa Jeso tahimari ecomeraridsajaropi: — Najari tahimaria huati onapojarode: Ohua mari mari onaporaha aja dsotode mari mari najarina deni tojajari. Pohuapa nadsama madipojari, ohonanapode –nade Huano atti.

<sup>16</sup> Nadsama pocca biquehepi pohuajine iadsa huapi tehe tojeje dsanaponi najaro. <sup>17</sup> Nadsama maittaccadsama Moisesipa Diocca dosseniji mari mari napojari. Najaro pocca marinaja huarijonania aji iadsa bacco najaropaji. Nadsama jidapapa Jesocristona Diocca tohuati huanehe, pocca pajissehe iadsa ahuato inanajaropaji. <sup>18</sup> Nadsama madija iapi Dio qqui inaja cama-jarahi. Pohua Bedi ohojaridejinena Abi Diodsa nahatoqquiiri inajaro. Pohuapa Dio bonoccoriccaja najari.

### *Huano Baotista Jeso tahimari ecomerapojaro*

<sup>19</sup> Nadsapa odsa panani Jerosarecca jodiodenicca taminedeni attipa: —¿Huanopa aja tohui imadijaro ia Idinide Cristo-Mesiaco? –quinadsa Diodsa dada toqquimade, pohuadeni biji accode rehuitadeni tedseje huahua inabaqquimanajari. Nadsapa pohuadenidsa: —Huano madihihuaji jai tijaji, pohuadsa huati tiquinadsa: “Tiapi ¿nejecojari tijani?”

tiquinana -quinadsa dosse inabaqquimanajari.  
<sup>20</sup> Nadsapa jai toja, bacco toquinadsapa poccadeni tamine attideni Huanodsa huati iqquimamanajaro. Naraha Huano pohua cacoma-jarajari. Amadsati pohua cacomerade: —Ohuapi Cristo ojajerani -nade.

<sup>21</sup> Naraha pohuadsa huati toquinapomade: —Nadsapi ¿nejecojari tijani? ¿Maittaccad-samacca Dio Atti cacomerabote Eria tijaqui? -quinade. Naraha Huanopa: —Ohuapi Eria ojajerani -nade.

Nadsapa: —¿Moisesicca dsodonijidsa aja Dio Atti cacomerabote dsotode ccajonahitohui quiquinanajari tijaqui? -quinade. Naraha Huanopa: —Ohuapi najari ojajerani -nade.

<sup>22</sup> Naraha denima Huanodsa huati toquinapomade: —Nadsapi ¿nejecojari tijani? -quinapomade. —Jari, iadsa ticca ima tecomeraji. Tetti imittadsapi ia dosse najonadedenidsa huati inaninijine -quinade Huanodsa.

<sup>23</sup> Naraha Huanopa pohua cacomerade: —Ohuapi dsama huamoni ssono caji, siba caji tanihuaji ohuatti mohui tadsa madija huahua huahua ohonajonabaqqui najari. “¡Ia Medsede tedsejema jahui tijinedeni tobicapoji! Najaroa aji tibodideni pohuatohui tinajoramanaji” ohonajaro. Najaro imapi maittaccadsama Dio Atti cacomerabote Isahia huati tapojari -nade Huano atti.

<sup>24</sup> Aja Huanodsa huati toquinajarideni dosse najonadedenipa Isaraeri potemahi jodiodeni mota marinaja onini pariseodsa jehe quinajari. Nadsapa poccadeni dodosse tabaqqui Huanodsa

huati toquinapomajari. <sup>25</sup> Pohuadeni attipa: — Tettipi: “Cristo ojajerani. Eria ojajerani. Dio Atti cacomeraquiri najarideni ojaría ojajerani” tadsapi ¿nejecotohui passodsa madija topa topa titidsanabaqqui najaritta? -quinade.

<sup>26</sup> Naraha Huano pohua cacomerade: — Ohuapi passodsara topa topa ohodsanabaqqui najari. Naraha madija ohuaha tiadenidsa madi-  
raha pohuadsa tinoccodeni jidsaqquri naccani.

<sup>27</sup> Najarina deni tojajari. Ohuapi tahide mari mari onaporaha pohuapa dsotode mari mari najonahitohui. Ohuapi ajimani ojani. Pina pocca medsessa onanijinepi opajira-  
jerani. Poha amoricca sadaria diccade naqui opajira-  
jerani -nade Huano atti.

<sup>28</sup> Ajijaro imapi odsa capamema najaro onini Betaniadsa qqui inapode. Betaniapi hueni Jordao maji ccajonahihuaji anijaro. Nahihuaji Huano Baotista madija topade tojadsana pohuadsa huatide jahijonajari.

*Jesopa Diocca daniji pina Edede bedissa najari*

<sup>29</sup> Nani Betaniadsa imadiccadsapi najaro huada ssiajadsa Huano Jeso ccajonahi qqui tadsa iadsa huati tajaride: —¡Qqui tiquinajo! ¡Ajajaripa Diocca daniji madija huapimadsa! Puhuapa Diocca Edede Bedi bicabote Diodsa da da inajarissa najari. Nidsa dsoqquedsapa pohuana madija huapimacca imasiri inanamossinitohui -nade. <sup>30</sup> — Nadsa pohua tahimaripi tiadenidsa huati huati onapode: Ohuapi tahide mari mari onaporaha aja madija dsotode mari mari

najonajarina deni tojajari. Ohuapi ajimani ojani. Pohnuapa nadsama tahide madipojari, ohonanade. <sup>31</sup> Ohuapi pohnuadsa ssamo onade. Naraha Isaraeri potemahideni tiadenipi pohnuadsa nahatoqquiri tiquinanijinepi Dio ohua cadossedsa madija passodsa topa topa onajaropaji -nade Huano.

<sup>32</sup> Huanopa tahide Jeso topa idsanadsa Dio Corime Jesodsa ccaronahi qqui tadsa iadsa huati tajaride: —Ohuapi Dio Corime qqui onade. Pina midsorissa naha ccaronadsa Jesodsa be tahi qqui onade. <sup>33</sup> Ohuapi pohnuadsa nahato onapojerade. Naraha passodsa topa odsanabaqquihijinepi Dio ohua cadossedsa ohuadsa huati tapojaride: “Ocorime ccaronadsa madijadsa be tahi qqui tinahitohui. Najarina Ocorime madijadsa inanaridsahitohui” napode Dio ohuadsa. <sup>34</sup> Jehe, najaripa pajissa ohua qqui onadsa huati onajaro: Ajajaripa Dio Bedi, onajaro -nade Huano atti.

### *Jesocca mamari tabaqqi tahidecca*

<sup>35</sup> Huada ssiajadsa Huano Baotista pohua huatimade pamaha tedseje domo hua pomade. <sup>36</sup> Nahidsana Jeso toqqeqquimahi Huano qqui tadsa pohnuadenidsa huati tajaride: —¡Qqui tiquinajo! ¡Ajajaripa Diocca daniji madija huapimadsa! Pohnuapa Diocca Edede Bedi Diodsa da da inajarissa naraha icca imasiri manaconi tojahijine Dio iadsa eccorajari -nade Huano iadsa.

<sup>37</sup> Nadsapa Huano huatimade pamaha ima mittamanadsapa Jesodsa tohuedamissade.

<sup>38</sup> Jeso natti tohuedamissaraha Jeso pohua natti

qqui naninaja pohuadeni huedajonahi qqui inabaqquijaride. Nadsapa Jeso pohuadenidsa huati tade: —¿Nejecotohui ticadajonajaro? —nade. Naraha: —Ia Maride ¿nejecohuaji timadijaro? —quinade. <sup>39</sup> Naraha Jeso: —Jina, qqui tiquinaji —nade pohuadenidsa. Nadsapa jai tojjari. Maji toccadsana pohua madihihuaji bacco toquinadsapa qqui toquinade. Nahi pohuadsa jassi todsadsapa dsomejarode.

<sup>40</sup> Jehe, Huano huati tahi mittamanadsapa Jesodsana toquejenajaride. Ojariapa Ssino-Pedro imecote Adiri. <sup>41</sup> Nadsapa Adiri Jesocca odsahuaji qquenadsapa pohua imecote Ssinotohui toccajaride. Pohua imecote Ssinohuaji bacco tadsapa huati tajari: —¡Ssino, iapa aja tohui imadijaro Mesia bacco inahi! —najari. (Jodio attidenidsapa: Mesia, quinaraha dsama Cresiaccia madija attidenidsapa: Cristo, quinajari. Madija ettidsapa: Madija Tonassijade tojahijine Dio pohua icattejidsapojari, inajaro.)

<sup>42</sup> Nadsapa Adiri pohua imecote Jesohuaji ec-canijari. Jeso Ssino qqui tadsapa pohuadsa huati tade: —Tiapi Huanocca ejedeni Ssino tijani. Ssino tijaraha jidapapi tia oni onihira hua onana —najari. Nadsapa pohua oni hua inadsapa: —Sepa —nade. (Jodio attidenidsapa: Sepa, quinaraha dsama Cresiaccia madija attidenidsapa: Pedro, quinajari. Madija ettidsapa: Siba, inajaro.)

*Natanahe Feripe tedseje Jeso huatimade toquejenajari*

<sup>43</sup> Huada ssiajapa Jeso: —Dsama arobeni onini Carireahuaji occana onajaroa -nade. Nahihuaji toccadsana Jeso Feripe bacco inadsa pohuadsa huati tajari: —Jina, ohuadsa ticcaridsaji, ohuatimade tijadsapi tia onahattanijine -nade.

<sup>44</sup> Nadsama Feripepa Besaida odsa pananicca. Pedro, Adiri naco najaro odsa pananicca.

<sup>45</sup> Feripepa pohua tesse Natanahetohui toccajari. Bacco inadsa pohuadsa huati tajari: —Iapi Moisesicca dsodonijidsa tahimari ihimitta najari bacco inahi -najari. —Dio Atti cacomeraqquiri najarideni pohua tahimari dsodo quinajari. Pohua onipa Jeso, Dsodsecca ejedeni. Pohuapa odsa panani Nasaretihujicca -najari Feripe.

<sup>46</sup> Naraha Natanaha attipa: —A ¿Nasaretihujicca madijapa bica tajari caji taco? -najari. Nadsapa Feripe Natanahedsa: —Jina, nidsa qqui tinahitohui -nade.

<sup>47</sup> Nadsapa Natanaha Jesohuaji toccadsapa Jeso Natanaha ccajonahi qqui ijidsadsapa pocca ima naqui pohuadsa ahuato tajaro. Nadsapa Jeso Natanaha tahimari huati tade: —Qqui, aja maqquideje ccajonajaripa pajissa Isaraeri potemahi. Icca ididenicca marinaja ecahuanissa tajaro. Pohuapa maidsera tahi -nade Jeso.

<sup>48</sup> Naraha Natanaha atti Jesodsas: —¿Nejecoma nadsa ohua qqui tinadsa ohuadsa nahato tinajaro? -nade. Naraha Jeso Natanahedsa huati tade: —Nadsa Feripe tiadsa huati tajaraccadsa ahua iquiera dopedsa teni tia qqui onapa -nade Jeso. <sup>49</sup> Naraha Natanahespa: —Ia Maride, ¡tiapi Dio Bedi tijani! ¡Tiapi Isaraeri potemahidenicca tamine tijani! -nade. <sup>50</sup> Naraha manaco Jeso



pohuadsa huati tade: —¿Iquiera dopedsa teni tia qqui onapa onajarodsa ohuadsa pajissa taqui? —nade. —Nidsa, nahatonaja deni tojanicca huapi tani qqui tinanitohui —nade Jeso Natanahedsa.

<sup>51</sup> Nadsama Jesopa ima denima huati huati tade iadsa: —Pajissara tiadenidsa huati onajaro: Nidsa meme tohuabani naqui qqui tiquinanitohui. Aji ohua Madija Bedi ojajaro ohuadsa Diocca dodosse tabaqqui memehujicca jahirona jai tojamacossani, jahirona jai tojamacossani nahi naco qqui tiquinanitohui —nade Jeso.

## 2

### *Jeso canahatori canapojari*

<sup>1</sup> Huada 3 bacco tadsapi Canahuaji cajicajicca ejete tojajaro. Canapi dsama arobeni onini Carireacca odsa panani. Jesocca ami naqui nani ejete qquide toccajaro. <sup>2</sup> Jeso pohua huatimadedeni ia naqui nanidsa jaijedsimade. Cajicajicca ejete jinede iadsa jina nadsa jaijedsimajarode.

<sup>3</sup> Naraha uva ppejene jicadsa Jesocca amipi: —Uva ppejene jicaha —nade Jesodsa. <sup>4</sup> Nadsapa Jeso atti: —Ami ¿nejecotohui ohuadsa huati tinajaro? Occa ima ahuato onananijine bacco tejeraccaraha —nade Jeso. <sup>5</sup> Naraha imenipi jijipa dsodsojodedenidsa huati tade: —Jeso tiadenidsa huati tadsapa pohua attissa tinanamanaji —nade.

<sup>6</sup> Naraha nanidsapi siba imeni passojine ccohue todsaridsani 6 nehe cajimanajaride. Najarodsapa jodiideni —Icca ima bica tanijine —quinadsa pohuadeni dsepetaji ettippamana, idimoramana nanaja najari. Najaro siba imeni

cchue todsani ojariedsapi passo 80 litro iijaro nitide. <sup>7</sup> Nadsapa Jeso jijipa dsodsojodedenidsa huati tade: —Siba cchue todsarid-sanidsa passo tinajiridsamanaji -nade. Nadsapi najarodsa passo inajiridsamanadsapi iponihuaji bacco bacco teri nade. Nadsapa Jeso canahatori canajarijine passoraha uva ppejene inanajari. <sup>8</sup> Nadsapa Jeso: —Jari, jidapapa badsira taha huana ticadsanamanadsa cajicajicca ejete cacahuadedsa dsojo ticanamanajo, ecatamahijine -nade. Nadsapa uva ppejene huana icadsanamanadsa dsojo icanamanade, pina Jeso attissa inanamanajaro. <sup>9</sup> Nadsapa ejete cacahuadedsa da icanamanadsapa aja passoraha uva ppejene tojajari badsira taha ecatama nade. Naraha ejete cacahuadepa ssamo tadsa pohua bodi: —¿Nejecohuajicca uva ppejene? -najari. Naraha uva ppejene dsodsojode pohuadenina passo ponira dsojo dsojo inanimanajarojine nahatoqquri nahi. Nadsapa ejete cacahuade aja cacajirebote najaridsa huati tade: <sup>10</sup> —Madija huapimapa ejete inahatomanadsapi tahide uva ppejene bica tahiccara da da ihicanaridsa-baqquimana nanaja najari. Madija accaramanadsana ajamani majidera tahicca da da ihicanaridsa-baqquimana najari -nade. —Naraha tiapi uva ppejene denima bica tahicapa teccocobaqqui, dsotodena da ticanabaqquijirirana -nade ejete cacahuade atti.

<sup>11</sup> Ajijaro imapi Carireahuajicca odsa panani Canada Jeso tahidecca canahatori canapojari. Najaropi Jeso pocca deni tojehe ahuato inanapojaro. Nadsapi pohua huatimadedeni iapi Jesodsa

pajissa inajarode.

*Capernaodsa madijari*

<sup>12</sup> Nadsapi coridsa inidicca odsa panani Capernaohuaji jaijedsippade. Jeso pohua, pocca ami, pohua imecotedeni, pohua huatimadedeni ia huapima jaijedsippade. Nanidsapi huada pamehe imadide.

*Diodsa dada toqqimacca odsadsa manaconitohui dadadedeni mohua ininebaqqujari*

<sup>13</sup> Jodiodenicca ejete imeni onini Pascoa tohuajiradsapi Jesopa Jerosarehuaji toccade. <sup>14</sup> Narahanani Jerosarehuajicca Diodsa dada toqqimadsapi manaconitohui dadadedeni dade toquejenahi Jeso qqui inabaqqujari. Bohui, edede, midsori da da quiquinanjari. Dsinirocacajiqquimera-manahijine naco dade huihuitariri naridsajari. <sup>15</sup> Nama quinahi Jeso qqui tadsapa cocossi amadsati inahatojaride. Ijinedeni poponeri najari inaccaridsadsa inahapicossa, ppiro-ro nadsa itacossiridsajaride. Nadsapa Diodsa dada toqqimahuajicca dadadedenipa amossinihuaji mohua ininebaqquide. Poccadeni ededema, poccadeni bohuima domo toqqenajaride. Dsinirocacajiqquimera-manahijine dsiniro naqui maca maca imeri naridsade. Huahuanari naqui cco cco icanacosseri naridsade. <sup>16</sup> Midsori dadadedeni naco dosse ininebaqquide: —¡Ajicca huapihuajina ticcadeni midsori dsojo dsojo tininemanaji! ¡Aji occa Abi tadsaridsapi dada tinanamana tejeraji! —nade Jeso. <sup>17</sup> Nadsapi pohua huatimadedeni iapi eti huatomajarode: —Dio Atti dsodo napojaropi:

“Ticca odsa acconipi ohuana ocasserani ohuani-tohui” nanaja napode -inade. <sup>18</sup> Naraha dso-todepa jodiideni Jeso huati icanamanade: — ¿Nejecojarì tia cadossedsa nema nema tajaro? ¡Jari, ticanahatori canaji! Qqui inadsana pajissa inanijine -quinade.

<sup>19</sup> Naraha pohuadenidsa Jeso huati tade: — Jari, ajijaro Diocca odsa ticanajidsomanehe cajicaneje huada 3’pi ocanahatomanie cajicanitohui -nade. <sup>20</sup> Naraha jodiideni Jesodsa huati toquinapomade: — ¡A, apaja! Ajijaro odsa Diodsa dada toqquimapi huada huajano 46 naha dsepedeni ijimanade. Naraha tettiipi: “Ajijaro odsa huada 3’pi ocanahatomanie cajicanitohui” taha. ¡Nema ticanana-jerani! -quinade.

<sup>21</sup> Najaro odsacca ima huati tajaripa pohua assire tahimarini huati tajaride. <sup>22</sup> Iapi pohua huatimadedeni Jeso dsoqquedsa nahatonidsana eti huatomajaropajide. Najaropi pohua huati tadsa imittapojarode. Nadsapi Dio Atti dsodo napojarocadsa denima jehe pajissa idsanapojarode. Jeso huati huati tajari imittapojarodsa naqui jehe pajissa inajarode.

### *Jesodsapi madija huapimacca ima ahuato tajaro*

<sup>23</sup> Jesopa ejete Pascoatohui Jerosaredsa madic-cadsapa canahatoriri canaridsajaride. Pocca nahatohue qqui toquinadsapa madija mota pohuadsa pajissa quinade. <sup>24-25</sup> Naraha Jesopa pohua bodidsa nahato tajari: — Ohuadsa pajissa quinahissa tahi -najarajari. Puhuapa madija bodicca ima mittahijine pohuadenidsa:

—¿Nejecoma nani tibodidenicca ima? —najara-jari. Madija pohuadeni bodicca ima pohuadsa huatide nohueraraha pohua ehuerahi nahato tajari.

### 3

#### *Nicodemopa dsome Jesodsa ccahuajajari*

<sup>1</sup> Isaraeri potemahi jodiideni dossede ojaría onipa Nicodemo. Pohuapa marinaja onini pariseodsa jehe najari. <sup>2</sup> Najaripa dsomeraha Jesodsa huati tahijine ccajonajari. Bacco najonadsapa: —Mamaride, iapi nahatoqquiri inapode. Tiapi Diocca dosseniji ticcajonajaro madija maride. Nahatohue pina aji ticcassa najaropi madija Dio pohuadsa tojahissa tajarina cajijari. Pohuadsa Dio nohueradsapa caji-jarahi —nade Nicodemo. <sup>3</sup> Naraha Jeso Nicodemodsa huati tajari: —Pajissara tiadsa huati onana: Madija Diocca cacahuehedsa tojahijinepa tossonapomadsana Diodsa tojahitohui. Tossnapomajaradsapa Diocca cacahuehedsa toja-jarahitohui —nade Jeso Nicodemodsa.

<sup>4</sup> Naraha manaco Nicodemo huati tajari Jesodsa: —Madija jadahi ijaraha ¿nejecoma inadsa pina ejedeni inehe issonapomanijine? ¿Icca ami dsahuanidsa ittidsapomadsapi issonapoma taqui? —nade Nicodemo. <sup>5</sup> Naraha manaco Jeso Nicodemodsa huati tajari: —Pajissara tiadsa huati onana: Madija bodidenicca imasiri tohuireridsadsapi madija Dio Corimecca nahatonajadsa toquejenadsapa Diocca cacahuehedsa toquejenajari. Naraha

madija nama quina-jaradsapa Diocca cacahuehedsa toquejena-jarahi. <sup>6</sup> Maqquideje ejedeni inahatojaripa madija tojajari. Naraha Dio Corimejine nahatojaripa Pohua Corime pohnadenidsa totoja najari. Dio Corime pohnadenidsa tojaridsadsapa pina tossonapomajarissa quina tahi -nade. <sup>7</sup> — Nadsama tiadsa huati onana. Ohuattipi: Pina ejedeni tossonedsatissa tiquinapomaji onajarodsapi huajo tejeraji. <sup>8</sup> Dio Corimejine madija bodi dsati tojadsapi pina jojodecca imassa najaro. Jojodepi qqui inejeraraha jojode ponijinena ahahuato najaro. Jojodepi poni jipa tanihuaji tocca tani. Poni mohuini naqui imitta tani. “¿Nejecoma nanicca ccajonajaro?” taraha ssamo tinani. “¿Nejecoma nani toccajaro?” ina tani. Dio Corimejine madija bodi nahatodsati tojadsa naco qqui inajararaha pocca madie dsati tojani nahato inajaro -nade Jeso Nicodemodsa.

<sup>9</sup> Naraha manaco Nicodemo Jesodsa huati tapomajari: —¿Najaro imapi nejecoma najaro? -nade. <sup>10</sup> Manaco Jeso pohua cacomerade: —Tiapi Isaraeri potemahi jodiodeni maride tijaraha ¿najaro ima ssamo tinajaroqui? <sup>11</sup> Pajissara tiadsa huati onana: Iapi Diojine madija bodideni dsati toquejenahi nahatoqquri inajaro. Aji madijacca madie dsati tojani qqui inajaro naqui tiadenidsa huati huati ihinana raha timittamana-jerajaro. <sup>12</sup> Aji namicca icca madieccama tiadeni mari ocanabaqquiraha pajissa tiquinejerani. Aji memehujacca Diocca ima ponira tiadenidsa huati onadsa naqui pajissa tiquinejerajarorane -nade.

<sup>13</sup> —Nadsama aja namicca madija ojariapa memehuaaji toccamacossaja cama-jarahi. Naraha aji Madija Bedi ojajarona ohuapi memehua-jicca occaronajaro. <sup>14</sup> Nadsa maittaranibote dsama huamoni ssono caji, siba caji tani-huaji icca madija jahiridsapodsapa Moisesi macca corime bronze inahatodsa ahuadsa que inanahi quinade. Madijapa maccajine jicahitohuiraha macca corime que tahihuaji qqui quinadsapa totocassiejera najari. Nadsama aji Madija Bedi ojajaroa ohua naqui ahuadsa ohua que inanamanadsapi nema onanitohui -nade. <sup>15</sup> —Nadsama madija huapima ohuadsa pajissa quinajaridenipa camittehe jiquejeranicca cajimana-dsanapohuijine -nade Jeso.

*Diopa madijadsa huati cahanari canajari*

<sup>16</sup> —Diopa madijadsa huati cahanari canahi. Pohua Bedi ojari naraha da inadsapa huapima pohnadsa pajissa quinajaridenipa tocassiejerahijine. Camittehe jiquejeranicca naco cajimana-dsanapohuijine. <sup>17</sup> Diopa Pohua Bedi madija dsahuade dosse inarona-jarajari. Madija tonas-siajadera dosse inaronajari -nade.

<sup>18</sup> —Nadsama pohnadsa pajissa quinajaridenipa idsahuabaqqui-jarahitohui. Naraha aja pohnadsa pajissa quina-jarajaridenicca imapi Dio Pohnadsa ahuate taridsaponi. Naraha Dio Attipa: “Occa ejedeni ohojaride. Pohnadsa pajissa tiquinejeradsapi ticcadeni imapi ohuadsa tabaccora tani. Nidsa ticcadeni ima nema tidsanapomanadsapi najidsohue jiquejeranihuaji tiquejenanitohui” nahi Dio -nade

Jeso. <sup>19</sup> —Nadsama Dio Bedidsa pajissa quina-jarajaridenipa poccadeni tabaccorehepi ajima najaro: Ssiajani aji namidsa bacco naronaraha madija motapa dsidsinidsara jipacquiri najari. Pohuadenipa ima tabaccora tanicca ihinana-mana nadsapi ssiajanidsapa jiperaquiri najaripaja. <sup>20</sup> Madija motapa pohua pohuadeni tonatabaccora-manadsapa ssiajanidsa huattajo-quiri najari. Pohuadenipa ssiajanidsa huajijira canaha najarahi, poccadeni ima huapimadsa ahuato tajaro noppineni. <sup>21</sup> Naraha madija pajis-sehedsa madimanadsapa ssiajanitohuira quina-jari. Pina Diocca dossenijissa inanamanadsapi pohuadeni dsepe ijiridsajarima ahuato taniijine-nade Jeso.

*Huanopa Jesocca ima ecomerapomajaro*

<sup>22</sup> Nani dsotodepi dsama arobeni Jodeahuaji Jeso toccadsapa pohua huatimadedeni iapi pohuadsa jajjade. Nanidsa imadidsana madija topa idsanabaquijaride. <sup>23</sup> Naraha Huano naco odsa Enohuaji madija topa idsanabaquija najari. Najaropi odsa Sarimadsa huajira tani. Enodsana passo dsaja tanicca caji tajaro. Nahid-sana madija jajahijona najari, Huanocca topani-jitohui. <sup>24</sup> Huanopa toponi cocorodsa coro idsimamana-jaraccadsama nahidsa madijari.

<sup>25</sup> Nadsapa Huano huatimadedenipa jodio ojaria tedseje bodideni tohuiremanahijinecca ima ahuaji huati ahuaji huati quinajari. <sup>26</sup> Nadsapa Huano huatimadedeni jai tojanidsapa Huanodsa huati toquinade: —Ia Maride, maitta hueni Jordao jippehuaji tiadsa bacco tajari



pohua tahimari huati huati titinanajaripa madija topade tojahi. Huapima pohuahuaaji jajahi toja nahi –quinade.

<sup>27</sup> Naraha Huano pohuadenidsa huati tade: — Diopa madija dsepe ijihijine pohuadsa da in-  
 ejeradsapi nama najarahi. Naraha Dio madija  
 dsepe ijihijine pohuadsa da inadsapi dsepe ijie  
 cajihi –nade. <sup>28</sup> —Nadsa ohuatti timittamanade:  
 Ohuapi Cristo-Mesia ojajerani ohonanade. Diopa  
 Jeso tedsejema ohua cadossepojaride. <sup>29</sup> Ohuapi  
 pina dsabisso amoneje cajibote najari pohua  
 tessessa onajaro. Dsabisso cacajirehijinecca ejete  
 bacco tadsapa pohua tesse naco pohuatohui  
 madijari. Pohua tessapa aja cacajirejari atti  
 mittadsapa huatidse tahi. Najaroa ohua naqui  
 Jesodsa madija toquejenadsa omittadsapi ohu-  
 atidseri najaro. <sup>30</sup> Jeso deni tojajadsanapohui  
 nadsapa bica tani. Ohua ajimani ojanini naqui  
 bica tani, onajaro –nade Huano.

### *Jesopa memehuajicca ccaronajari*

<sup>31</sup> Nadsapa Huano pohua huatimadedenidsa  
 denima huati tajari: —Memehuaaji ccaronajaripa  
 aja namihuajicca madijassa najarahi. Puhuapa  
 deni tojahi. Ajijaro namiccapa namicca. Aji-  
 jaro namicca imara huati huati totoquina na-  
 jari. Memehuaaji ccaronajaripa huapimadsa deni  
 tojajari. <sup>32</sup> Puhuapa memehuajicca qqui ta-  
 jari, mittajari naqui ecomeraridsajaro. Naraha  
 madija huapimapa pocca huatinajadsa pajissaha  
 quina-jarahi. <sup>33</sup> Naraha pohua attidsa pajissa  
 quinajarina: “Jehe, Diopa pajissehe jinede”  
 quinajari. <sup>34</sup> Puhua Dio icadossejari, huati

huati nanaridsa najari. Najarina Dio Atti huati tahissa tajari. Dio Pohua Corime pohnadsa da ineje najaro inapajiranissa tajaro. <sup>35</sup> Imehipa Bedidsa huati huana tajari. Pohua Bedidsa pocca nahatonaja huapima pohnadsa inana-jaro. <sup>36</sup> Nadsapa Pohua Bedidsa pajissa quina-jaridenina camittehe jiquejeranicca cajimana-dsanapohuijine. Naraha pohnadsa iboqquri najaridenipa camittehe cajimana-jarahitohui. Dio Pohnana najidsohue jiquejeraniccdsa inan-abaqquihitohui -nahi nade Huano Baotista.

## 4

### *Jeso Carireahuaji tojoppemanijari*

*Mateo 4.12; Maraco 1.14; Roca 4.14*

<sup>1</sup> Nadsapa Jesodsa madija tohuapijaricca ima tojaridsajaro. Nadsapi jodiodeni mota marinaja onini pariseodsa jehe quinaridenidsa ima bacco tajaro: —Jesodsa toquejenajarideni tohuapihi. Huano Baotistadsa ajamani. Jesona madija denima topa topa ihidsanabaqqi najari -nanaridsamana nahi ima mittamanajari.

<sup>2</sup> (Naraha Jeso pohnapa madija topa topa ihidsanabaqqi najarahi. Pohua huatimadedenina madija topa topa ihidsanabaqqi najari.)

<sup>3</sup> Nadsapa Jesodsa: —Marinaja pariseodsa jehe quinarideni titahimari mittamanahi -quinadsapa dsama arobeni Jodeadsa joppemajari, dsama arobeni Carireahuaji toccanipomahijine.

*Samariahuajicca amoneje Jeso tedseje bacco tocanirejari*

<sup>4</sup> Jodeadsa jaijanijaro jahuipi dsama arobeni Samariahuaji tossoniqquimani Carirea bacco tanijaro. <sup>5</sup> Najaro jahui jaijanidsapi Samariacca odsa panani oninipi Sicadsa iajirajonajaro. Najaro odsapi maittaccadsama Jacobocca dsamabote huajira tajaro. Jacobo pohua dsamaribotepi pohua bedi Josedsa da inapojaro nade. <sup>6</sup> Nanidsana —Jacobocca passojinebote —quiquinanajari hui todsajaro. Najaro passojine hui todsanidsa bacco inapojaro. Maji itetepi bacco tabote nadsa Jeso ja tojajonadsa, passojine hui todsani inorinidsa huittarijaride.

<sup>7-8</sup> Nahidsa Jeso huittariraha ia pohua huati-madedenipi odsa pananihuaji jaijajaro, itapari mittade. Naraha nahi passojine inorinidsa Jeso huittaridsa Samariacca madija amoneje passotohui ccajonajaro nade. Nadsapa Jeso ponidsa huati tajari: —Ohuadsa ticca passo dse onana —nahi nade.

<sup>9</sup> Jeso atti nama nadsapa ponidsa jidsa tajarossa najaro. Aja, jodiodenipa samaritanodeni dsepedenitajidsapa: —Dsedo oppina tani —quiquinanade. Nadsapi amoneje Jesodsa huati tajaro: —¿Nejecotohui tiapi jodiodeni tijaraha ohuadsara passo mitta tajaro? Ohuapi Samariacca madija ojani —nani nade. <sup>10</sup> Naraha manaco Jeso ponidsa huati tajari: —Diocca daniji nahato tinadsapi aja tiadsa passo mitta todsajaridsa manacora ohuadsa passo mitta tidsanitohuiraha ssamo tinajaro. Naraha ohuadsa nahato tinadsa ohuadsa huati tinadsapi passo camittehecca tiadsa da onanitohuiraha —nahi nade Jeso.

11 Naraha amoneje poni attinipi: — ¿Nejecodsara passo huana ticadsananijine? Hui todsanicca passopi huaji tani. ¿Nejecohuajicca passo camittehecca ohuadsa da ticananijine? —nani nade. 12 —Ajijaro passojine hui todsanipi maittaccadsama Jacobo iadsa inebojaro. Ajijaro passopi Jacobo dse dse napojari. Pohua bedideni naco ajijaro passodsa dse dse quinapojari. Poccadeni bani ette tojahi naco ajijaro passodsa dse dse quinapojari. ¿Naraha tiana deni tijajarorane, Jacobona ajamanirana? —nani nade. 13 Naraha manaco Jeso ponidsa huati tajari: —Ajijaro passopi dse inaraha ibacco dsaripoma tani —nani nade. 14 —Nadsa aji ohua passo da ocanajaro dse quinahipa baccodeni dsarimanapoma-jarahitohui. Aji occa daniji passona madija bodidenidsa jiquejeranitohui. Camittehe jiquejeranicca tojanijine —nani nade Jeso.

15 Naraha amoneje attinipi: —Jari aji ohuadsa huati tinajaro passo ohuadsa da ticanaji, obacco dsaripoma-jejanijine. Nani ajijaro passotohui ohocajona nejejanijine —nani nade. 16 Naraha Jeso ponidsa huati tapomajari: —Ticcanidsa ticca maqquidsa huati tinanidsa ahuaji cajo-nana —nani nade Jeso. 17 Naraha poni attinipi: —Maqquideje ocappirani —nani nade. 18 Naraha Jeso ponidsa huati tapomajari: —Jehe “Maqquideje ocappirani” tadsapi pajissa. Naraha ticca maqqupa 5 quinahi. Jidapanacca naco ticca maqqui jarahi. Tetti nema nadsapi pajissa —nani nade Jeso. 19 Naneje amoneje attinipi: —Tiapi Dio Atti cacomerabote tijani

-nani nade. <sup>20</sup> —Icca abidenipa ajijaro ssonod-sana Diodsa huahuatidsemanapo najari. Nadsa jodio tiadeni tettidenipi: “Jerosaredsana Diodsa tetetidsemana nani bica tani” tiquinajaro -nani nade.

<sup>21</sup> Naraha manaco Jeso amonejedsa huati tajari: —Amoneje, ohuatti timittaji. Nidsa imapi cacajiqquimeranitohui. Aji ssonohuaji Diodsa tetetidsemana najaropi nebonitohui. Aja Jerosarehuaji Diodsa huahuatidsemana nahihuaji naqui nebonitohui -nani nade. <sup>22</sup> —Samaritano tiadenipi Diodsa tetetidsemana naraha, najaro imapi ssamoqquiri tiquinani. Naraha jodiodeni iana pajissa Diodsa ehetidse najaro. Ia jodiodenidsa tossiejehe ccajonapojaroni madija huapimadsa tojaribaqqujaro. <sup>23</sup> Jidapapi ima dsati bacco tani. Madija pajissa Abidsa huatidsemanaha madimanajaridenipa pohuadeni bodicca pajissehema Dio Pohuadsa jehe quinadsapa huatidsemanahitohui. Abipa madija nama quinajaridenidsapa jipa tahi. <sup>24</sup> Diopa assire jarahi, corime. Nadsama madija Dio Pohuadsa huatidsemanajaripa pohuadeni corimema huatidsemanahina bica tani. Maidsamana-jaradsa huatidsemanahina bica tani onajaro -nani nade Jeso.

<sup>25</sup> Naraha amoneje attinipi: —Jehe, ohuapi nahato onani: Mesia pohua oni ohuahapa Cristo quinajari. “Najari ccajonahitohui” quinahipa ohomitta nade. Nidsa pohua bacco nadsapa pocca marinaja huapima iadsa ahuato inanani-tohui -nani nade. <sup>26</sup> Nadsapa Jeso ponidsa huati

tade: —Ohuapi Mesia tiadsa huati huati onajaro —nahi nade.

<sup>27</sup> Naraha pohua huatimadedeni iapi Jeso pohua huittarihidsa bacco inanineje Jesopa amonejedsa huati huati tahi qqui inadsapi ijabojo nade. Ibodidsa: —¿Nejecotohuira ponidsa huati huati tajari? —inade. Jeso pohuadsa naqui: —¿Nejeco imara poni tadsajani huahuatiti tinajaroneje? —inanitohuiraha huati inejerade. <sup>28</sup> Nadsapi amoneje ponicca jojori inebo, odsa pananihuaji toccanide. Odsa panani bacco tanidsapi madija huapimadsa huati tanijaro: <sup>29</sup> —Jari, aja maqquideje nahatobote occa ima huapima ohuadsa huati huati tajari qqui tiquinajo. Pohuapa aja tohui imadijaro ia Idinide Cristo-Mesia itidija —nani nade. <sup>30</sup> Nadsapa najaro odsa pananikka madija mota jahininedsa Jesohuaji jahijonajari.

<sup>31</sup> Amoneje odsa pananihuaji huati huati teje naraha iassa Jesodsa: —Ia Maride, tijipaji —inade. <sup>32</sup> Naraha Jesopa: —Jijipa ohuaha ocajini —nade iadsa. <sup>33</sup> Nadsapi iara imahaha icanadsa: —¿Madija ohuaha pohuadsa jijipa dsojo inajonajari itide? —inade. <sup>34</sup> Nadsapa Jeso iadsa huati huati tajari: —Ohuapi Dio ohua cadossejari. Pohua jipa tahicca odsepe ijijaro. Najaropi pina occa jijipassa najaro. Dio Pohua dsepe ihiji nahicca najaro onajicanijine, onajaro. Najaropi occa jijipa —nade Jeso. <sup>35</sup> —Naraha tettidenipi ajima tiquinani: “Abadsico 4 canadsana huidsajacca ppa nahi bono jadahi pore nahi bica tahi” tiquinaraha ohuattipi: ¡Ajana qqui tiquinanaja! Aja huidsajacca ppa nahipa jadabote tojahi.

Pore nahi bica tahi -nade. —Madija Dio Atti mittamanahijinepa najoramanahi. Pina huidsajacca ppa nahi jadajarissa quinahi. <sup>36</sup> Madija huidsajacca ppa nahi bono porede dsepedeni ihijimana najaripa ima bicani cacajimana najari. Pohuadenijinena madija camittehe jiquejeran-icca cacajimana najari. Nadsapa huidsaja ppadedeni, bono porededeni tedsejepa huatidsemana tahi. <sup>37</sup> Nadsama ajijaro imapi pajissa: Huidsaja ppadedenipa ohuaha, huidsajacca bono jadadsa porededenipa ohuaha quinajari. <sup>38</sup> Nadsama ohuapi huidsajacca bono jadahi porede tiadeni dosse onabaqquina. Aja ticcadeni ppaniji jarahi. Najaridsapa madija ohuahadenina dsepedeni iji-manapojari. Naraha tidsepedeni ijimanajarocca huapimapi tassaqquijaro. Aja dsepedeni iji-manapojaricca naqui tiadenidsa ima bicani tojani -nade Jeso iadsa.

<sup>39</sup> Nadsapi amoneje Samariacca odsa panani Sicahuaji Jesocca ima huati huati tadsa madija mota huapi taha Jesodsa pajissa quinajari. Aji amoneje poni attinipi: —Aja otahimari huapima nahato tajari, ohuadsa huati huati tapa -najaro mittamanadsapa pajissa quinajari. <sup>40</sup> Nadsapa Samariacca madijadeni iahuaji bacco najonamanadsapa Jesodsa huati toquinade: —Iadsa timadiccaji -quinade. Nadsapi nanidsa icca huada pamaccanijine imadiccade. <sup>41</sup> Jeso nahidsa ibodsapa madija denima Jeso atti mittamanadsapa pohuadsa pajissa quinade. <sup>42</sup> Nadsapa amonejedsa huati toquinade: —Tahidepi tettidsaha “Jesopa Cristo-Mesia” inapojaro. Naraha jidapapi Jeso pocca marinaja

imittadsapi pohuadsa pajissa inajaro. Tettidsaha imittani ojari-jerani. Jidapapi pocca marinaja imittadsapi nahatoqquiri inani: “Pohuapa dsama huapimacca madija Tonassiajade” inajaro -quinade.

<sup>43</sup> Nadsapi dsama arobeni Samariadsa icca huada pama nadsapi Jeso pohuadsa jaijanide dsama arobeni Carireahuaji. <sup>44</sup> Nahidsana Jeso Dio Atti cacomeraqquiri najarideni tahimari-deni huati tajaride: —Poccadeni madijapa pohuadenidsa: “Deni tijani” quina-jaraha nama najonamanajari -najaride Jeso. <sup>45</sup> Nadsapa Carireahuaji bacco nanidsapa icatidsemaneri nade. Aja odsa panani Jerosarehuaji madi-manapodsapa ejete Pascoadsa pohua canahatori canahi qqui toquinapoja najari.

*Canahuaji toccanidsa tamine biji accodecca ejedeni inanomijari*

<sup>46</sup> Carireacca odsa panani Canahuaji ejet-edsa Jeso pohuajine passoraha uva ppejene ihinana nanihuaji jaijanipomajaro. Naraha tamine biji accode bedipa odsa onihi Capernaohuaji coma tajari. <sup>47</sup> Naraha tamine biji accodepa: —Jeso dsama arobeni Jodeahuaji ccanidsa Carireadsa bacco nanihi -quinahi ima mittadsapa Canahuaji ccajonajari Jesodsas. Bacco najonadsapa Jeso pohuadsa huati tade: —Occa odsahuaji ohuadsa ticcaccaji, occa ejedeni dsoqqebote nahi tinanomihijine -nade. <sup>48</sup> Naraha Jeso attipa: —Tiadenipi ocanahatori canani qqui tiquinejeradsapi ohuadsa pajissa tiquine-jerani. Qqui qqui tiquinapo-jerajarrocca ahuaato



onana-jeradsa naqui ohuadsa jehe tiquinejerani -nade. <sup>49</sup> Naraha tamine biji accodepa: — Ohua Medsede, occa ejedeni dsoqqe-jaradsama ticcacaji -nade.

<sup>50</sup> Nadsapa Jeso pohuadsa huati tade: — Ticcaniji, ticca ejedenipa dsoqqe-jarahi, tonomihi -nade. Nadsapa Jeso pohua attidsa pajissa nadsapa toccanide. <sup>51</sup> Nadsapa toccanijari, huada ssiaja pocca odsa bacco tanibote naraha pocca medsedeni bacco ijidsabaquijari. Nadsapa huati toquinajari: —¡Ticca ejedenipa tonomidija! Madihi -quinahi nade. <sup>52</sup> —¿Maji nejecodsa occa ejedenipa tonomijaritta? -nahi nade. —Maittadsama maji itetepidsa huapi ppocone totappajaridija -quinahi nade. <sup>53</sup> Nadsapa imehi bodi huatojari: —Maittadsama maji itetepidsa Jeso huati tajaride: “Ticca ejedenipa tonomihi” najaride -nahi nade. Nadsapa tamine biji accode pocca odsacca huapima naco Jesodsa pajissa quinajari nade.

<sup>54</sup> Ajijaro imapi Jeso Jodeahuaji ccanidsa Carireadsa bacco nanidsapa nahi Carireadsa canahatori canapomajari.

## 5

### *Passo inorinidsa coma tajari Jesojine tonomijari*

<sup>1</sup> Jodiodenicca ejete bacco tapomadsapi Jeso Jerosarehuaji toccanipomajaride. <sup>2</sup> Nani Jerosarehuajipi edede ihieqquedsimamana nahicca noccobiji huajira tanidsa siba ppajani

tohuittidsanani dsaja tajaro. Najaro passo onini jodiodeni atti ebreodsapi: Besata, quiquinanajari. Nani passo inorinidsapi madija comaqquiri najaridenicca odsa 5 canehe cacahitteri najarode. <sup>3</sup> Najaro odsadsapa madija comaqquiri najarideni domo podsaridsa, noccodeni siri domo podsaridsa, issodeni siri domo podsaridsa, idedeni tone biqueradsa issodeni ssomi toquejenajarideni domo podsaridsa najaride. Pohuadenipa: —Passo ccomororo canadsa opodsippadsa onominijine -quiquinanajari. [ <sup>4</sup> Aji passo ccomororo cacana najaropi Diocca dodosse memehujicajine huajiji tadsa ccomororo cacana najaro, quiquinanajari. Passo ccomororo canadsa madija tahide toqquedsippapodsa podsippajarina totonomimana najari, quiquinanajari nade. ] <sup>5</sup> Naraha nahicca comaqquiri najarideni ojariapa huajano 38 naha coma tajari. <sup>6</sup> Najarina ponahi Jeso qqui inadsa nahidsa coma taha maitta madirahi ima mittadsapa pohuadsa huati tajaride: — ¿Tinominijine jipa tinaqui? -nade. <sup>7</sup> Naraha pohua cacomerade: —Jehe, jipa onaraha passo ccomororo canadsa ohua napodsippade ocappiradsa ajidsa onominijine ssamo tani -nade. —Passohuaji ccobo odsipparaha mijira onadsapi madija ohuahadenina tahide bacco bacco totodsippamanapo najari -nade. <sup>8</sup> Nadsapa Jeso aja coma tajaridsa huati tade: —¡Titehemaji! Titaboro tididsa ticcaniji -nade. <sup>9</sup> Nanaja amadsati tonomidsapa totehema, pohua taboro idi toccani-ni naraha najaro huadapi

sabado tojajarojine pohua taboro dsojode oppina tani, quiquinanajari. <sup>10</sup> Nadsapa jodiodenipa pohuadsa: —A, jidapapi icca jassinajacca huada sabadoraha titaboro dsojo taridsani. Najaro imapi bica tejerani —quinade. <sup>11</sup> Naraha tonomijaripa pohua cacomerade: —Ohua tonanomide attipa: “Titaboro tididsa ticcaniji” nadsapa —nade. <sup>12</sup> Naraha: —¿Nejecojarina tiadsa: “Titaboro tididsa ticcaniji” najarinaja? —quinade.

<sup>13</sup> Naraha tonomijaripa pohua tonanomide oni ssamo tajari: —¿Nejecojarinaja? —nade. Aja Jeso madija inanomihidsapa madija huapi taja najari. Nahi pohuadenidsa quejemadsapa amossi najari. <sup>14</sup> Dsotodena Jeso pohua inanomijaripa Diodsa dada toqquimahuaji bacco inajari. Nahidsana pohuadsa huati tajaride: —Jidapapi tinomidsama imasiri tinanapomajerana. Imasiri tinanapomadsapi denima ocasserehe tiadsa ssonarinitohui —najaride Jeso pohua inanomijaridsa.

<sup>15</sup> Nadsapa tonomijari jodiidenidsa huatide toccajari: —Jesona ohua tonanomijari —nahi nade. <sup>16</sup> Naraha pohua atti nama nadsapa jodiideni Jeso jara quinajari, inanadsoqqemanahijine. Sabado huajjiradsa madija ihinanomibaqqi nadsapa pohuadsa huadimanageride. <sup>17</sup> Naraha nidsa dsotodena Jesopa pohuadenidsa huati tade: —Occa Abipa dsepe ijihipaja nadsapa ohua naqui nema onajaro —nade.

<sup>18</sup> Jeso atti nama nahi mittamanadsapa jodiideni paja icahadimanarihi nade. Attidenipa: —Sabadopi oppina tani inajarodsa ibora tajarad-

sapa madija inanomihi -quinajari. Jeso pohua atti onihi naqui: —Diopa occa Abi -nahi mittamanadsapa pohuadenidsa pina Diossa nahi quinadsa Jeso dsoqquehijine tohui inacomamanajari.

*Dio Bedipa Imehi tedseje canahatoqquimerajari*

<sup>19</sup> Naraha Jesopa jodiidenidsa pohua tahimari ecomerade: —Pajissara tiadenidsa huati onajaro: Dio Bedipa pohua ehuerahipa nahatora tahi. Naraha pocca Abicca nahatohue qqui tadsana pohua naco nema inanajaro. Pina Imehicca nahatohuessa najaro ihinahato najaro Bedi naco -nade. <sup>20</sup> —Imehi pohua Bedidsa huati huana tadsapa pohuadsa pocca nahatohue nohue inajaro. Najaro nahatohue Abijinepi denima denima dsanaponitohui. Najaro qqui tiquinadsapi huajo ticanirenitohui -nade. <sup>21</sup> —Abi inahatoni-baqquijaripa camittehe pohuadenidsa da da ihinaridsa najaro. Najarossa najaro pocca Ejedeni naco pohua jipa tajaridsa pocca camittehe da da ihinaridsa najaro. <sup>22</sup> Abipa Pohua Bedidsa dacorehe da inadsapi Pohua Bedi icadossejari: “Tiana madija poccadeni imasiri manaconi pohuadenidsa tinassonariji” najari. Nadsapa Abi Diopa madija poccadeni imasiri manaconi pohuadenidsa inassonari-jeranitohui. Pohua Bedina pohuadenidsa inassonarinitohui. <sup>23</sup> Nadsana dsama huapimacca madijapa Dio Bedidsa: “A, nahato tahi” quinahijine. Pina Imehidsa: “A, nahato tahi” quinajarissa quinahijine. Naraha Pohua Bedidsa: “Nahato tahi” quina-jaradsapa

pocca Abi pohua Cadossededsa naco: “Nahato tahi” quina-jarajarissa najari -nade Jeso.

<sup>24</sup> —Pajissara tiadenidsa huati onana: Ohuatti mittamanajaridenipa aja ohua Cadossede Abi Diodsa pajissa quinadsa naco camittehe jiquejeranicca cajimana-dsanapohuitohui. Poccadeni imasiri manaconipi pohnadenidsa ssonari-jeranitohui. Tahide Diodsa ssamoqquiri nadsapa pina dsoqquemanajarissa quinaraha najaro inebomanadsa camittehe jiquejeraniccadsa toquejenajari -nade. <sup>25</sup> —Pajissara tiadenidsa huati onana: Jidapapi ima bacco nabote nani: Diodsa ssamoqquiri najarideni naco Dio Bedi ohuatti mittamanahitohui. Ohuattidsa iboraqquiri nadsapa camittehe jiquejeranicca cajimanahitohui -nade. <sup>26</sup> —Abi Diopa camittehe jinede. Ohuapi Pohua Bedi ohuadsa naqui camittehe da inajaro. <sup>27</sup> Occa Abijine ohuatti ocajijaropi nidsa dsama jicadsa madijadenicca imasiri manaconi pohnadenidsa onassonarinitohui. Ohuapi Madija Bedi oजारode. <sup>28</sup> Ajijaro ima timittamanadsapi huajo ticanire-jeraji. Nidsa aja jicapjarideni ohuatti mittamanadsapa nahatonimanahitohui. <sup>29</sup> Nadsapa bicani inanamanehe jicajarideni nahatonimanadsapa camittehe jiquejeraniccadsa toquejenahitohui. Naraha imasiri inanamanehe jicajarideni nahatonimanadsapa poccadeni imasiri manaconi idsahua-baqquidsapa najidsohue jiquejeraniccadsa madimana-dsanapohuitohui -nade Jeso.

*Abi naco Pohua Bedi tahimari ecomerajaro*

<sup>30</sup> Jesopa jodiidenidsa huati huati dsanapojaride: —Nadsama ohua mottapi madija poccadeni imasiri manaconipi pohuadenidsa onassonari-jerajaro. Abi Dio Pohua Atti omittadsana imarideni ohocattema najaro. Ohuapi ohua motta ohua tohuini onanicca onana-jerajaro. Naraha aja ohua Cadossede Pohua Attissa onanadsana imarideni ocattemadsa onapajiranissa tajaropaji.

<sup>31</sup> “Ohuapi Dio Bedi ojani” onajaro ohua motta huati huati onadsapi tiadenipi ohuadsa: “Pohua motta pohua atti iadsa ehecomera najaro pajissa jerani” titiquina najaro -nade Jeso.

<sup>32</sup> —Naraha otahimari cacomeradepa ohuaha madihi. Najaripa Huano. Pahuapa otahimari pajissara huati huati tajari nahato onajaro -nade Jeso. <sup>33</sup> —Nadsama Huanocca imatohui dosse tinabaqquimanapodsa naco otahimari ecomerajaro. Pahuapa pajissacca imara huati huati tajari -nade pohuadenidsa.

<sup>34</sup> —Naraha madija otahimari cacomerade no-hueradsa naqui epeje. Ohuapi Dio Bedi ojani otahimari ima onihidsa naqui ahuato tajaro. Aji otahimari Huano ecomerapojarocca tiadenidsa huati huati onajaropi tossiejehe ticajimananijine. Huanocca huatinajadsa pajissa tiquinapodsapi ohuadsa naqui pajissa tiquinanijineraha.

<sup>35</sup> Huanopa pina jojororo toquehessidsa jororo canapojarissa najari. Pohua jororonepa aja pocca huatinaja tiadenidsa bica tade. Pohuadsa tetetidsemana naraha amossi nadsapa epeje tiquinade. <sup>36</sup> Nadsama Huanocca huatinajapi

ajimani. Occa nahatohuena deni tojajaro. Occa nahatohuepi occa Abicca dosseniji. Najaro nahatohuejinena ima ahuato tajaro: Pajissa occa Abi ohua cadossejari.

<sup>37</sup> —Nadsama Abi ohua cadossejarijinena occa ima ahuato tani qqui tiquinajaropaji. Naraha Pohua Atti mohuini timittamana-gerani. Pohua assire naco qqui tiquina-jarahi. <sup>38</sup> Pohua Atti naqui tibodidenidsa madidsa-gerani, Abi Dio icadossejaridsa pajissa tiquinejerarajone.

<sup>39</sup> Nadsama tiadenipi Dio Atti dsodo nani timittamananissa tanijine hua hua titiquina nani. Tettidenipi: “Dio Atti dsodo nanidsa camittehe jiquejeranica bacco inanijine” titiquina najaropi nani Dio Atti dsodo nanidsa otahimari anini. <sup>40</sup> Naraha tiadenipi ohuadsa pajissa tiquinejerajaro. Pajissa tiquinadsapi camittehe jiquejeranica ticajimana-dsanaponitohuiraha -nade.

<sup>41</sup> —Madija attidenipa: “Tiapi deni tijani. Bica tinani” quinahijine occajona-gerajaro. <sup>42</sup> Ohuapi tibodideni nahato onani: Diocca tohuati huanehepi tiadenidsa nohuerani. <sup>43</sup> Ohuapi occa Abi onima pocca dosseniji occajonajarode. Naraha tiadenipi ohuadsa: “Tadsa tijaji” tiquinegerani. Naraha madija ohuaha pohua pocca imadsa ccajonajaridsapa: “Tadsa tijaji” tiquinanitohui. <sup>44</sup> Naraha ¿nejecoma tiquinadsa ohuadsa pajissa tiquinanijine? Tiadenipi aja titessedeni tiadenidsa: “Tijine ima bica tani” quinahitohuina tiquinajaro. Naraha Diona ojarihi. Pohua Attipa tiadenidsa: “Tijine ima bica tani” nahijine tohuinipi tibodideni huatoma-gerani. <sup>45</sup> Tibodidenipi

ajima najaro: “Dsama jicadsa Cristo-Mesia iadsa ima inassonariniijine Abi Diodsa huati tahitohui” tiquinaraha aja tiadenidsa ima inassonariniijinepi Moisesina paja. Tibodidenipi: “Moisesicca marinaja ecahuanissa tadsapi icassiejeranitohui” tiquinaraha tecahuamananiijinepi tipajiramana-jerani.  
<sup>46</sup> Nadsama Moisesipa otahimari dsodo inapojarode. Moisesidsa jehe tiquinadsapi ohuadsa naqui jehe tiquinaniijineraha.  
<sup>47</sup> Naraha Moisesicca dsodonijidsa pajissa tiquinejeradsapi ¿nejecoma nadsa ohuattidsa pajissa tiquinaniijine? –nade Jeso.

## 6

*Jeso madija 5 mil quinajarideni inajipabaqqi-jari*

*Mateo 14.13-23; Maraco 6.30-44; Roca 9.10-17*

<sup>1</sup> Nani dsotodepi dsama arobeni Carireacca coridsa onini onihipi Tiberiaccia coridsa quiquinanajari jippehuaji Jeso pohuadsa jaijajarode. <sup>2</sup> Madija huapima naco Jesotohui inatti jajahimissa najaride. Pocca nahatohuedsa comaqquri najarideni tonomiridsamanahi qqui toquinapoja najariijine Jeso pohuatohui quinajari. <sup>3</sup> Nadsapa Jeso ssonohuaji toqqemoradsa pohua huatimadedeni ia naqui pohuadsa jaijemorade. Nanidsa jassi inadsapi Jeso naco iadsama huittajaride. <sup>4</sup> Ajijaro ima tojajaropi jodiodenicca ejete onini Pascoa bacco tabote nadsade. <sup>5</sup> Nanidsa jassi inadsana madija bacco namissamanahi Jeso



qqui inabaqquijaride. Nadsapa Jeso pohua huatimade Feripedsa huati tade: —¿Nejecohuaji madija huapima jipamanahijine taparideni mitta inapadsaja? —nade Jeso. <sup>6</sup> Jesopa madija inajipabaqquihijine nahato taporaha ecomadsa: —¿Feri pe atti nejecoma nahi? —nadsa huati tajari. <sup>7</sup> Naraha Feri pe attipa: —Dsiniro huemani pina 200 denariodsa madija taparideni mitta inadsapa badsira badsira taridsaraha motadenipa dsori tocanirehitohui —nade.

<sup>8</sup> Naraha Jeso huatimade ojaría onipa Adiri, pohuapa Ssino-Pedro ohuaha najarina dsabisso pan cajihi qqui tadsapa Jesodsa huati tajaride: <sup>9</sup> —Ajajari dsabissona pan 5, aba pama naha cajiraha madija huapima jipamanahijine pajirajarahi. Madijapa huapi tahi —nade.

<sup>10</sup> Nadsapa Jeso iadsa huati tade: —Madija jassi taridsahijine huati tinabaqquimanajo —nade. Nadsapa huati inabaqquidsá nahi dsero bica tanidsa jassi taridsade. Maqquideje pohuarapa 5 mil quinajaride. <sup>11</sup> Nadsapa Jeso pan inaccadsa Diodsa huati tajari: —Jehe, epejeni. Ticca daniji iadsa bica tahi —najari. Nadsapa Jeso canahatori canajarijine pan tohuapidsapa madija jassi jassi teri najaridenidsa da inabaqquiridsade. Aba naco najarissa inanajari. Nadsapa huapimadsa inapajirabaqquihissa tade. <sup>12</sup> Madija huapima jipamanaha accaramanadsapa Jeso iadsa huati tade: —Mota tojadsapa tinaccaniridsa-manajo. Mota tinebomana tajarajo —nade. <sup>13</sup> Nadsapa pan 5 najari jipamanajari ajarideni mota inaccaniridsadsapa quiqui 12 naha ijiridsade.

<sup>14</sup> Nadsapa Jeso canahatori canahi qqui to-quinadsapa imahaha canade: —Pajissa ajaripa Dio Atti cacomerabote. Maittaccad-sama ima imittapojaropi: “Ajijaro dsamadsa bacco nahitohui” quiquinanapode -quinade huapima. <sup>15</sup> Nadsapa madija attideni: —Jari, Jeso dama inadsa icca tamine tojahijine iaccanina -quinaraha Jeso pohuadsa nama quinahijine nahato tapodsapa madija inebobaquipomadsa pohua motta madihijine ssonohuaji denima to-qquemorade.

*Jeso passo tetepi ccamissajari*

*Mateo 14.22-33; Maraco 6.45-52*

<sup>16</sup> Nadsapi maji amossi nabote nadsa Jeso huatimade iapi coridsahuaji jaijedsippajarode. <sup>17</sup> Jesotohui imadidsapi dsomebote tojaraha Jeso qquedsippa-jaradsapa canoadsa jaijedsadsa coridsa jippehuajicca odsa panani Capernaohuaji iaccade. <sup>18</sup> Nadsapi coridsa nocconi iaccaraha jojode jo jo nadsapi coridsa ssoda ssoda nade. <sup>19</sup> Nani coridsa nocconi iaccanaja inatti-huaji passo tetepi Jeso ccajonahi qqui inadsapi icappina nade. <sup>20</sup> Naraha pohua cacomerade: —¡Ticappinamana tejeraji, ohuapi ohua! -nacionade. <sup>21</sup> Nadsapi etidsedsa pohuadsa: —Canoadsa tiqquedsaji -inade. Nadsapi amadsati Capernaohuaji bacco inade.

*Jesotohui      quinarideni      Capernaohuaji  
jahimissajari*

<sup>22</sup> Najaro ssiajadsa madija mota aja coridsa jippehuaji ibomanajarideni huatideni huatomadsa: —Jeso huatimadedenipa canoa

cajarie caponajarodsa jai tojaraha Jesopa pohnadenidsa tocca najarade -quinajari. <sup>23-24</sup> Nadsapa nahidsa Jesotohui, pohua huatimadedenitohui qqui naridsamanaraha bacco inabaqquimana-jaradsapa: —Jina, jippehuaji jaijana -quinanaja odsa panani Tiberiahuajicca canoa onihi bacco bacco canajona-manajaro quinade. Nahi Jeso pohua Diodsa huati tadsa: —Jehe, epejeni. Ticca daniji iadsa bica tahi -napodsa pan da da ihinabaqqui nahi huajira tanihuaji huana huana canajona-manajaro. Nadsapa nahidsa ibomanajarideni najaro canoa onihidsa onihidsa jai tojedsaridsadsapa Capernaohuaji jahimissajaride Jesotohui.

*Jesopa madimana-dsanapohuijinecca pan tojajari*

<sup>25</sup> Jesotohui dsotode jahimissajarideni canoa onihidsa bacco bacco namissamanade. Nadsapa Jesodsa huati toquinade: —Ia Maride ¿nejecoma nadsa ahuaji bacco tajonajarotte? -quinade. <sup>26</sup> Naraha Jeso pohnadenidsa huati tade: —Jehe, pajissara tiadenidsa huati onana: Ohuapi tiadeni onajipabaqquidsa teccaramanajarojine otohui tiquinajaro. Naraha occa marinaja, ocanahatori canani timittamananissa tejeradsapi najaro occa marinajatohui ohua qquidso tajonamana-jerani -nade Jeso pohnadenidsa. <sup>27</sup> —Naraha tiadenipi ticcadeni jijipa jicaca tahicca tohuira tibodideni huato-jeraji, onajaro. Jijipa jicaquera tahicca tohuira tibodideni huatomanaji -nade. —Ohuapi Madija Bedi ojajaroa jijipa jicaquera tahiccara

tiadenidsa da onaridsahijine, onajaro. Nadsama najaro cacahuehepi occa Abi Dio ohuadsa da inadsa occajonajaro -nade Jeso.

<sup>28</sup> Naraha manaco pohnadsa huati toquinade: —Dio jipa tahicca inananijinepi ¿nejecoma inanijine? —quinade. <sup>29</sup> Naraha Jeso pohnadsa huati tapomade: —Diopa ajima tiquinadsana jipa tajari. Aji ohua Diocca dossenijidsa pajissa tiquinadsana Dio jipa tahi -nade.

<sup>30</sup> Naraha manaco pohnadsa huati toquinapomade: —¿Nejecora inoccodsa ticanahatori canani qqui inadsa tiadsa pajissa inanijine? ¿Nejecora tinahatohijine tipajirani? Qqui inana -quinade. <sup>31</sup> —Jari, pina maittaccadsama icca idideni dsama huamonihuaji Moisesidsa jahiridsadsapa jijipa oni mana jijipamana nahi quinade. Najaro ima Dio Atti dsodo nanidsapi ajima najaro: “Pohnadsa memehujicca pan da inadsapa jijipamana najari” quiquinade -quinade Jesodsa.

<sup>32</sup> Naraha Jeso pohnadsa huati tapomade: —Pajissara tiadenidsa huati onana: Najari pan memehujiccapa Moisesicca daniji jarahi. Abi Diona pohnadsa da da nanaja najari. Naraha jidapanaccapa memehujicca pan pajissacca occa Abi Dio tiadenidsa da inajari.

<sup>33</sup> Najaripa Diocca daniji memecca ccaronajari, dsama huapimadsa camittehe jiquejeranicca da inaridsanijine -nade Jeso. <sup>34</sup> Naraha pohnadeni attipa: —Jari, Mamaride, najari pan iadsa da da tidsanapojo -quinade.

<sup>35</sup> Naraha Jeso pohnadsa huati tade: —Aji ohuapajia pan timadimana-dsanaponijinepi.

Ohuadsa pajissa quinajaridenipa pemimana-jarahitohui, baccodeni naco dsarimana-jarahitohui. <sup>36</sup> Nadsa tahide tiadenidsa huati huati onapode. Ohua qqui tiquinaraha ohuadsa pajissa tiquinejerani, onapode. <sup>37</sup> Naraha ohuapi occa Abicca daniji ohuadsa jahijonajarideni huapimapa ohuattajobaqqui-jarahitohui. <sup>38</sup> Aji ohua memehuai occaronajaropi ohua ohua motta tohuini onanicca onananiijine jerani. Occa Abi ohua cadossejari. Pohua jipa tahicca tohuini onadsa odsepe ijiridsajaro. <sup>39</sup> Ohua cadossejari pohua jipa tahiccapi ajima najaro: Abi Dio ohuadsa madija inanabaqquijaripa ohuacahuabaqquihissa tadsapa amossi naja cama-jarahitohui. Nidsa huada jicarinicca bacco tadsapi huapima onahatoni-baqquihitohui. <sup>40</sup> Nadsama occa Abi Pohua jipa tahicca onihipi ajima najaro: Madija huapima Dio Bedi qqui toquinadsa pohuadsa pajissa quinadsapa camittehe jiquejeranicca cajimanahitohui. Nidsa huada jicarinicca bacco tadsapi najarideni huapima onahatoni-baqquihitohui –nade Jeso.

<sup>41-42</sup> Nadsapa jodiideni Jeso atti: —Ohuapi pan memehujicca occaronajaro –nahi mittamanadsapa pohuama attitti cosseri nade: —Ajajari Jesopa Dsodse bediraha “Ohuapi memehuai occaronajaro” naha. ¿Pocca abi amidenidsa inocco jidsaqquri najaroqui? ¡Nahatoqquri inani! –quinade.

<sup>43</sup> Naraha Jesopa pohuadenidsa huati tade: —¡Ponima attitti ticossajaropi tinebomanaji!  
<sup>44</sup> Occa Abi Dio ohua Cadossedepa madija ohuadsa inanabaqqui-jaradsapa ohuadsa

toquejena-jarahi. Naraha occa Abi ohuadsa inanabaqquijaridenina ohuadsa totoquejena najari. Najaridenipa nidsa huada jicarinnicadsa onahatoni-bagquihitohui, onajaro. <sup>45</sup> Dio Atti cacomeragquiri najarideni dsodo quinapojarodsa naqui ajima nani: “Diona madija huapima mari icanabaqquihitohui” quinapohui nade. Najaroa aja madija huapima Abi Dio Atti mittamanadsa tocahatterajaridenina ohuadsa totoquejena nahitohui.

<sup>46</sup> —Nadsama madija huapimapa Abi qqui toquina-jararaha ojariana Abi qqui tajari. Najaropi ohua. Ohuapi Dio pocca occajonajaro. <sup>47</sup> Ohuapi pajissara tiadenidsa huati onajaro: Madija ohuadsa jehe quinajaripa camittehe jiquejeranicca cajimana-dsanapohuitohui, onajaro —nade Jeso.

<sup>48</sup> —Jehe, ohuapi pan timadimana-dsanaponijinecca. <sup>49</sup> Nadsa maittaccadsama ticcadeni idideni dsama huamonihuaji jahiridsadsapa pan oni mana jipamanapojaripa huapima jicaridsajari. <sup>50</sup> Naraha aja pan memehujicca ccaronajari tahimari huati huati onajaro jipamanajaridenipa jicamana-jarahijine, onajaro. <sup>51</sup> Ohuapi pan camittehecca opani memehujicca occaronajaro. Najari pan madija jipamanajaripa madimana-dsanapohuijine, onajaro. Tiadenidsa pan da onajaripa ohuassire. Madija dsama huapimacca tocassiejerahijinepa ohuana ohua ohuaccoranitohui —nade Jeso.

<sup>52</sup> Nadsapa jodiodeni Jeso atti mittamanadsa pohuadenira ahuaji huati ahuaji huati quinajaripa: —¿Pohua pohua assire nejecoma

inanadsa ia tonajipabaqquihijine? ¡Ssamo tani!  
-quinajaride.

<sup>53</sup> Naraha Jeso pohuadenidsa huati tade:  
—Pajissara tiadenidsa huati onapomana:  
Ohuapi Madija Bedi ojajaroa ohueme  
tijipamana-jeradsapi camittehe jiquejeranicca  
ticappiramananitohui. Ohuemene dse

tiquinejeradsa naqui camittehe jiquejeran-  
icca ticappiramananitohui. <sup>54</sup> Naraha

ohueme jipamanajarideni, ohuemene dse  
quinajaridenina camittehe jiquejeranicca  
cajimana-dsanapohuitohui. Nadsapa nidsa

huada jicarinicca bacco tadsapi najaridenina  
onahatoni-baqquihitohui, onajaro. <sup>55</sup> Nadsama

ohuemepi jijipa pajissacca, ohuemene  
naqui dsedse pajissacca ojani. <sup>56</sup> Aja

ohueme jipamanajarideni, ohuemene dse  
quinajaridenipa ohuadsa madiridsamanajari.  
Ohua naqui pohuadenidsa omadiridsajaro.

<sup>57</sup> Abi Dio camitta tajarina ohua dosse  
naronajaride. Najari Pohujine camitta

onajaro. Najarossa onanajaroa madija  
ohua jipamanajaridenipa najaro camittehe  
jiquejeranicca cajimanahijine. <sup>58</sup> Aja pan

memehujicca ccaronajari tahimari huati  
onajaropi pina pan oni mana ticcadeni idideni  
jipamanajarissa najarahi. Ididenipa najari

mana jipamanaraha najaridenipa tojicahi.  
Naraha aji ohuapi pan memehujicca ojajaro.  
Najari pan jipamanajaridenipa madimana-

dsanapohuitohui -nade Jeso.

<sup>59</sup> Najaro imapi Capernaohujicca Dio Atti ma-  
marihuaji Jeso madija mari icanabaqquijaride.

*Jeso attina camittehe jiquejeranicca*

<sup>60</sup> Nadsapa Jesocca marinaja pohua ime tahimarini mittamanadsapa aja pohuadsa jahiridsajarideni motapa imahaha canade: —Aja Jeso huati huati tajaripa imittanijine najo tani. ¿Nejecojarina mittadsa jehe nahijine? —quinade.

<sup>61</sup> Pohuadenira attitti cosseri nahi Jeso nahato tadsapa pohuadenidsa huati tade: —¿Aji ima huati huati onajaropi tiadenidsa ocassera tajarocchi? <sup>62</sup> Naraha ohuapi Madija Bedi ojararoa nidsa omadiponihuaji occamacossanini qqui tiquinadsapi ¿nejecoma tiquinapadseje? Nadsana tibodideni huatomanitohui. <sup>63</sup> Dio Corimena madijadsa camittehe da inajaro. Madijapa pohua tessedsa camittehe da inanijine ssamo tani. Ohuatti tiadenidsa huati huati onajaropi Dio Corimecca daniji. Camittehe jiquejeranicca tiadenidsa da inanijine pajirani.

<sup>64</sup> Naraha tiadeni motapi ohuattidsa pajissa tiquinejeraccani —nade Jeso. Madija mota pohuadsa pajissa quina-jarajaridenidsa naco nahato tapojari. Pohua ccaccoradedsa naco nahato tapojari. <sup>65</sup> Nadsapa denima huati tajari: —Najaroa ohuattipi: Occa Abi Diopa madija ohuadsa inanabaqqui-jaradsapa ohuadsa toquejena-jarahi. Naraha occa Abi ohuadsa inanabaqquijaridenina ohuadsa totoquejena najari —nade Jeso.

<sup>66</sup> Jeso najaro ima huati huati tadsapa madija pohuadsa jahiridsajarideni huapi taraha motapa jai tojaniridsade. Jeso pohuadsa jahiridsaraha ineboqqui-manajaride. <sup>67</sup> Nadsapa Jeso pohua huatimade 12 inajarodsa huati tade: —¿Tiadeni



naqui: “Jaijanina” tiquinaqui? –nade. <sup>68</sup> Naraha Ssino-Pedro pohua cacomerade: —Ia Medsede ¿nejecojaridsara jaijanijine? Tettina ojarini camittehe jiquejeranicca. <sup>69</sup> Iapi tiadsaha pajissa inapode. Tiadsana nahatoqquiri inajaro: Tiapi Diocca Ejedeni Bicabote tijani –nade Pedro. <sup>70</sup> Nadsapa Jeso huati tapomade: —Aji 12 tiquinajaropi tiadeni ocattejidsa-baqquijarode. Naraha ojariapa pina occa huadi Satanassa nahi –nade.

<sup>71</sup> Aja Jeso huati tajaripa Simon Iscariote bedi Joda tahimari huati tajaride. Jeso pohua huati-made 12 inaraha najari ojariana Jeso ccaccorade tojajaride.

## 7

### *Jeso pohua imecote pahuadsa pajissa quinajarajari*

<sup>1</sup> Nahi dsotodepa dsama arobeni Carireadsana Jeso madiccadsa odsa onihi, onihidsa mari mari naridsajaride. Dsama arobeni Jodeahuajipa jodiodeni Jeso pohua dsoqquehijine tohui quinadsapa nahihuaji madide jipera tajari. <sup>2</sup> Naraha jodiodenicca idideni odsa huahuaqquidedsa madiridsamanapojaridenicca ejete tohuajirajarode. <sup>3</sup> Nadsapa Jeso pohua imecotedenipa pahuadsa huati toquinade: —Ajidsapi timadi tejeraji. Jodeahuaji ticcaji. Nahihuaji madi-manajari titohui quinajaridenidsa naqui ticca nahatohue nohue nohue taridsaji –quinade. <sup>4</sup> —Madija ohuaha nahatohue cajimanajaridenipa pahuadeni tahimari tojaridsanijinepi poccadeni nahatohue ihinajimamana nejerajaro. Madija

huapima qqui toquinahijine nahatohue ahuato ihinanamana najaro. Tia naqui nahatohue ticajidsapi madija huapima qqui toquinahijine nema taridsaji -quinade pohua imecote attideni. <sup>5</sup> Jeso pohua imecotedeniraha pohuadsa pajissa quina-jaradsapa attideni nama quinajari-paja. <sup>6</sup> Naraha Jeso pohua imecotedenidsa huati tade: —Tiadenipi huada ponimaccadsa tohuini tiquinaraha otahimari tojaridsanijinecca huada bacco tejeraccani -nade. <sup>7</sup> —Nadsama tiadenid-sapa ajijaro dsamacca madija nacasseraqquiri najarahi. Naraha ohuadsana nacasseraqquiri najari, ohuapi poccadeni imasiri cacomera on-adsa. <sup>8</sup> Nadsapi tiadenira ejetehuaji jai tijaji, ohuapi oqquejerani. Ohuadsa nahatoqquiri nahijinecca huada bacco tejeraccani -nade.

<sup>9</sup> Jeso atti nama nadsapa Carireadsa ibojaride.

*Jesopa Odsa huahuaqquidecca ejetedsa queje-majari*

<sup>10</sup> Nadsapa Jeso imecotedeni ejetetohui jai tojadsapa pohua naco dsotode nahi madija huapi tahidsa toquejema-dsanapode. Naraha pina pohuadenidsa toqquerahi nahijine pohua cacomajaride. <sup>11</sup> Nadsa ejete tojadsapi jodio-deni taminedenipa Jeso bacco quinahijine qqui naridsamanadsapa: —¿Nejecohuaji maqquideje nahatobotepa? -quinajaride. <sup>12</sup> Nadsapa madija huapima Jeso pohua tahimari imahaha canade. Madija motapa: —Najaripa maqquideje bicabotea -quinade. Naraha madija ohuahadenipa: —Iadsapa bica tajarahi. Puhuapa to-poni mamaisade -quinade. <sup>13</sup> Naraha Jesodsa

jipacquiri najaripa jodiodeni noppine cappinamanadsa ojidsa imahaha canade.

<sup>14</sup> Ejete mota tohuanaccaraha Diodsa dada toqquimahuaji Jeso toqquedsimadsa madija mari icanabaqquijaride. <sup>15</sup> Nahidsa Jeso mari icanabaquidsana jodiodeni huajo caniredsa imahaha canajaride. —¿Nejecoma nadsa tohuat-tajaritta? Mari mari ihicanamana najararaha -quinade.

<sup>16</sup> Naraha Jesopa pohuadenidsa huati tade: — Occa marinajapi occa jerani, ohua Cadossedejine -nade. <sup>17</sup> —Aji tibodidenipi: “Pocca marinajapi ¿Diocca dossenijiqui? ¿Pohua motta pohua attirane?” tiquinajaro nitide. Naraha Dio Pohua jipa tahiccara tinanamanadsapi otahimari tiadenidsa ahuato tanitohui: Occa marinajapi Diocca. <sup>18</sup> Aja madija pocca ima huati huati tataja najaripa madija ohuaha pohuadsa: “A, tiapi nahato tinani” nahijine huati huati tataja najari. Naraha madija ohuaha huati huati tataja najaripa: “Ajijaro imapi ojine jerani, ohua cadossedecca ima, pohuadsara tetidsemanaji” najari. Najarina pajissacca ima huati huati tataja najari. Madsa-jarajari -nade Jeso.

<sup>19</sup> —Naraha ¿Diocca dosseniji Moisesi dsodo inajaropi tiadenidsa nohuerajarottaqui? Ticajimanaraha najarodsa iboqquri tiquinajaro. ¿Nejecotohuira ohua tinanadsoqquemananijine tohuini tiquinajaro? Najaropi Diocca dosseniji jerani -nade Jeso.

<sup>20</sup> Nadsapa madija huapima Jesodsa huati toquinade: —Tiapi tocorime ticajijarojine mona

tijajaro nitidija. ¿Naraha nejecojarideni “Tia inanadsoqquena” quinajari? –quinade.

<sup>21</sup> Naraha Jeso pohnadenidsa huati tade: —  
 Icca jassinajacca huada sabadodsa occa naha-  
 tohue ojari naraha huajo ticanirejarode. <sup>22</sup> Aji  
 Moisesicca marinajadsapi: “Maqquidejedenipa  
 huissinaja cacajimana nahijine” napohui nade.  
 (Naraha najaro imapi Moisesi huati tadsa  
 jerani. Abarahao madipodsama nema najona-  
 jaro.) Najaroa aji ejedeni huadari 8 nadsapa  
 sabadoraha huissinaja titinacajibaqqumana na-  
 jaripaja. <sup>23</sup> Tibodideni huatomanaji: Pina  
 Moisesicca marinajassa titinanamana nanijine  
 sabadodsa maqquideje bedi huissinaja titinaca-  
 jimana naraha ¿aji ojinepi bica tejeraqui?  
 Ojinepa sabadodsa madija assire namanaha  
 tonomiraha ¿nejecotohui ohua ticahadimana-  
 jaro? <sup>24</sup> Nadsapi ajijaro ima tibodideni hua-  
 tonissa taji. Ponima “Tabaccora tani” tiquine-  
 jeraji. Ima nattomede tiquejenadsa pajissara  
 nattome tiquinanissa taji –nade Jeso.

### *Jesopa Diocca dosseniji ccaronajari*

<sup>25</sup> Nadsapa Jerosarehuaji madimanajarideni  
 motaha Jeso qqui toquinadsa imahaha  
 canajaride: —“¿Ajajaria inanadsoqquena”  
 quiquinanajarico? <sup>26</sup> ¡A, naraha aja madija  
 mari mari najonaha! Taminedenipa:  
 “Mari tejeraji” quina-jarajarirana. ¿Icca  
 taminedenipa: “Pajissa, Cristo-Mesia”  
 quinajarico? –quinade. <sup>27</sup> —Naraha  
 iapi ajajari madija pohua ccajonahihuajipa

nahatoqquiri inani. Nassa Cristo-Mesiapa pohua ccajonahihuaaji ssamoqquiri inaneje -quinade.

<sup>28</sup> Jesopa nahi Diodsa dada toqquimahuaji maride tojaraha pohuadeni atti mittadsa jad-sirema huati tajaride: —¡Jehe, tiadenidsa jid-sera onajarorane! ¡Ohua occajonanihuaaji naqui nahatoqquiri tiquinajaroraneje! Naraha ohuapi occa imadsa occajona-jerani. Aja ohua Cadossedena pajissehe jinede. Naraha tiadenipi Pohuadsa tinoccodeni jidsaqquri nani -nade.

<sup>29</sup> —Naraha ohuapa qqui onaja najari, nani Pohuahuaaji occajonajaro. Pohuana ohua cadossejaride -nade Jeso.

<sup>30</sup> Nadsapa nahidsa Jeso pohuadeni dsepedsa tojahijine dama quinahitohuiraha dama quinarade. Jeso dsoqquehijinecca ima Djojine najo taccajaro.

*Jodiodeni motapa: —Jeso dama inana -quinajari*

<sup>31</sup> Naraha madija mota pohuadsa pajissa quinajaridenipa imahaha canade: —Jesocca nahatohue deni tojajaro. Pina Cristo-Mesiacca ima imittapojarossa nani. Najarina Cristo-Mesia pohua. Nidsa madija ohuaha pina Jeso canahatori canajarissa najarahitohui -quinade.

<sup>32</sup> Madija —Jesopa Cristo-Mesia -quinajari imahaha canadsa jodiodeni mota marinaja onini pariseodsa jehe quinajarideni mittamanadsapa dada toqquimade taminedeni tedseje nahihua-jicca cacahuadedeni Jeso dama quinahijine dosse inabaqquimanajari: —Jeso dama tiquinadsa tec-animanana -quinajari. <sup>33</sup> Jai tojadsapa Jesodsa

tacco toquinajari. Naraha Jeso pohuadenidsa huati tade: —Ohuapi tiadenidsa badsira tehe omadi naccanijine. Nidsa dsotodepi aja ohua Cadossedsa occaninitohui. <sup>34</sup> Nadsapi otohui qqui taridsamananitohui, naraha ohua tacco tiquinejeranitohui. Ohua omadinihuaji “Bacco inana” tiquinaraha nanihuaji tacco tiquinejeranitohui —nade Jeso.

<sup>35</sup> Najaro ima madija mittamanadsapa pohuadenira imahaha canade: —¿Dsama nejecoma nahihuaji toccahijine iadsa: “Ohua tacco tiquinejeranitohui” naha? —quinade. — ¿Jodiodeni dsama onihihuaji tojaribaqquijari-denihuaji toccahijineco? ¿Nahihuaicca jodio quejena-jarajarideni mari icanabaqquihijineco? —quinade. <sup>36</sup> —Pohua atti ¿nejecoma najari? Aja “Otohui qqui taridsamanaraha ohua tacco tiquinejeranitohui. Omadinihuaji naqui ‘Bacco inana’ tiquinaraha nanihuaji tacco tiquinejeranitohui” najari —quinade.

### *Passo camittehecca huati tajari Jeso*

<sup>37</sup> Odsa huahuaqquidecca ejete huada jicanicana denima bica tajaro. Najaro huadadsana Jeso huadsa jadsirema huati huati tajaride: —Tibacco dsaridsapi ohuadsa ticcajonadsa dse taji —nade. <sup>38</sup> —Madija ohuadsa pajissa najaripa passo camittehecca cajihitohui. Najaro pohua bodicca qquenadsapi tojaribaqquinitohui. Najaropi Dio Atti dsodo nanidsa dsodo napojaro —nade Jeso.

<sup>39</sup> Aja Jeso huati tajaripa pahuadsa madija pajissa quinajaridenina Dio Corime cajimanahitohui, najari. Naraha Jesopa dsoqqe, nahatoni, toccamacossani najaraccadsapa Dio Corime tojaridsa-jaraccajaripajade.

*Jeso tahimarijine madija carobemanajari*

<sup>40</sup> Jeso huati huati tahi mittamanadsapa madija mota pahuadenira imahaha canade: —Pajissa ajajari madijapa Dio Atti cacomerabotea -quinade. <sup>41</sup> Naraha madija mota attidenipa: —Ajararipa Cristo-Mesia -quinade. Naraha madija mota attidenipa: —¡Nohuerahi! Cristo-Mesiapa Carireahuajicca jarahi. <sup>42</sup> Aji Dio Atti dsodo napojarodsapi ima ajima najaro: “Mesiapa tamine Dabi Potemahi. Dabicca dsamabote odsa panani Berenehuajina ccajonahitohui” nani Dio Atti dsodo napojarodsa -quinade.

<sup>43</sup> Najaroa aji Jeso tahimarijine madija carobemanajaride. <sup>44</sup> Madija motapa: —Toponi corohuaji Jeso dsojo inana -quinaraha cappinamanadsa dama quina-jarade.

*Jodiodeni tamedeni huadimanajari*

<sup>45</sup> Nadsapa marinaja pariseodsa jehe quinarideni, dada toqquimade tamedeni quinadsa odsa bodihuaji queriqquimanadsa nahi Diodsa dada toqquimacca cacahuadedeni Jeso damade jai tojaraha Jeso jiraha bacco nanimanadsa tamedeni huati toquinajari: —¿Nejecotohui teccanimana-jarajari? -quinahi nade. <sup>46</sup> Naraha cacahuadedeni huati toquinajari: —Jeso attipa deni tojadsa pina madija ohuaha attissa najaradsapa -nanimanahi nade. <sup>47</sup> Nadsapa pariseodeni

cacahuadedenidsa huati toquinapomajari: — ¿Tiadeni naqui Jeso tiadeni tocamaidasabaqquijari itidija? <sup>48</sup> Naraha ¿jodiodenicca taminedeni Jesodsa jehe naja camajarico? Nohuerahi ¿Pariseodeni naco Jesodsa jehe naja camajarico? Nohuerahi. <sup>49</sup> Aja madija pohuadsa jahiridsajari-denipa iassa quina-jarahi. Pohuadenipa Dio Atti ssamoqquiri nahi. Najidsohue jiquejeraniccadsa toquejenahitohui –quinahi nade.

<sup>50</sup> Naraha aja pariseodeni ojaría oni Nicodemo dsome Jesodsa huatide tocca huajajarina pohuadenidsa huati tajari: <sup>51</sup> — ¡Titaharibobo canaji! Icca marinajapi ajima ihinanajaro: Madija pocca ima ecomera-jeraccadsapi idsahuaraccahi. Tahidepa madija tahimaritohui huati inaridsadsa, pocca ima nahato inadsa, tabaccora tahi ahuato tadsana ihidsahua najari –nahi nade Nicodemo. <sup>52</sup> Naraha Nicodemodsa huati toquinajari: — ¿Tia naqui Carireahuajicca tijajaro nitidija? Carireacca imatohui Dio Atti hua timaninissa taji. Carireahuajipa Dio Atti cacomeraqquiri najarideni qqunenaja cama-jarahi –quinahi nade Nicodemodsa. <sup>53</sup> Nadsapa poccadeni odsahuaji jai tojaniridsahi quinade.

## 8

*Amoneje maqqui cajiraha maqquideje ohuaha inajajaricca ima*

<sup>1</sup> Nadsapi ssono Oribohuaji Jeso toqqemoradsa pohuadsa jaijemorade. <sup>2</sup> Huada ssiaja jaijedsippanidsapi Diodsa dada toqqimahuaji



Jeso toqquedsimapomadsa madija ecahua-huajanimana najaride. Nahidsa Jeso huittaridsa madija mari icanabaqquijaride.

<sup>3</sup> Nahidsana jodiodenicca marinaja maridedeni, marinaja pariseodsa jehe quinajarideni tedsejepa amoneje eccajonamanajaro. Ponipi maqqui cajiraha maqquideje ohuaha najade tojadsa qqui toquinadsapa johua icanabaqquimanajari. Nadsapa amoneje dama quinadsa Jesodsa eccajonamanajaro. Jeso boronidsa mari mari nahihuaji inahuamana najarode. <sup>4</sup> Nadsapa pariseodeni Jesodsa huati toquinade: —Mamaride, ajijaro amonejepi maqqui cajiraha maqquideje ohuaha inajahi qqui inadsa tiadsa eccajonajaro. <sup>5</sup> Moisesicca marinajadsapi: “Amoneje maqquideje ohuaha najadsapi dsoqquena. Sibadsa tiquinaqquimanaji” nade. ¿Naraha tettiipi nejecoma tani? —quinade Jesodsa.

<sup>6</sup> Nama quinajaripa poadeni bodi: —Jeso ima dsori inanadsapi poadsa ima inassonar-inijine —quinajari. Naraha Jesopa tocattedsa nadsa ssiquidsa pohua dsepedsa dsodo dsodo nade. <sup>7</sup> Jesopa ssiquidsa dsodode tojaraha pariseodeni denima huati dsanapomananaja Jeso totehemadsa poadenidsa huati tade: —Jehe, tiquinaqquimanaji. Naraha imasiri cap-pirajarina tahide siba ididsa iquinapona —nade Jeso.

<sup>8</sup> Nadsapa tocattedsanipomadsa ssiquidsa denima dsodode tojapomade. <sup>9</sup> Naraha Jeso atti mittamanadsa bodideni huatodsapa maqquideje

jadahidenina tahide toqquena, toqquena jicamana nade. Huapima naco jai tojenaha jicadsapa Jeso pohua, amoneje poni tadsajanira banajaride. <sup>10</sup> Nadsapa Jeso totehemadsa aji amoneje huajarodsa huati tade: —Asi ¿nejecodsa jidacca madija tia ccaccajonadedenipa? ¿Najarideni ojariapa imasiri tinanani manaconi tiadsa: “Tia onanadsoqquena” naja cama-jaraco? —nade Jeso. <sup>11</sup> Naraha Jesodsa huati tade: —Ohua Medsede, nohuerapaja —nade. Naraha Jeso ponidsa huati tapomade: —Jehe, ohua naqui tidsoqqejei onejerani. Nadsama ticcanina. Jidapapi maqquideje ohuaha naja tejerana. Imasiri tinanapoma tejerana —nade Jeso.

### *Jeso ssiejenea madija huapimadsa ahuatoridsajaro*

<sup>12</sup> Jeso madija huapima mari icanabaqquipomajari: —Ohuapi dsama huapimadsa ossiejene ahuatoridsajaro. Madija ohuadsa toquejenajaripa ossiejene cajimanahi. Ossiejene cajimanadsapa camittehe jiquejeranicca naco cajimanahi. Nadsama camittehe jiquejeranicca cajimanadsapa imasiricca dsidsinidsa toquejenarajahitohui —nade Jeso. <sup>13</sup> Naraha marinaja pariseodsa jehe quinajari attideni Jesodsa: —Tia motta titahimari tetecomera najaro. Ia motta itahimari ecomerani bica tejerani, inajaro —quinade.

<sup>14</sup> Naraha Jeso pohuadenidsa huati tade: —Jehe, ohua motta otahimari ohuacomeraraha ohuattipi pajissa. Ohuapi ohua occajonanihuaji nahato onani. Ohua jara onanihuaji naqui

nahato onani. Naraha tiadenipi occajonanihuaji ssamoqquiri tiquinani. Ohua jara onanihuaji naqui ssamoqquiri tiquinani -nade Jeso. <sup>15</sup> — Naraha tiadenipi ajijaro namidsa madimana-jaridenicca marinajadsara madijacca ima nat-tomede nahatoqquiri tiquinajaro. Madijajine ima bica tejerani tiadenidsa ahuato tadsapi: “Pocca ima tabaccora tani. Icca marinajassa ne-gerani” titiquina naraha ohuapi nema onejerani. Madijacca ima nattome onejerani. <sup>16</sup> Naraha ohua madijacca ima nattome onanijinepi ohua motta nattome onejerani. Occa Abi ohua Ca-dossede tedsejena madijadenicca ima nanat-tome ihinanajaro. Nema inajaropi madijacca imadsa: “Tabaccora tani” onadsapi ohuattipi pajissa. <sup>17</sup> Naraha ticcadeni marinaja dsodo nanidsapi: “Madija pamaha qqui toquinajari poccadeni ima najarossa najaro ecomeramanad-sapi pohuadeni attidsa pajissa tiquinaji” nade. <sup>18</sup> Ohuapi ohua motta otahimari ohohuacomera naraha Abi ohua Cadossede naco otahimari ehe-comera najaro -nade Jeso.

<sup>19</sup> Naraha Jesodsa huati toquinapomade: — Ticca abipa ¿nejecohuaji madijari? -quinade. Naraha Jesopa pohuadenidsa huati tapomade: —Ohuadsa tinoccodeni jidsa tani, occa Abidsa naqui tinoccodeni jidsa tani. Ohuadsa tinocco-deni jidsera tadsapi occa Abidsa naqui tinocco-deni jidsera tanitohuiraha -nade Jeso.

<sup>20</sup> Najaro imapi Diodsa dada toqquimahujicca dsiniro huahuadsa baho cacahittidseri narid-sanihuaji mari icanabaqquijaride. Nahidsapa

Jeso dama quina-jaraccade, pohuadsa ima tojani-jinecca huada bacco tejeraccadsa.

—*Ohua occaninihuaji jai tijanijine tipajiramana-jerani -najari*

<sup>21</sup> Naraha Jeso pohuadenidsa huati tapomade: —Ohuapi occaninitohui. Occanidsapi otohui qqui taridsamananitohui. Naraha ohua occaninihuaji jai tijanijinepi tipajiramana-jerani. Tiadenipi ticcadeni imasirima tijicanitohui -nade Jeso. <sup>22</sup> Naraha jodio-denipa: —¿Pohua nanadsoqquehijineco? ¿Necotohuira “Ohua occaninihuaji jai tijanijinepi tipajiramana-jerani” naha? -quinade.

<sup>23</sup> Nadsapa Jeso pohuadenidsa huati tade: —Tiadenipi ajijaro namicca tiquejenani. Naraha ohuapi ajijaro namicca ojajerani. Ohuapi memehujicca ojani. <sup>24</sup> Aji ohuatti tiadenidsa: “Ticcadeni imasirima tijicanitohui” onajaropi ohuadsa pajissa tiquinejerajaro. Ohuapi aji huati huati onajaro ojani onajarodsa pajissa tiquinejeradsa naqui ticcadeni imasirima tijicaridsanitohui, onajaro -nade Jeso.

<sup>25</sup> Naraha manaco Jesodsa huati toquinade: —Tiapi ¿nejeco madija tijani? -quinade. Naraha Jesopa: —Ohuapi tahide otahimari tiadenidsa huati huati onajonajaroa aji jidapana tiadenidsa huati huati onajaropaji. <sup>26</sup> Nema nadsapi ticcadeni tabaccorehe huapima tiadenidsa huati onadsapi tiadenidsa ima ssonarinitohuiraha nema onejerani. Naraha ohua cadossejarina pajissa huati huati tajari. Puhuapa ohuadsa huati huati

tahi omittadsana ajijaro dsamacca madijadsa huati huati ohoqquima najaro –nade Jeso.

<sup>27</sup> Naraha pohuadenipa Jeso pocca Abi Diocca ima huati huati tajaripa mittamanahissa tajarajari. <sup>28</sup> Najarojine Jeso denima huati tapomajaride: —Ohuapi Madija Bedi ojajaroa nidsa ahua porimacossanidsa ohua acca ticanamacossa-manadsa que onanitohui. Nadsana nahatoqquiri tiquinanitohui: Aji huati huati onajaro ojani onajaropi pajissa. Ohua mottapi ohua jipa onanicca onanajerani. Occa Abi ohua mari canadsana huati huati ohonanajaro. <sup>29</sup> Nadsama ohua Cadossedepa ohuadsa madihi. Occa Abipa ohua motta ojanijine ohua nebo-jarahi, huajijiradsa Pohuadsa bica tanicca ohonana nadsapi –nade.

<sup>30</sup> Najaria Jeso huati huati tadsapa madija mota huapi taha pohuadsa pajissa quinajaride.

*Ohuahadenipa Diocca ejedeni toquejenajari, ohuahadenipa imasiricca medse toquejenajari*

<sup>31</sup> Nadsapa Jeso jodiodeni mota pohuadsa pajissa quinajaridenidsa huati tade: —Ohuattidsa disseraqquri tiquinadsapi pajissa occa tiquejenanitohui –nade. <sup>32</sup> —Occa tiquejenadsapi pajissehera nahatoqquiri tiquinanitohui. Najaro pajissehe nahatoqquiri tiquinadsapi tiadeni medsede tabaccora tajaridsa medse tiquejena-jeranitohui –nade Jeso.

<sup>33</sup> Naraha manaco Jesodsa huati toquinade: —Iapi Abarahao potemahi iquejenajaro. Medse iquejena-jerehe nema inajonajaro. Naraha ¿necotohui iadsara: “Medse tiquejena-jeraniijine”

tajaro? -quinade. <sup>34</sup> Naraha manaco Jeso pohuadenidsa huati tade: —Pajissara tiadenidsa huati onana: Madija imasiri inanadsapi najaro imasiricca medse tojajari. <sup>35</sup> Madija medse tojajari pa pohua medsedecca medse tojaraha pohua medsededsa nama dsanapojara tahi. Medse tojajari pa pina madija pohua pocca ejedenissa najarahi. Madijacca ejedenipa pocca abidsa nama dsanapojari. <sup>36</sup> Nadsama Dio Bedina tiadeni tappa tabaqquidsapa pajissa medse tiquejenajerehe timadimananijine onajaro. <sup>37</sup> Jehe, tiadenipi Abarahao potemahi tiquejenani nahato onani. Naraha ohuattidsa pajissa tiquinejeradsapi ohua tinanadsoqquemanabote nani. <sup>38</sup> Nadsama ohuapi occa Abi ohuadsa nohue inajarocca huati huati ohonanajaro. Naraha tiadenipi ticcadeni abi huati huati tataja nahi titimittamana najarora najarossa titinanamana najaro -nade Jeso.

<sup>39</sup> Naraha manaco huati toquinade: —¡Icca abipa Abarahao! -quinade. Naraha Jeso huati tapomade: —Pajissa Abarahao potemahi tiquejenadsapi pina Abarahojinessa tinanamanani-tohuiraha. <sup>40</sup> Dio pajissa ohua mari canajaricca tiadenidsa huati huati onajaroraha ohua tinanadsoqquemanabote nani. Abarahojinepi ima nema nejerani. ¡Nohuerani! <sup>41</sup> Naraha tiadeni naqui pina ticcadeni abijinessa tinanamanajaro -nade Jeso. Naraha manaco huati toquinajari: —¡Abi ohuaha icappirani! ¡Icca Abipa Diona ojarihi! -quinade.

<sup>42</sup> Naraha Jeso pohuadenidsa huati tade: —Pajissa Dio ticcadeni abi tojadsapa nassa

ohuadsa naqui tetideni huanaqquiri nanitohuiraha nema tiquinejerani. Ohuapi Diohuaji occajonajaro aji omadini. Ohuapi ohua ehuerani occajona-jeraraha Abi Dio ohua cadossedsa occajonajarode. <sup>43</sup> Naraha ¿nejecotohui ohuatti timittamananissa tejerajaro? Occa imadsa jiperaqquiri tiquinadsapi aji timittamananissa tejerajaropaji. <sup>44</sup> Ticcadeni abipa Diocca huadi Satana. Puhuadsa tiquejenani. Puhua jipa tahicadsa disseraqquiri tiquinajaropaji. Satanapa ijine ahuahijinera tohuattapoja najari. Pajissa huati tahijinepa ssamo tahi. Puhuapa maidsehe jinedeja najari. Najaria maidsehedsa huati huati nanaja najaripaja. <sup>45</sup> Najarojine tiadenidsa pajissara huati huati onaraha tiadeni naqui ohuadsa pajissa tiquinejerajaropaji. <sup>46</sup> ¿Nejecojarina imasiri ocajini ecomeranjine nahato tahi? Nohuerahi. Ohuapi pajissara huati huati onadsapi ohuadsa pajissa tiquinanjine bica taraha ¿nejecotohui ohuadsa pajissa tiquinejerajaro? <sup>47</sup> Madija Diocca quejenajaripa Dio Atti mitta-manahijine jipaqquiri najaripaja. Naraha Diocca tiquejena-jeradsapi aji Dio Atti mittade jiperaqquiri tiquinajaropaji -nade Jeso.

*Cristopa tahide madipojari, Abarahaopa dsotode*

<sup>48</sup> Naraha manaco jodiodeni Jesodsa huati toquinade: —Tiapi samaritano tijani. ¡Tiadsa jiperaqquiri inani! Jidacca huati inapojaropi pajissa. Tocarime ticajijaro nahatoqquiri inani -quinade Jesodsa. <sup>49</sup> Naraha Jeso huati tapomade: —Ohuapi tocorime ocappirani. Ohuapi:

“Occa Abipa deni tojahi” ohonanajaro. Naraha tiadenipi ohuadsa: “Jesopa deni tojahi” titiquina nejerani. <sup>50</sup> Naraha ohuapi madija ohuadsa: “Deni tijani” quinahijine tohuini onejerajaro. Naraha ojariana ohuadsa: “Deni tijani” quinahijine jipa tajari. Pohuana occa ima huapima nahato tajari. Pohuana madijacca ima huapima tocattejidsade nahato tajari. <sup>51</sup> Nadsama ohuapi pajissara tiadenidsa huati onajaro: Ohuattidsa iboraqquiri tiquinadsapi paji tijicarini nejeran-itohui –nade Jeso.

<sup>52</sup> Nadsapa manaco jodiodeni huati toquinade: —Jidapapi nahatoqquiri inani tocorime ticajijaro. Abarahaopa maittaccadsama dsoqquepohui. Dio Atti cacomeraqquiri najarideni naco jicaridsahi. Naraha tia tetti: “Ohuattidsa iboraqquiri tiquinadsapi paji tijicarini nejeran-itohui” taha. <sup>53</sup> ¿Ajina tiapi icca idi Abarahaodsa deni tijajarorane? Abarahaopa dsoqquepohui. Dio Atti cacomeraqquiri najarideni naco jicarid-sapohui. Naraha tiapi tibodi: “Ohuapi deni ojani” ¿tajaroqui? –quinade Jesodsa.

<sup>54</sup> Naraha Jeso pohuadenidsa huati tapomade: —Ohua mottapi ohua deni onanani pajira-gerani. Naraha occa Abi ohua deni tonanadsana pajirani. Occa Abipa Dio. Pohuadsa: “Icca Dio” tiquinaraha. <sup>55</sup> Pohuadsa ssamoqquiri tiquinani. Ohuana Pohuadsa nahato onani. “Nahato onejerani” onadsapi mamajidsade ojani, pina tiadenissa onanitoahiraha. Naraha ohuapi pajissa Pohuadsa nahato onajaro. Pohua Attidsa naqui ibora onajaropaji. <sup>56</sup> Nadsama ticcadeni idi Abarahaopa maittaccadsama occajonanicca



ima nahato tapodsapa huatidsedsa otohui madijari. Pajissa Diojine occaronani qqui tadsapa huatidseri najaride –nade Jeso.

<sup>57</sup> Naraha jodiidenipa Jesodsa huati toquinapomade: —Tiapi ticca huajano 50 bacco tajararaha ¿Abarahao qqui tinajarittaco? –quinade. <sup>58</sup> Naraha Jeso pohuadenidsa huati tapomade: —Pajissara tiadenidsa huati onajaro: Ohuapi Abarahao tossoa-jaraccadsa tahide omadipojarode –nade Jeso.

<sup>59</sup> Nadsapa jodiideni huadimanadsa siba nacca-cca quinade, Jeso iquinaqqui-manahijine. Naraha Diodsa dada toqquimahuaji madija huapi taja najari. Jesopa najari madijadenidsa quejemadsa amossi najaride. Diodsa dada toqquimahuaji toqquenajari.

## 9

*Jesopa nocco siri nama naha tossonahi nocco ssire inanajari*

<sup>1</sup> Jeso itedseje ccaridsadsapa maqquideje nocco siri qqui inade. Najaripa nama naha tossonajari.

<sup>2</sup> Nadsapi ia pohua huatimadedeni huati inade: —Ia Maride ¿nejecotohui ajajari maqquidejepa nocco siri tossonajari? ¿Imehidenicca imasiri manaconico? ¿Pocca imasiri manaconirana?

–inade. <sup>3</sup> Naraha Jeso iadsa huati tade: —Pocca imasiri manaconi jarahi. Imehidenicca imasiri manaconi jarahi. Nama naha tossonajari, nahi dsotodepa Diocca nahatohuejine tobicahi ahuato tahijine. <sup>4</sup> Nema nadsapi ssiaja taccadsama ohua cadossejaricca dosseniji idsepe ijina, onajaro.

Nidsa dsomedsapi idsepe ijinijine ssamo tani. Nidsa odsoqquedsapi pina dsomejarossa nani-tohui. <sup>5</sup> Najaroa aji namihuaji omadiccadsapi ajijaro namidsa madimanajaridenicca ssiajani ojaccani -nade Jeso.

<sup>6</sup> Najaro ima huati taha jicadsapa Jeso pohua nassope namidsa ppito inadsa sica sica inadsa maqquideje nocco siri nocco sse inajaride.

<sup>7</sup> Nadsapa Jeso nocco siri dosse inade: —Ajicca siba hui todsanicca passo onini Siroedsa tinocco ssahua tana -nade. (Siroe ettidsapi: Dosse tahi, inajaro.) Nadsapa toqquedsippajari, pohua nocco ssahua nadsa pocca odsahuaji toccanid-sapa nocco ssire taha toccanide. <sup>8</sup> Nadsapa pohua inoricca madija, ohuahadeni tedseje nocco tobicahi qqui toquinajari. Pahuadenipa dsiniro-tohui huihuitta nahi qqui qqui toquinapoja najari pohua tahimari imahaha canajaride: —¿Ajajaripa danijitohui huihuitta najari jaraco? -quinade. <sup>9</sup> Naraha madija ohuahapa: —Najaridija -quinade. Naraha madija ohuahapa: —Najari jarahi. Pina najarissa najari -quinade. Naraha pohua attipa: —Jehe, ohuapi ohua -nade.

<sup>10</sup> Nadsapa pohuadsa huati toquinade: —¿Nejecoma tadsa tinocco ssire tajaro? -quinade. <sup>11</sup> Naraha pahuadenidsa huati tade: —Aja maqquideje oni Jeso quinajari

ssicarini inahatodsa onocco sse inajaropa. Nadsapa ohuadsa: “Ajicca passo Siroedsa tinocco ssahua tana” nadsa oqquedsippadsa onocco ssahua onadsapi onocco ssire tajaropa -nade. <sup>12</sup> Nadsapa pohuadsa huati toquinade: —

Naraha najari maqquidejepa ¿nejecohuajinaja?  
-quinade. Naraha: —Ssamo onani -nade.

*Marinaja onini pariseodsa jehe quinajarideni  
nocco ssire nimanihidsa huati huati toquinajari*

<sup>13-14</sup> Jesopa jodiodenicca jassinajacca huadadsa ssicarini inahatodsa madija nocco siri nocco ssire inanajari. Najaro jassinajacca huadadsa nama najarijine madijadenipa nocco ssire nimanihi iaccamanajaride, marinaja pariseodsa jehe quinajaridenihuaji. <sup>15</sup> Nadsapa najaridenina aja nocco ssire nimanihidsa huati toquinade: —¿Tia nejecoma tonanadsa tinocco ssire tajarotte? -quinade. Nadsapa: —Jehe, ssicarinidsa onocco sse inajaro. Nadsapi passodsa ssahua onadsa onocco ssire tarodija -nade. <sup>16</sup> Nadsapa pariseodeni mota attidenipa: —A, najari madijapa Dio icadossejarahi. Jassinajacca huadadsa: “Odsepe iijerana” najarahi -quinade. Naraha mota attidenipa: —Canahatori canadija bica tahi. Madija imasiri cajimanajaridenipa nama quina-jarahi -quinade. Nama quinadsapa Jeso tahimarijine carobemanajaride.

<sup>17</sup> Nadsapa nocco ssire nimanihidsa huati toquinapomade: —¿Tiapi nejecoma tani tinocco ssire tonanadedsap? -quinade. Naraha nocco ssire nimanihi attipa: —Ohuattipi Dio Atti comerabote, onajaro -nade.

<sup>18</sup> Naraha jodiodenicca taminedenipa Jesojine nocco ssire nimanihidsa: —¡Pajissa jarahitidija!

Nadsama nocco bicahiraha -quinade. Nadsapa nocco ssire nimanishi imehi imenidenitohui huahua quinade. <sup>19</sup> Huedajonadsapa pohuadenidsa huati toquinade: —¿Ajajaripa ticcadeni ejedenico? “Najaria nocco siri tossonahi” ¿tiquinajarottaqui? Naraha jidapapa nocco ssire tajarirana -quinade. <sup>20</sup> Nadsapa imehi imenidenipa huati toquinade: —Ajajaripa icca ejedeni nocco siri tossonajaride nahatoto inani. <sup>21</sup> ¿Naraha nejecoma nadsa nocco ssire tajari? Ssamomo inani. Pohua nocco ssire tonanade naco ssamomo inani. Pohuadsara huati tiquinaji, pohuapa ejedeni jarahi. Pohuana nahato tahi -quinade imehi imeni attideni.

<sup>22</sup> Aja imehi imenidenipa cappinamanajarijine: —Pohuadsara huati tiquinaji -quinajaride. Jodiodenicca taminedeni atti nahatoto tapoja najari. Aja madija Jesodsa: —Najaripa pajissa Cristo-Mesia -nadsapa ettajohuitohui. —Icca Dio Atti mamarihuaji qquedsimapoma-jarahijine -quinapoja najari. <sup>23</sup> Najaria imehi imeni attidenipa: —Pohuadsara huati tiquinaji, pohuapa ejedeni jarahi -quinajaripajade.

<sup>24</sup> Nadsapa jodiodenicca taminedeni nocco ssire nimanishi pohuadsa huahua quinapomade. Ccajonadsapa pohuadsa huati toquinade: —Diopa tetti mittahi. Pajissara iadsa huati tinaji. Iapi nahatoqquiri inani: Najari maqquidejepa imasiri jinede -quinade. <sup>25</sup> Naraha manaco huati tade: —Ohuapi ssamo onani. Imasiri cajihitide, caji-jarahitide. Ajijaro imana nahato onani ojarini. Tahidepi onocco siriraha jidapapi qqui onani -nade.

<sup>26</sup> Naraha pohuadsa denima huati toquinapomade: —¿Tia nejecoma tonanajari? ¿Nejecod-sara tinocco tonanabicajari? —quinade jodiodenicca taminedeni. <sup>27</sup> Naraha huati tapomade: —Nadsa huati onaporaha ohuatti timittamanajerajaro. ¿Nejecotohui ima huati huati omacca nanitohui tiquinajaro? ¿Tiadeni naqui pocca tiquejenanijinerane? —nade.

<sup>28</sup> Nadsapa jodiodenicca taminedeni huadiedsa nocco ssire nimanihi itamassomanadsa huati toquinade: —¿Tiapi najari maqquidejecca tiana! Naraha iapi Moisesicca mamari tabaqqui iquejenajonajaro. <sup>29</sup> Iapi Moisesidsa Dio huati tapojaripa nahatoqquri inani. Naraha najari maqquidejedsapi nahatoqquri inejerani. ¿Nejecoma nahiccatta? —quinade jodiodenicca taminedeni.

<sup>30</sup> Naraha nocco ssire nimanihipa huati tade: —¡A, ticcadeni ima jidsa tani! Pohua ccajonahihuaaji ssamoqquri tiquinaraha, pohuapa onocco ssire tonanajari. <sup>31</sup> Nahatoqquri inani: Aja madija imasiri cajijari attipa Dio mittajarahi. Naraha madija Diodsa dissera tajari, Dio jipa tahicca inanadsana pohua atti Dio mitahi. <sup>32</sup> Maittaccadsama dsama nahatoponid-sama maqquideje nocco siri tossonahi nocco ssire inanamanahi ima ihimittajona nejerajarode. <sup>33</sup> Nassa najari maqquideje Diocca jaradsapa ssamo tanaja —nade nocco ssire nimanihi atti.

<sup>34</sup> Nadsapa manaco huati toquinade: —Tiapi imasirima tissonaraha ¿nejecotohui iara ia mari

ticanabaqquijaro? –quinadsapa nocco ssire nimanahi mohua quinade: —¡Icca Dio Atti mamar-ihuaji tiqquedsimanipoma tejeraji! –quinade.

*Jesodsa pajissa quina-jarajaridenipa pina noccodeni sirissa quinajari*

<sup>35</sup> Jodiodeni poccodeni Dio Atti mamaridsa nocco ssire nimanahi qquedsimanipomajarahijine mohua quinahi Jeso mittajaride. Nadsapa pohua tedseje bacco tocanirepomadsapa pohuadsa huati tade: —¿Tiapi Madija Bedidsa pajissa taqui? –nade. <sup>36</sup> Naraha nocco ssire nimanahi Jesodsa huati tade: —¿Nejecojarina paja Madija Bedi? nani pohuadsa pajissa onanijine –nade. <sup>37</sup> Naraha Jeso pohuadsa huati tade: —Nadsa ohua qqui tinaha, ohuapi Madija Bedi ojani. Ohuadsa huati huati tinajaro –nade.

<sup>38</sup> Nadsapa nocco ssire nimanahi pohua nocco ssire tonanade baccohuaji pohua pitodsa huitta nadsa: —Jehe ohua Medsede, tiadsa pajissa onani –nade Jesodsa huatidsedsa. <sup>39</sup> Nadsapa Jeso huati tade: —Ohuapi ajijaro dsamadsa occajonajaro madija huapimacca ima cattede. Nahi noccodeni siripa noccodeni ssire onanabaqquidsa qqui toquinahijine. Naraha noccodeni bicahi qqui toquinajaridenipa noccodeni sirissa quinahijine –nade Jeso. (Jeso atti nama najaripa pohuadsa pajissa quina-jarajaridenipa pina noccodeni sirissa quinajari.)

<sup>40</sup> Naraha jodiodeni mota marinaja pariseodsa jehe quinajari nahidsa queriqquimanajarideni Jeso atti mittamanajari. Nadsapa Jesodsa

huati toquinade: —¿Naneje inocco sirirane? —quinade Jesodsa. <sup>41</sup> Naraha manaco Jeso pohuadenidsa huati tade: —Nassa tinoccodeni siridsapi ticcadeni imasiri nohueranito-huiraha “Iapi inocco bicani” tiquinadsapi ticcadeni imasiri tiadenidsa jiquejeraccani —nade Jeso.

## 10

### *Edede cacahuadecca ima*

<sup>1</sup> Nadsapa Jeso huati tapomade: —Pajissara tiadenidsa huati onajaro: Madijapa aja edede tadsaricca noccobijidsa toqquedsima-jaradsa noccobiji nohueranihuajina joppa todsimajaripa bobotide. <sup>2</sup> Naraha aja madija edede tadsaricca noccobijidsa toqquedsimajaripa edede cacahuade pohua. <sup>3</sup> Edede cacahuade edede tadsarihuaji bacco tadsapa pocca dodosse noccobiji icatabojidsa tani. Ededepa cacahuade atti mittamana tahi. Pocca edede onidenidsa huahua nadsapa iaqquenabaqqui tahi. <sup>4</sup> Nadsa pohuajine edede jahininedsa cacahuadepa tahide toja tahi. Ededepa pohuadeni cacahuade atti nahatoqquri nadsapa pohua natti jai toja tahi. <sup>5</sup> Naraha madija ohuaha nattipa jai tojera tahi. Atti jidsa tadsa, pohuadeni cacahuade attissa najaradsapa domo tocca tahi —nade Jeso.

<sup>6</sup> Jeso edede tahimari huati tajaripa pocca madija tahimari huati, pohua tahimari huati taraha nahidsa madija domo huajari mittamanaraha pohuadenidsa ssamo tajararo.

### *Jesopa edede cacahuade bicahi*

<sup>7</sup> Nadsapa Jeso madija mittamanahijine huati tapomade: —Pajissara tiadenidsa huati onana: Ohuapi edede tadsarihuajicca noccobiji ojani. Najaro noccobijidsapa edede jajahi tojedsima najari. <sup>8</sup> Ohua occajona-jeraccadsapi bobotidenina jahijonapojari. Naraha ededepa bobotidenidsa huaribodeni sibaqquri najari —nade Jeso.

<sup>9</sup> —Ohuapi noccobiji ojani. Madija ohuadsa jajahidsima najaripa tossiejehe cajimanahitohui. Pohuadenipa pina occa ededessa quinajari. Dsomepa edede pohuadeni tadsaridsa jajahi tojedsimani nadsa cacahuadepa nahidsa ehecahuabaqqui najari. Ssiajapa cacahuade eheqquenabaqqui najari, dsero bicani jipamanahijine. Ohuapi occa madija ohuacahuabaqquihissa tajari —nade Jeso.

<sup>10</sup> —Aja bobotidepa botihijine, toponi nanadsoqquehijine, toponi tonatabaccorahijinera ccajona tahi. Naraha ohuapi toponi tonassiajadera occajonajaro, madija bodidenidsa madie bicanicca cajimanahissa tahijine. <sup>11</sup> Ohuapi edede cacahuade bicahi. Edede cacahuade bicahipa pocca edededsa tossiejehe da ina tani. Pocca edede tocassiejerahijinepa pohuana pohua ccacora tahi. <sup>12</sup> Naraha madija ohuahapa manaconitohuira edede ecahuabaqquidsapa dsomaji ccajonahi qqui tadsapa edede inebobaqqui... joppa tahi caji tahi. Pohuapa edede jinede jarajari. Nadsapa edede inebobaqquidsapa dsomaji edededsa ssonaridsapa motapa tojaribaqqui tahi. <sup>13</sup> Aja edede cacahuade manaconitohuira tarabaidsa



najaripa edededsa huati huana tajarajarijine inebobaqqui tahi -nade.

14-15 —Naraha ohuapi edede cacahuade bicahi ojani. Nema onajaropi madija ohuadsa toquejenajaripa ohuacahuabaqquijari. Occa Abipa ohuadsa nocco jidsera tahi. Ohua naqui occa Abi Pohuadsa onocco jidsera tani. Najarossa najaro ohuapi occa edededsa onocco jidsera tajaro. Manaco occa edede ohuadsa nocco-deni jidseraqquri najari. Nadsama ohuapi occa edede tocassiejerahijinepa ohuana ohua ohuaccoranijine. <sup>16</sup> Edede ohuahadeni naco huapi taha ocajini. Aja tadsaricca jarahi. Najari-deni naco ohuaccani-baqquihijine. Pohuadenipa ohuattidsa iboraqquiri nahi. Nadsapa cacahuade ojariadsana queriqquihijine. Nadsapa ojariqquimanahitohui -nade Jeso. (Pohua atti nama najaripa madija jodio quejena-jarajarideni naco pohuadsa toquejenahijine.)

### *Jeso pohua dsoqquehicca ima*

17 —Ohua ohuaccoradsa odsoqqueraha occa camittehe ohuadsa tojapomanitohui. Najaro ima onananijine ibora onadsapi occa Abipa ohuadsa huati huana tajari -nade. <sup>18</sup> —Aji odsoqquejaro naqui madija ohuahajine jerani. Ohuana ohua ohuaccoradsa ohua inanadsoqque-mananitohui. Occa camittehe ohuaccoranijine opajirani. Occa camittehedsa bacco onanipomanijine naqui opajirani. Ajijaro dossenijipi occa Abijine -nade Jeso.

### *Ima inapamamanajaro*

<sup>19</sup> Nadsapa jodiodeni najaro ima mittamanad-sapa Jeso tahimarijine carobemanajaride.  
<sup>20</sup> Nadsapa mota huapima imahaha canade: —¿Nejecotohui pocca ima imittanijine? Satanacca dodosse tocorime cajijari. Pohua bodi tossamojaria -quinade. <sup>21</sup> Naraha madija motapa: —Madija tocorime cajidsapa atti nama najarahi. ¿Tocorimepa madija nocco siri nocco ssire inana taco? -quinade.

*Jodiodenipa Jesodsa huattajoqqiri najari*

<sup>22</sup> Dsadsajade bacco tadsapi Jesopa odsa panani Jerosaredsa madijari. Nahidsa madid-sapa jodiodenicca Dada toqquma Diocca tocajanipomajarrocca ejete bacco tade. <sup>23</sup> Nadsapa Jeso Diodsa dada toqqumacca boroni inidi tetepini cajini onini Portico de Saromodsa ccaridsajari. <sup>24</sup> Nahidsana jodiodenipa Jeso icahuahuanimanadsa huati icanaqquimanajaride: —¿Nejecoma nadsa ticca ima nahatoqqiri inanijine? Tiapi Cristo-Mesia tijadsapi iadsa tia tecomeranissa taji, inajaro -quinade.

<sup>25</sup> Naraha Jeso huati tade: —Nadsa huati huati ohonanaha. Naraha tiadenipi jehe tiquinejerani. Aji ohonahato najaropi occa Abicca deni tojehedsa ohonahato najaro. Aji occa nahatoniji qqui tiquinadsapi najarojinea aji occa ima nahatoqqiri tiquinajaropaji. <sup>26</sup> Naraha tiadenipi pajissa tiquinejerani. Occa edede tiquejena-jerajaro. <sup>27</sup> Occa ededepa ohuatti nahatoqqiri nahi. Manaco ohua naqui pohuadenidsa onocco jidsera tani. Pohuadenipa ohuadsa jahiridsajari. <sup>28</sup> Ohuapi pohuadenidsa

camittehe jiquejeranicca da onaridsajaro. Pohuadenipa paja dsoqquemanari-jarahitohui. Pohuadenipa ohuacahuabaqquihissa tajari. Odsepeccapa idinibaqquimana-jarahitohui.

<sup>29</sup> Aja ohuadsa toquejenajaridenipa occa Abina ohuadsa inanaridsajari. Occa Abina deni tojajari. Naraha huapima motadenipa ajamani toquejenahi. Abi pohua dsepedsa toquejenadsapa idinibaqquimana-jarahitohui. <sup>30</sup> Ohua occa Abi tedsejepi pina ojariassa inajaro –nade Jeso.

<sup>31</sup> Nadsapa jodiodeni siba nacca-cca quinapomade Jeso iquinaqqui-manahijine. <sup>32</sup> Naraha Jesopa pohuadenidsa huati tade: —Occa Abicca dacorehema madijadsa ima bicanira onanaridsajaro qqui tiquinajaroa. Naraha ¿neje-coma najaro occa nahatoniji acconi ohua tiquinaqquimananijine? –nade Jeso.

<sup>33</sup> Naraha jodiodeni huati toquinade: —Ticca nahatoniji bicani acconipi tiadsa edijerani. Naraha Diodsa tettipi oppina tajarojinena “Tia iquinaqquina” inajaro. Tiapi madija tijaraha “Dio ojani” teteje nadsa –quinade jodiodeni.

<sup>34</sup> Naraha Jeso pohuadenidsa huati tapomade: —Maittaccadsama Diopa madija ima cacattemade toquejenajaridenidsa huati tajari. Pohua Atti pohuadenidsa: “Tiadenipi diodeni tiquejenajaro, ohonanade” nahi nade Dio Pohua Atti dsodo naniccadsa. <sup>35</sup> Aji Dio Atti dsodo naniccadsa nahatoqquiri inani. Najaro-dsa: “Maidsehe” inanijine oppina tani. Diopa pocca dosseniji cajimanajaridenidsa huati tajari. Pohuadenidsa: “Tiadenipi diodeni” nahi nade

Dio. <sup>36</sup> Naraha Diopa ohua tocattejidsadsa ajijaro namidsa ohua dosse naronajari. “Ohuapi Dio Bedi ojani” onajaroraha ¿nejecotohui ohuadsa: “Tettipi oppina tani Diodsa” tiquinajaro? <sup>37</sup> Occa nahatohue pina occa Abijinessa nejeradsapi ohuadsa pajissa tiquinejeraji. <sup>38</sup> Naraha occa nahatohue pina occa Abijinessa nadsapi najarodsana pajissa tiquinaji. Ohuattidsa pajissa tiquinejeraraha nidsa tibodideni huatonissa tadsapi occa ima ahuato tanitohui. Abipa ohuadsa, ohuapi Abidsa, iapi pina ojarijarissa inajaro -nade Jeso.

<sup>39</sup> Nadsapa Jeso dama quinapomahitohuiraha toqquenadsa dsori tajaride.

### *Jeso toccanijari hueni Jordaohuaji*

<sup>40</sup> Nadsapa Jeso hueni Jordao jippehuaji toccanipomajari. Nahidsa Huano madija topa topa ihidsanabaqquipo nahidsa ibojaride. <sup>41</sup> Nahidsa madidsapa madija huapi taha Jeso qquide jai tojajari. Nahidsana Huano Baotista tahimari bodideni huatoma-manadsa imahaha canajaride: — Jehe, pajissa. Huanopa canahatori cana-jararaha pocca huatinajapi Jeso tahimari huati tapossa nadija -quinade.

<sup>42</sup> Nadsapa nahidsa Jeso pohuadsa madija huapi taha pajissa quinajaride.

## 11

### *Lasaro huatiajari*

<sup>1</sup> Odsa capamema najaro onini Betaniadsa madija coma taha madijari onipa Lasaro. Nanid-sapi Maria poni onihí Marta tadsajani madi-manajarode. <sup>2</sup> Najaro Maria Lasaro caripenepi majojodsa Jeso amori capamehe ssohoho icanaridsa poni tatini conanidsa amori sse sse ihippi najaro. <sup>3</sup> Nadsapa Lasaro coma tadsa caripenedeni Jesodsa ima dosse inajonamanagerode: —Pohuadsa teti huana tajaro coma tahi -quinade. <sup>4</sup> Najaro ima Jeso mittadsapa huati tajari: —Lasaro coma tajaripa paja dsoq-querihijine jarahi. Najaropi Diocca deni tojehe ahuato tanijine, Dio Bedicca deni tojehe naqui ahuato tanijine -nade. <sup>5</sup> Jesopa Martadsa, Mariadsa, Lasarodsa huati huana tajari. <sup>6-7</sup> Naraha Jeso —Lasaro coma tahi -mittadsapa nahi pohua madihidsa najocajari. Huada pamehe tossoñiqquimadsana Jeso pohua huatimadedeni iadsa huati tade: —Jina, Lasaro qquide jodio-denicca dsama Jodeahuaji jaijapomana -nade.

<sup>8</sup> Naraha pohuadsa huati inade: —Ia Maride, maittadsama onihima nadsa nahihuajicca jodi-odeni attidenipa: “Sibadsa tia iquinaqquina” quinade. ¿Nanihuaji ticcanipomanijinequi? ¡Paji, tidsoqquerana! -inade. <sup>9</sup> Naraha Jeso attipa: —Nohuerani. Huada ojarie maji ssiejene 12 horas cajijaro. Maji ssiejene ssiaja tadsa iccaridsadsapi emori doi cana-gerani, dsama ssiaja tajarojine. <sup>10</sup> Naraha dsomepi dsidsi tani. Dsome iccaridsadsapi emori doi cana tani -nade.

<sup>11</sup> Nadsapa denima huati tapomade: —Itesse Lasaro huadaraha huahua onadsa nocco tojahi-

tohui -nade. <sup>12</sup> Naraha Jesodsa huati inade: —Ia Maride, Lasaro huadadsapa nidsa tonomi-hitohui -inade. <sup>13</sup> Jesopa Lasaro huatiahicca imana huati taraha ssamoqquiri inadsapi: —Lasaropa huadajari -inajarode. <sup>14</sup> Imittanissa tejeradsapi Jeso iadsa huati nimanijaride: —Lasaropa huadahi onaraha huada-jarahi, huatiajari. <sup>15</sup> Naraha nanihuaji omadi-jeradsa huatiadsapa epeje, bica tani. Ohuatidsejaro. Nani tiadeni qqui tiquinadsa ohuadsa pajissa tiquinanijine. Jari, jidapanana nanihuaji jaijana -nade. <sup>16</sup> Naraha Tomas, pohua tessedeni pohuadsa: Baba quiquinanajaria iadsa huati tade: —Jina, ia naqui nani jaijana, pohuadsama ijica nana -nade.

*Jesopa nahatonie jinede camittehe jinede najari*

<sup>17</sup> Nadsapi odsa onini Betaniadsa bacco in-nipomade. Nanidsa bacco inanidsapi Jeso ima mittajaride: —Lasaro ppa idsamanahicca huadapi 4 nani -quinade. <sup>18</sup> Betaniapi odsa panani Jerosaredsa huajira tajaro, dsid-sidsamassa babacco. <sup>19</sup> Nema najaro jodi-odenipa Maria Martadenicca odsahuaji jajahi toja najari, huatinideni inassonabaqquimananijine. <sup>20</sup> Marta —Jeso ccajonahi -quinahi ima mittadsapi qquenadsa iaccanijine ccajonajaro. Naraha Mariapi nani odsa bodidsa ibojaro.

<sup>21</sup> Marta Jeso bacco inadsapa pohuadsa huati tade: —Ohua Maride, ajidsa timadidsapi ohue-mecote dsoqqe-jaranaja. <sup>22</sup> Naraha nema nehe Diodsa huati tinadsapi ticca huatinajassa

inananitohui nahato onani -nade Marta Jesodsa. <sup>23</sup> Naraha Jeso attipa: —Timecote nahatonihitohui -nade. <sup>24</sup> Naraha Marta huati tade: —Jehe, nidsa dsama jicadsa jicapojarideni huapima assiredenima Dio inahatonibaqquihitohui. Nahidsa Lasaro naco nahatonihitohui. Najaro imapi nahato onaponi -nade Marta.

<sup>25</sup> Naraha manaco Jeso Martadsa huati tade: —Ohuapi nahatonie jinede ojani. Ohuapi camittehe jinede ojani. Ohuadsa jehe quinadsapa jicaraha ojine camitemanimana-pomahitohui -nade. <sup>26</sup> —Ohuadsa jehe quinajaridenipa paja jicarihi najarahitohui. Jicaraha nahatonimanadsapa madimana-dsanapohuitohui. ¿Najaro imadsa pajissa taqui? -nade Jeso Martadsa. <sup>27</sup> Nadsapi Jesodsa huati tade: —Jehe ohua Medsede, nahato onani tiadsa. Tiapi Cristo-Mesia, Dio Bedi tijani, aji namihuaji ticcajonanitohui quiquinanapode -nade Marta.

### *Lasaro pohua noccobirihuaji Jeso ojijari*

<sup>28</sup> Nadsapi Marta Mariatohui odsahuaji toqquedsimanidsapi ahuatoranidsa Mariadsa huati tajaro: —Ia Maride bacco najonahi titohui huahua napaja -nani nade. <sup>29</sup> Maria ima mittadsapi totehema, qqquenadsa Jeso qqquide ccajonajaro. <sup>30</sup> Jesopa ponidenicca odsahuaji bacco tajaracchahi. Nahi Marta poni bacco inahidsa madiccade. <sup>31</sup> Jodiodeni Maria poni huatini inassonamananijine ponicca odsadsa queriqquimanajaridenipa toccani qqqui toquinadsapa nattini jahijonajaride, —Lasaro cahuahihuaji ojide toccajaro nitide -quinadsa.

<sup>32</sup> Naraha Maria Jeso huahihuaji bacco nadsapi poni pitonidsa huitta nadsa pohuadsa huati tade: —Ia Medsede, ajidsa timadidsapi nassa ohuemecote dsoqque-jaranaja -nade.

<sup>33</sup> Nadsapa Jeso Maria oji oji nani qqui, jodiodeni ponidsa jahijonajarideni oji quinahi qqui tadsapa bodi qquedsajaride. <sup>34</sup> Nadsapa Jeso pohuadenidsa huati tade: —¿Nejecohuaji tequibedsamanatta? -nade. Nadsapa: —Jina, qqui tajo -quinade. <sup>35</sup> Nadsapa Jeso ojide. <sup>36</sup> Nadsapa jodiodeni: —A, pajissa Lasarodsa huati huana tajariraha -quinade. <sup>37</sup> Naraha jodiodeni motapa imahaha canade: —Jesojinepa nocco jijirade nocco ssire nimanide. Jeso ajadsa madidsapa nassa Lasaro dsoqque-jaranaja -quinade.

### *Lasaro nahatonijari*

<sup>38</sup> Naraha Jeso bodi qquedsapomadsapa Lasaro noccobirihuaji toqquessijari. Pohua noccobiripi ssono bacconidsa tohuajarode. Noccobiridsapi siba huacossajaro. <sup>39</sup> Naraha Jeso: —Siba cco tijidsamanaji, tohuabanijine -nade. Naraha aja dsoqquejaricca asi Marta attinipi: —A, ia Medsede, pohua dsoqquehicca huada 4 najaro. Bettene jirahi -nade. <sup>40</sup> Naraha Jeso attipa: —Tiadsa huati huati onapode. ¿Timittajerajarottarane? Pajissa tadsapi Diocca deni tojehe qqui tinanitohui, ohonanade -nade Jeso.

<sup>41</sup> Nadsapi siba cco ijidsamanade. Nadsapa Jeso memehuaji tocattamacossa nadsa huati tade: —Abi, ohuatti timittadsapi epejeni bica tani, onajaro. <sup>42</sup> Huajjiradsa ohuatti titimitta



nani nahato onaraha ajadsa madija madimanagerideni ohuadsa: “Pajissa Diocca dosse naronaniji” quinahijine tiadsa nema onajaro -nade. <sup>43</sup> Nadsapa Diodsa huati taha jicadsapa jad-sirema huahua nade: —¡Lasaro tiqquenaji! -nade. <sup>44</sup> Nanaja Lasaro huatiaraha Jesojine camittemanidsa qqquenade. Assire eterodsa jore tamarohua nama naha qqquenade. Pano naco eterodsa teppe nade. Nadsapa Jeso: —¡Dicca tiquinajo, toccanihijine! -nadsa nama inanamade.

*Jeso todsepe tojahijine ima najoramanajari  
Mateo 26.1-5; Maraco 14.1-2; Roca 22.1-2*

<sup>45</sup> Nadsapa jodiideni Mariadsa queriqquimanajari motapa Jesojine Lasaro camittemanihi qqqui toquinadsa Jesodsa pajissa quinade. <sup>46</sup> Naraha motadeni Jesodsa jiperaqquri najaridenina marinaja pariseodsa jehe quinajaridenihuaji jai tojajari. Jesojine Lasaro camittemanihicca ima pohuadenidsa huati toquinajari. <sup>47</sup> Nanaja pariseodeni, dada toqquimade taminedenipa najaro ima mittamanadsapa poccadeni ima cacattemadedeni deni toquejenajaridenidsa huahua quinajari, pohuadenidsa queriqquimanahijine. Queriqquimanadsapa pohuadenidsa huati toquinajari: —¿lapi nejecoma inapadseje? Jeso canahatoriri canahi. Pocca deni tojehe ahuato tani -quinahi nade. <sup>48</sup> —Naraha Jeso nama dsanapohuijine inebodsapa huapima pohuadsa pajissa dsanapomanahitohui. Nema nadsapi icca dada toqquimahuajipi romanodeni

botta icanamananitohui. Icca dsamacca icca cacahuehe inajicamananitohui –quinahi nade.

<sup>49</sup> Naraha ima cacattemadedeni ojaria onipa Caipa, najarina najari huajanodsa dada toqquimadedenicca tamine deni tojajari madijari. Pohnuapa huapimadsa huati tajari: —¡Tiadenipi ssamoqquiri tiquinani! <sup>50</sup> Tibodidenidsa ajijaro ima ahuato tejerani: Madija ojaria huapima manaconedeni dsoqquehina bica tahi, ia icca dsamacca huapima naco inajicamana-jeranijine –nahi nade Caipa.

<sup>51</sup> Naraha najaro imapi Caipa pohua motacca jerani. Pohnuapa dada toqquimadedenicca tamine deni tojajarijine Dio Corime pohnuadsa huati tajari. Caipa pohua attidsapi Jeso tahimari iadsa ahuato tajaro. Najaroa aji Jesopa pocca madija jodiodeni huapima tocassiejerahijinepa dsoqquehitohui. <sup>52</sup> Naraha Jesopa jodiodeni pohnuadeni motta manaconedeni tojahijine jarahi. Huapima Diocca madija madiridsamanajarideni manaconedeni naco tojahijine. Nadsapi Diocca ejedeni madiridsamanajarideni ijariqquinnessa tanijine.

<sup>53</sup> Nadsapi najaro huadadsa, aja Caipa atti: —Jehe dsoqquehi bica tahi –nadsa ima cacattemadedeni huapima Jeso dsoqquehijinecca ima idimamanapodsapa ima najoranijine imahaha imahaha cadsanapojari.

<sup>54</sup> Jeso ima nema nani mittadsapa jodiodeni madimanahihuaji ahuatonidsa ccaridsade jipera tajari. Nadsapa Jodeahuaji nebo, odsa onini Efrainhuaji madihijine toccajaride. Efrainpi

dsama huamoni ssono caji, siba caji tani huajira tanidsa anijarode. Nanidsana ia pohua huatimadedeni Jeso tedseje imadijarode. <sup>55</sup> Nanidsa imadidsana jodiidenicca ejete imenibote onini Pascoa tohuajirajarode. (Pascoa etidsapi: Dio tossoiqquimajari, inajaro.) Nahi Jerosaredsa madija dsama onihicca, dsama onihicca jahijonana canajari. Diodsa da quinahijine queriqquini-pomajari, ejete Pascoatohui najoramapohuijine. <sup>56</sup> Madija —Jeso qqui inana —quinadsapa Jesotohui qqui naridsamanajari. Diodsa dada toqquimadsa naco pohuadenira huati tocanirere canajari: —¿Ejetedsa Jesopa ccajona-jarapadsaja? —quinahi nade.

<sup>57</sup> Naraha pariseodenipa dada toqquimade taminedeni tedseje attideni najoramapoja najari: —Jeso qqui tiquinadsapa iadsa huati tiquinana, nahi dama inahijine —quinajari nade.

## 12

*Jeso amori majojodsa Maria sso icanarijaro  
Mateo 26.6-13; Maraco 14.3-9*

<sup>1</sup> Jodiidenicca ejete onini Pascoa tohuajirajonadsa huada 6 nehe dsori taccadsapi Jeso inadsa odsa capamema najaro onini Betaniadsa bacco inanipomade. Nahidsapa Lasaro madijari. Pohuapa dsoqqueraha Jeso pohua inahatonijaride. <sup>2</sup> Nahi Betaniadsana Jeso jipahijine najoramajari. Lasaro caripene Martapi dsamatapa qquerode tojajaro. Lasaropa huahuanarihuaji jassi tarijaridenidsama Jeso tedseje jipamanajaride. <sup>3</sup> Naraha Lasaro caripene onihi Mariapi

majojo majoni bica tajarodsa Jeso amori sso-hoho icanarijaro. Najaro majojo oninipi nardo. Najaro majojopi passodsa quejemerani, huatini ccara tani. Nadsapi poni tatini conanidsa amori sse ippijaride. Odsa bodidsa majojo majoni tocca nade.

<sup>4</sup> Naraha Jeso huatimade ojaria Joda Iscariote Jeso ccaccorade tojahijine pohua attia: <sup>5</sup> — ¿Nejecotohui najaro majojopi manaconitohuira da icana-jerajaro? Najaro majojo manaconidsa da icanadsapi dsiniro ccarara 300 denario iadsa da inadsa madija cappiramanajaridenidsa da iqquimanitohuiraha -nade Joda.

<sup>6</sup> Joda atti nama nadsapa pina cappiramanajaridenidsa huati huana tajarissa naraha pohuapa dsinirotohuira bodi huatojari. Pohuana botijide rajari. Pohuadeni huapimacca dsiniro pohuana ecahuaraha motapi pohuadsa ihinana najaro. <sup>7</sup> Naraha Jeso attipa: —Epejina, poni sso icanarijaro bica tani. Najaropi pina odsoqquedsa ohua nema inanamanadsa ohua ppa idsamananijinessa najaro najorapojaro -nade. (Jodiodenipa poccadeni madija dsoqquedsapa nama quiquinanajari.) <sup>8</sup> Nadsapa Jeso denima huati tajari: —Madija cappiramanajaridenina tinoridenidsa madimana-dsanapohuitohui. Naraha ohuapi tiadenidsa omadidsanapojeranitohui -nade Jeso.

—*Lasaro naco dsoquena -quinajari*

<sup>9</sup> Jeso Betaniadsa bacco nanipomahi jodiodeni mittamanadsapa mota huapi taha Jeso qquide jahijonajari nade. Jeso qquidea ojari-jarahi.

Lasaro qquide naco jahijonajari. Lasaropa Jeso pohua inahatonija najari. <sup>10-11</sup> Lasarocca imajine jodiodeni motapa Jesodsana pajissa quina-jari nade. Nama quinadsapa Diodsa dada toqquimahuajicca taminecca imadsa apaja quina-jari. Nadsapa dada toqquimade taminedeni attipa: —Lasaro naco dsoqquena —quinahi nade.

*Jeso Jerosaredsa bacco todsimadsapa huapima pohuadsa huatidsemanajari*

*Mateo 21.1-11; Maraco 11.1-11; Roca 19.28-40*

<sup>12</sup> Nadsapi ejete onini Pascoatohui madija dsama onihi onihicca naco Jerosarehuaji jahijonana canajari. Huada ssiajapa ima mitta-manajari: —Jeso aja Jerosaredsa bacco nabote nahi —quinadsa huatidsemanajari. <sup>13</sup> Nadsapa poccadeni huatidsehe bica tanijine birijari eppe ti quinadsa —Jeso bacco ijidsana —quinadsa jahijonajari. Madija motapa birijari eppedsa jahui bina inajonamanajaro, —Jahui bica tanijine —quinadsa. Madija motapa birijari eppe dsojojo dsojojo canajonadsa huahua najonamanajari: —¡Diopa deni tojahi, deni tojahi! ¡Ia Medsede onima ccajonajaridsa biquehera tojana, tojana! —najonamanajari. —¡Pohuapa ia Isaraeri potemahideni icca tamine! ¡Pohuadsa biquehera tojana, tojana! —najonamanajaride.

<sup>14</sup> Jesopa jahuidsas bojo namidsadsa qqui tadsapa najaridsa tohuittari-dsanapojaride. Najaropi pina Dio Atti cacomerabote Sacaria dsodo inapojarossa najarode:

<sup>15</sup> —Odsa panani Siohuaji timadimanajaropi ticappinamana tejeraji.

Ajana ticcadeni taminepa bojo namidsadsa  
napidsatidsa bacco najonahitohui

-napojaro Dio Atti dsodo nanidsa.

<sup>16</sup> Najaro imapi Dio Atti dsodo napojarodsa  
ahuato taporaha tahide ia pohua huatimadepi  
ibodidsa ima ahuato tejeraccade. Dsotodena  
Jeso porimacossanidsa dsoqquedsa nahatonih  
nattina Dio Atti dsodo napojarocca ima ibodidsa  
ahuatomajarode. Nadsana ettipi: —Jehe, nema  
najaropi Jeso pohuadsana tojani qqui inapode  
-inajarode.

<sup>17</sup> Madijapa Lasaro ppa todsaraha Jeso huahua  
nadsa nahatonijari qqui toquinajaridenipa po-  
hua tahimari huati nimanimana-pomajaride.

<sup>18</sup> Nadsapa madija huapimapa: —Jeso jahuidsa  
bacco ijidsana -quinadsa Jesotohui jahijonajari.  
Pohuadenipa —Jeso canahatori canahi -quinahi  
ima mittamanapoja najari. <sup>19</sup> Naraha jodiodeni  
mota marinaja pariseodsa jehe quinajaridenipa  
pohuadeni ehuerahi imahaha canajari nade: —  
Ajina, iapi ijoneridsani taji. Pohuaha deni tojahi.  
Madija huapima pohuadsa toquejenahi -quinahi  
nade.

*Dsama Cresiahuaajicca madijapa: —Jeso qqui  
inana -quinajari*

<sup>20</sup> Dsama Cresiaccia madija sibera taha naco  
Jerosaredsa bacco najonamanade. Najarideni  
naco Pascoacca ejetedsa Diodsa huatidsemanahi-  
jine jahijonajaride. <sup>21</sup> Jeso huatimade Feripe  
bacco quinadsapa pohuadsa huati toquinajari.  
Feripepa dsama arobeni Carireacca madija.  
Odsa Besaidadsa madijari. Nadsapa pohuadsa

huati toquinajari: —Jeso qqui inana -quinahi nade. <sup>22</sup> Nadsapa Feripe pohua tesse Adiritohui toccajari, Cresiadenicca ima huati tahijine. Nadsapa Jeso madihihuaaji ima huatide tohuedajari.

<sup>23</sup> Nadsapa Jeso pohnadenidsa huati tajari: —Aji ohuapi Madija Bedi ojajaroa occa deni tojehe ahuato tanijinepi tohuajirani -nade. <sup>24</sup> —Jehe, pajissara tiadenidsa huati onajaro: Aroso jidsadsa trigo nocco namidsa dappo tiquinadsapa imepa bote tahi. Nocco namidsa tojadsa moro tahijine accora tadsapa pohua ime boteraha bodicca moro tajarina nocco tohuapi tahi. Naraha nocco pohua ime acco tadsapa bodicca moronine-jarajari -nade. <sup>25</sup> —Madija naco pocca madie ajijaro namiccadsa huati huanera tadsa ohuadsa eccoradsapi Diohuaji camittehe jiquejeranicca cajidsanapohuitohui. Naraha madija pocca madiedsa huati huana tadsa ohuadsa acco tadsapa camittehe jiquejeranicca caji-jarahitohui. <sup>26</sup> Madija occa dossenijidsa iboraqquri nadsapa ohua nebomana-jarahijine. Ohuadsa jahiridsa-dsanapohuijine. Ohua omandinidsana pohnadeni naco madimanahijine. Madija occa dossenijidsa iboraqquri najari-denipa Abi Dio Pohnana pohnadenidsa: “Bicaqquri tiquinani” nahitohui -nade Jeso.

*Jesopa: —Odsoqquedsana ima bicani tojarid-sanitohui -najari*

<sup>27</sup> Amadsati Jesodsas ocasserehe ssonaridsa pohua attipa: —¡Jaho, ojabojeriri canani! ¿Nejecomana onanijine? “Abi, ajijaro ima bacco tabote nani ohua tinassiajaji” ¿onanijinequi? Naraha

ohuapi ajijaro imatohui occajonajarode. <sup>28</sup> ¡Abi, ticca deni tojehera ahuato tana! –nade. Naneje memehuaji atti mittaronade: —Ohuapi occa deni tojehe ahuato onanapode. Jidapana naqui occa deni tojehe ahuato onanapomanijine –nade atti memehuaji. <sup>29</sup> Nadsapa nahidsa madija domo huajari huapima mohuini mittamanadsapa: —Ttottorode –quinaraha motapa: —Dio Atti ccacaronade pohuadsa huati huati tajari –quinade.

<sup>30</sup> Naraha Jesopa: —Najaro mohuinipi ohua omittanijine jerani. Tiadeni timittamananijine mohuini mittaronajaro. <sup>31</sup> Ajijaro dsamacca ima tabaccora tadsapi Dio idsahua-baqquihitohui. Najidsohue naqui najorahitohui. Ajijaro dsamacca tabaccorehe dodossede Satanapa huahuattajo tojahitohui. <sup>32</sup> Naraha nidsa madijajine que onadsana madija huapimapa ohuadsana toquejenahitohui –nade Jeso. <sup>33</sup> Najaro ima Jeso huati tadsana ahuatomajarode, pohua ahua porimacossanidsa dsoqquehicca ima.

<sup>34</sup> Naraha madija ohuaha attidenia: —Icca Dio Attidsa hua inadsapi “Mesiapa madi-dsanapohuitohui” nanipi imittade. Naraha tiapi: “Madija Bedi acca icanamacossa-manadsapa que tahitohui” teteje naha. Nadsapa ¿nejecoma najarina Madija Bedi? –quinade.

<sup>35-36</sup> Naraha Jeso attia: —Ohuapi ssiajani ojani. Ossiejene tiadenidsa ahuato taccani. Naraha tiadenidsa badsira tehe omadiccani. Tiadenidsa omadiccadsama ohuadsa jehe tiquinaji, ohuadsa tiquejenanijine. Najaro imapi ssiaja taccadsama



jai tijaridsaji. Nani dsidsinijine tijabojomana ne-  
jeranijine. Aja madija dsidsinidsa ccaridsadsapa  
pohua jahine ssamo tahi -nade.

Najaro ima Jeso huati huati taha jicadsapa  
pajamarahihuaaji toccajari, madija pohua qqui  
toquina-jarahijine.

*Jodiodeni motapa Jesodsa pajissa quina-  
jarajari*

<sup>37</sup> Jodiodenipa pohuadeni noccodsa Jeso  
canahato-huajapohui canaridsahi qqui  
toquinaraha pohuadsa pajissa quina-jarade.

<sup>38</sup> Nama quinajaripa pina Dio Atti cacomerabote  
Isahia dsodo inapojarossa inanamanajaro.  
Isahia attipa:

—A, ia Medsede, icca imadsa pajissa naja cama-  
jarahi. ¿Nejecojaridenidsana Diocca da-  
corehe ahuato tapadseje? -napohui nade.

<sup>39</sup> Jehe, jodiodenipa Jeso canahato-huajapohui  
canahi qqui toquinaraha pajissa quinahijine bo-  
dideni ssamoqquiri nade. Isahiapa poccadeni  
ima onihi naqui dsodo inapojaro:

<sup>40</sup> —Diopa noccodeni ecosabaqquijari, qqui  
toquina-jarahijine.

Diopa bodideni inassamobaqquijari,  
tohuattamana-jarahijine.

Dio Attipa: “Bodideni cacajiqquimeradsapa  
onabicabaqquihitohuiraha bodideni  
cacajiqquimera-manaha najarahi”

—napohui nade Isahia dsodo inapojaro.

<sup>41</sup> Isahiapa Jesocca deni tojehe qqui tapodsapa  
tahimari dsodo inapojaropaji.

<sup>42</sup> Naraha jodiodenicca taminedeni motapa Jesodsa pajissa quinaraha marinaja pariseodsa jehe quinajarideni noppine pohuadeni cacomamanajari, —Icca Dio Atti mamarihuaji ia tohuattajobaqqui-manarana –quinadsa.

<sup>43</sup> Pohuadeni bodipa: —Madija iadsa huatidsemanana –quinajari. Dio pohuadenidsa huatidsehijine tohuini quina-jarajari.

*Jeso attidsa iboqqiri najaridenipa najidsohuedsa toquejenahitohui*

<sup>44</sup> Nadsapa Jeso jadsirema huati huati tade: —Ohuadsa pajissa najaripa ohuadsaha pajissa nahi ojari-jarahi. Occa Abi ohua dosse naron-ajaridsa naco pajissa najari. <sup>45</sup> Madija ohua qqui tajaripa ohua Dosse naronade naco qqui tahi. <sup>46</sup> Ohuapi ssiajani jinede ojani aji namihuaji occaronajaro, ohuadsa pajissa quinajaridenipa dsidsinidsa madimana-jarahijine. <sup>47</sup> Naraha madija ohuatti mittamanaraha pina ohuatti mittamanerahi najarideni naco odsahuabaqqui-jarahi. Ohuapi madija dsahuade occaronajerade. Madija tocassiejerahijinera occaronajarode. <sup>48</sup> Madijapa ohuadsa huattajoqqiri najari. Ohuatti mittamanaraha iboqqiri nadsapa dsama jicadsa Abi Dio imasiri manaconi huatide tojadsapa pohuadenidsa ajama nahitohui: “Tiadenipi occa ejedeni atti mittade jiperaqqiri tiquinadsapi najidsohue jiquejeranicadsa tiquejenanitohui” nahitohui. <sup>49</sup> Naraha ohuapi ohua mottacca ima huati huati ohona nejerani. Abi ohua Cadossedena: “Ajima najaro ima mari ticanabaqquina” nadsa huati huati onajaropaji.

<sup>50</sup> Naraha ohuapi nahato oneje najaro. Abi pocca dossenijipi camittehe jiquejeranicca. Aji huati huati onajaropi Abi ohua cadossejaricca –nade Jeso.

## 13

*Jeso pohua huatimade amorideni ssahua in-abaqquijari*

<sup>1</sup> Pascoacca jipacqueie tojanijine huada ojarie dsori taccaraha Jesopa pohua tedsejemacca ima nahato tapojari: ajijaro namidsa madide nebohujinecca huada bacco tabote nani. Ajijaro nami inebodsa Imehihuaji tojanipomahijine. Jesopa pocca madija ajijaro namidsa madimanageridenidsa huati huana taha nama najonajaria pohua dsoqquehi bacco tajaripajade.

<sup>2</sup> Dsome ijipanijine inajoraraha tahide imasiri mamaride Satanajine Simon Iscariote bedi Joda bodi najorajari, Jeso todsepe inannahijine.

<sup>3</sup> Jesopa Dio Pohuahuaaji ccaronahicca nahato, Diohuaaji toccamacossani-hijinecca nahato, Pohua Imehicca deni tojehe cajihi naco nahato tajari. <sup>4</sup> Najaro pocca deni tojehecca ima iat-tanijine ia mari tocanabaqquijaride. Jipade iquejenanaja Jeso toتهمadsapa pocca etero huapiccapi ssiti inadsa tohuamori ssessera pohua dorodsa ssoque inade. <sup>5</sup> Nadsapa tasao imehidsa passo sso idsadsa pohua huatimadedeni ia emori ssahua tabaqquijaride. Nadsapa pohua dorocca etero ssoque nacossajarodsa emori sse tabaqquijaride.

<sup>6</sup> Naraha Ssino-Pedro amori ssahua inahijineraha: —Ohua Medsede ¿ohuamori ssahua tanijinequi? —nade. <sup>7</sup> Naraha Jeso attia: —Aji jidapana temorideni ssahua onaridsajarocca imapi ssamo tinaraha nidsa dsotodena timittan-itohui —nade. <sup>8</sup> Naraha Pedro attipa: —¡Ohuapi poni! Ohuamori ssahua taji onejerani —nade. Naraha Jeso attipa: —Temori ssahua onejerad-sapi occa tija-jeranitohui —nade. <sup>9</sup> Naraha Ssino-Pedropa: —¡Ohua Medsede ohuamoria ojari-gerana, odsepe ssahua, otati ssahua taji! —nade. <sup>10</sup> Naraha Jesopa pohuadsa huati tade: —Japi id-satipi huire inajaro, ia ssahua imanipoma-gerani. Naraha emorina ssahua ssahua ihimani nani-jine —nade. —Tiadenipi tibodideni huireqquiri naraha huapima jerani —nade Jeso. <sup>11</sup> Jesopa pohua ccaccorade nahato tapoja najari. Najaria aja: —Huapima huireqquiri tiquinejerani —najaripajade.

<sup>12</sup> Emori ssahua tabaqquia jicadsapa pocca etero huedsapomadsa huahuanaridsa tohuittarinide. Nadsapa iadsa huati tade: —¿Aji temorideni ssahua onaridsajarocca imapi nahatoqquiri tiquinaqui? <sup>13</sup> Tiadenipi ohuadsa huahua titiquina nanipi: “Ia Maride, ia Medsede” titiquina najaropi pajissa. <sup>14</sup> Nema onajaroa ohuapi tiadeni Medsede, tiadeni Maride ojaraha pina ticcadeni medsessa onadsa temorideni ssahua onaridsajaro. Najaropi tiadeni naqui temorideni ahuaji ssahua ahuaji ssahua tataridsamana nana. <sup>15</sup> Ajijaro marinajapi tiadeni mari ocanabaqquijaro. Pina aji ojinessa tinanamananijine, onajaro. <sup>16</sup> Jehe,

pajissara tiadenidsa huati onajaro: Madija pocca medsedeni pa pohuadeni medsededsa deni toquejena-jarajari. Pohuadeni pa ajamani toquejenajari. Madija pocca dodosse tabaqqi naco pohuadeni dossededsa deni toquejena-jarajari. Pohuadeni pa ajamani toquejenajari.  
<sup>17</sup> Nadsapi ajijaro ima timittamananissa tadsa nema tinanamanadsapi tetidsemananitohui, onajaro.

<sup>18</sup> —Ajijaro imapi tiadeni huapimadsa huati onejerani. Ohuapi nahato onani. Aja ocattejidsa-baqquijaripa occa toquejenahitohui. Naraha pina Dio Atti dsodo napojarossa nehe tojanitohui: “Ohuadsama jipa jipa najarina ohuadsa ima inananihitohui” napojararo Dio Atti dsodo nanipi. <sup>19</sup> Najaro ima ohuadsa toja-jeraccadsama tiadenidsa huati onapojaro. Nidsa najaro ima tojani qqii tiquinadsapi ohuadsa pajissa tiquinanihitohui. Ohuapi ohua -nade Jeso. (Pohua atti nama nadsapa: Ohuapi Dio, najari.) <sup>20</sup> —Pajissara tiadenidsa huati onajaro: Madija occa dossenijidsa jahiridsajaridenidsa: “Jai tijedsimaji” quinadsapa pina ohuadsa: “Tiqquedsimaji” quinajarissa najari. Madija ohuadsa jehe quinadsapa ohua cadossejaridsa naco jehe quinajari -nade Jeso.

*Jesopa pohua Joda eccorahijinecca ima ahuato inanapojaro*

*Mateo 26.21-25; Maraco 14.18-21; Roca 22.21-23*

<sup>21</sup> Jeso ima huati taha jicadsapa bodi qquedsajari. Ima ahuato inananihitohui huati tajari: —

Pajissara tiadenidsa huati onana: Aji tiadeni ojariapa ohua ccaccorahitohui -nade.

<sup>22</sup> Nadsapi pohua huatimadedeni iara qqui icanirere canade. —¿Nejecojaridsa Jeso atti nama najari? -inade. <sup>23</sup> Nadsapa pohua huatimade ojaría Jeso pohuadsa huati huana tajaria pohua inoridsa jipajaride. <sup>24</sup> Nadsapa Ssino-Pedro aja Jeso inoridsa huittaríjaridsa pohua dsepedsa: —¿Nejecojaridsa atti nama najari? huati ticanajo -nade. <sup>25</sup> Nadsapa aja Jeso inoridsa huittaríjaripa Jesodsa huajira tadsa pohuadsa huati tade: —¿Nejecojarí? -nade Jesodsa. <sup>26</sup> Naraha Jesoa: —Aja pan arobe bani ppejenedsa ohuedsippa pohuadsa da onana. “Najaripajaha” tiquinanjine -nade. Nadsapa pan arobe edsippa, Simon Iscariote bedi Jodadsa da inade. <sup>27</sup> Nadsapa Joda pan arobe idija, pohua bodidsa Satana jaro nade. Nadsapa Jeso Jodadsa huati tade: —Aji “ima onanana” tajaropi amadsati tinanaji -nade.

<sup>28</sup> Naraha huapima jipade jassi inaríjaropi aja Jeso Jodadsa huati tajari imittaraha ibodi ssamoqquiri inade. —¿Nejecotohui nama najari Jesopa? -inade. <sup>29</sup> Jodapa icca dsiníro cacahuadeja najari. Naraha itesse mota attidenipa: —Jehe, ejetejinecca mittade Jeso dosse inajari itide. Cappíramanajaridenidsa da taníjine toccajari itide -quinade.

<sup>30</sup> Nadsapa Joda pan jipaha jicadsapa dsomeraha toccade.

*Jesocca dosseniji dsati*

<sup>31</sup> Joda toccahi nattipa Jeso huati tade: —Ohuapi Madija Bedi ojajaroa jidapanana occa deni tojehe qqui tiquinanitohui. Diocca deni tojehe naqui ohuadsana ahuato tanitohui. <sup>32</sup> Diocca deni tojehe ohuadsa ahuato tadsapi manaco Dio occa deni tojehe ahuato inanani-tohui. Najaropi bacco tabote nani. <sup>33</sup> Occa ejedenideni, jidapapi tiadenidsa omadinijine huada huapi tejerani. Ohua nohue ojiradsapi tiadenipi otohui qqui taridsamananitohui. Najaropi maitta tahide jodiidenicca taminedenidsa huati onajarossa najaro tiadenidsa huati onajaro. Ohua occanihuajipi jai tijanijine ssamo-qquiri tiquinani. <sup>34</sup> Nadsama ajjaropi occa dosseniji dsati: Tiadenipi tetideni cahanerara canana. Pina aji ohua tiadenidsa ohuati huana tajarossa najaro tiadeni naqui ohuadsa pajissa quinajaridenidsa tetideni huanaqqquiri nana, onajaro. <sup>35</sup> Pajissa tetideni cahanerara canadapi ticcadeni ima aji occa madija tiquejenani madija huapimadsa ahuato tanijine -nade Jeso.

*Pedro pohua namaidshicca ima Jeso ahuato inanapojaro*

*Mateo 26.3-35; Maraco 14.27-31; Roca 22.31-38*

<sup>36</sup> Naraha Ssino-Pedropa Jesodsa huati tade: —Ia Medsede ¿nejecohuaji ticcanijine? -nade. Naraha Jeso Pedrodsa huati tade: —Aji ohua occanihuajipi jidapapi ohuadsa tiqqejeranitohui. Naraha dsotodena omadinihuaji ticcanitohui -nade. <sup>37</sup> Naraha Pedropa Jesodsa huati tapomade: —Ia Medsede ¿nejecotohui jidapapi

tiadsa oqquejeranijine? Naraha tissiajanijinepi ohuana onajorani, ohua ohuaccoranijine -nade. <sup>38</sup> Naraha Jeso Pedrodsa huati tade: —¿Pajissa ossiajanijine tia teccorapadseje? Naraha ohuapi pajissara tiadsa huati onajaro: Nidsa dsotodepi tacara huahua najaraccadsa tia tinamaidsanitohui. Ohuadsa: “Onocco jidsa tani” tanitohui, “onocco jidsa tani” tapomanitohui, “onocco jidsa tani” tapomanitohui -nade Jeso Pedrodsa.

## 14

*Jesopa: —Jahui ojani. Ojinena Abidsa bacco bacco toquinahijine -najari*

<sup>1</sup> Nahi dsotodepa Jeso iadsa denima huati huati tade: —Tibodidenidsa ticappinamana tejeraji. Diodsara pajissa tiquinanissa taji. Ohuadsa naqui pajissa tiquinanissa taji. <sup>2</sup> Occa Abicca odsahuaji timadimananijinepi mamadi caji tani. Timadimananijine mamadi nohueradsapi nassa tiadenidsa huati onaponeje onade. Nadsama ohuapi ticcadeni mamadi onanajoranijine Abihuaji occaninitohui. <sup>3</sup> Abihuaji occanidsa ticcadeni mamadi onanajoradsapi titohuideni occaronapomanitohui. Nadsapi ohua ohomadi nanidsa tiadeni naqui timadimananijine tiadeni ohuaccani-bagquinitohui. <sup>4</sup> Tiadenipi aji occanihuaji ojahine nahatoqquri tiquinani -nade Jeso.

<sup>5</sup> Naraha Tomas attia: —Ia Maride ¿nejecohuaji ticcanijine? Najaro imapi ssamoqquri inani. ¿Nejecoma nadsa najaro tijahine nahatoqquri inanijine? -nade. <sup>6</sup> Naraha Jeso huati tade: —Ohuapi jahui ojani. Ojinena



madija Abidsa bacco toquinahijine. Ohuapi pajissehe jinede ojani. Ohuapi camittehe jinede ojani. Nassa ohua nohue ojiradsapi madijapa Abidsa bacco toquina-jaranaja. <sup>7</sup> Ohuadsa tinocodeni tojidseradsapi occa Abidsa naqui tinocodeni tojidseranitohui. Aji jidapana ohua qqui tiquinajaropi Abidsa tinocodeni tojidserajonajaro -nade.

<sup>8</sup> Naraha Feripe attipa: —Ia Maride, jari, icca Abi ia qqui tinanabaqquiji. Najari qqui inadsapi epejena, denima inejerani -nade. <sup>9</sup> Naraha Jeso Feripedsa huati tade: —Feriipe, ohua tiadenidsa maitta omadijonerade naraha ¿ohuadsa tinocco tojidsera-jeraccaqui? Aja madija ohuadsa nocco tojidserajaripa occa Abidsa naco nocco tojidserajari, onajaropajia. Naraha ¿nejecotohuira ohuadsa: “Icca Abi ia qqui tinanabaqquiji” tajaros? <sup>10</sup> Ohuapi Abidsa, Abipa ohuadsa, inajaropi Abi Dio Pohua ojarihi. ¿Naraha najarodsapi pajissa tejeraqui? Aji ohuatti huati huati ohonajaropi ojine jerani. Occa Abina ohuadsa madijari. Pohna ohua totocanahato najari. <sup>11</sup> Nadsama ohuattipi: “Ohuapi Abidsa, Abipa ohuadsa” onajarodsapi pajissa tiquinajia. Naraha najarodsapi pajissa tiquinanijine ssamo tadsapi aji occa nahatohue qqui tajonamanapojarodsapi: “Pajissa Jesopa Dio Bedia” tiquinajia -nade Jeso.

—*Nohue ojiradsa naqui tiadenidsa ima bicani da da onanitohui -najari Jeso*

<sup>12</sup> —Ohuapi pajissara tiadenidsa huati onana: Ohuadsa: “Pajissa ia tonassiajabaqquihijine”

tiquinadsapi pina aji ojinessa tinanamananito-hui. Occa Abi madihihuaaji occanini onattipi pina ojinessa tinanamanaraha denima bica tanicca tinanamananitohui. <sup>13</sup> Diodsa huati tiquinadsa ohua onima huati huati titiquina nadsapi da da onanitohui. Nani Abi Diocca deni tojehe tiadenidsa ahuato onananijine. <sup>14</sup> Jehe, ohuadsa huati huati tiquinadsapi ticcadeni huatinajassa onananitohui -nade.

<sup>15</sup> —Jehe, ohuadsa tetideni huanacquiri nadsapi occa dossenijissa tinanamanana. <sup>16</sup> Nadsama ohuapi Abidsa huati onanitohui. Nahi tiadeni Acco Camade ohuaha dosse inaronahijine. Najaripa Pohua Corime Pajissehe Maride tiadenidsa madhipaja nahijine. <sup>17</sup> Diodsa jehe quina-jarajari ajijaro dsamacca tohuini quinajaridenidsapa Pohua Corime Pajissehe Maride pohuadenidsa toja-jarahitohui. Pohuadenipa Dio Corime qqui toquina-jarahi. Pohuadsa ssamoqquri nahi. Naraha tiadenidsapa jidsera tahi. Najaripa tiadenidsa madihi. Tiadenidsa madi-dsanapohuitohui.

<sup>18</sup> —Ohuapi tiadeni ohuaquibo-baqqunitohui. Naraha tiadenidsa omadipomanijine occanipomanitohui. <sup>19</sup> Naraha nidsa denimapi ajijaro dsamacca madijapa ohua qqui tomanimanagerahitohui. Naraha tiadenipi ohua qqui timanimananitohui. Odsosqueraha onahatonidsapi omadinitohui. Nema onadsapi tiadeni naqui tinahatonimanadsa timadimanapomanitohui. <sup>20</sup> Jehe, occanipomadsapi tibodideni huatoma-mananitohui: Ohuapi occa Abidsa. Tiadenipi ohuadsa. Ohua naqui tiadenidsa,

onajaro. <sup>21</sup> Occa marinaja tiadenidsa tojadsa nema tinanamanadsapi ticcadeni ima ahuato tanijine: Pajissa ohuadsa tetideni huanagquiri nani. Ohuadsa tetideni huanagquiri nadsapi occa Abi naco tiadenidsa huati huana tahitohui. Ohua naqui tiadenidsa ohuati huana tanitohui. Tiadenidsa ahuato onanitohui –nade Jeso.

<sup>22</sup> Nadsapa Joda (ajajaripa Joda Iscariote jarahi) najari huati tajari: —Ia Maride ¿nejecotohui iadsara ahuato tinanijine naraha ajijaro dsamacca madijadsapi ahuato tinejeranijine? –nade. <sup>23</sup> Naraha Jeso huati tade: —Madija ohuadsa huatideni huanagquiri nadsapa ohuatti ecahuamananitohui. Nadsapa Abi naco pohuadenidsa huati huana tahitohui. Occa Abi tedseje pohuadenidsa imadinitohui. <sup>24</sup> Madija ohuadsa huatideni huaneraquiri nadsapa ohuatti ecahuamana-geranitohui. Aji ima timittamanajaropi ohuatti jerani, Abi Dio ohua Caddessed Atti.

<sup>25</sup> —Aji tiadenidsa omadidsama huati huati onajaropaji. <sup>26</sup> Naraha nidsa nohue ojiradsapi Abi Dio tiadeni Acco Camade dosse inaronahitohui. Najaripa Dio Corime pina ojinessa inananitohui. Denima tiadeni mari tocanabaquihitohui. Aji huati huati onajarocca naqui pohuajine tibodideni huatomanissa tanitohui –nade.

—*Occanibote nani, dacoco tijiraji –najari*

<sup>27</sup> —Nadsama ohuapi occanibote nani. Tibodideni bicaquiri nanijine tiadenidsa occa jonehe da onaridsani, pina ajijaro dsamacca

madija pohuadeni tohui quinahiccassa nejera-  
jaro. Nadsama occa daniji ticajimanadsapi tibod-  
ideni huatoto canejeraji. Occaninitohui onajaro  
noppineni naqui ticappinamana-jeraji, onajaro.  
<sup>28</sup> Ohuapi occanini, ocanajorani-pomanitohui  
onanipi timittamanade. Occa Abi Pohuana deni  
tojajari. Pajissa ohuadsa tetideni huanacquiri  
nadsapi occa Abihuaji occanina onadsa tetidse-  
mananjine bica taraha nema tiquinejerajaro.

<sup>29</sup> —Jehe, aji itedsejemacca ima huati huati  
onajaro toja-jeraccadsama tiadenidsa huati on-  
ajaro. Nidsa najaro ima tojadsapi ohuadsa:  
“Pajissa huati tajaria” tiquinanitohui. <sup>30</sup> Naraha  
ohuapi occa ima denima tiadenidsa huati  
odsanapo-jerana. Ajijaro dsamacca dodossede  
Satanapa bacco nabote nahi. Naraha pocca da-  
corehepi ohuadsa deni toja-jerani. <sup>31</sup> Nema nehe  
ohua ohuaccoradsapi odsoqquenitohui. Nema  
onajaropi madija huapima nahatoqquri nahi-  
jine: Ohuapi occa Abidsa ohuati huana tajaro.  
Pohuapa ajijaro imatohui ohua cadossedsapa  
Pohua Attidsa ibora onajaro —nade Jeso.

Maride jicadsapa: —Jina, jaijana —nade iadsa.

## 15

### *Jesocca marinaja uva ede tahimari*

<sup>1</sup> Nadsapa Jeso iadsa denima huati huati  
tade: —Ohuapi uva ede pajissacca ojani.  
Occa Abipa huidsajacca uva cacahuadessa na-  
jari. <sup>2</sup> Ohuapi huidsajacca uva edessa onad-  
sapi madija ohuadsa toquejenajaridenipa pina  
uva ininessa quinajari. Nadsama uva inine

cabononora tajaripa uva cacahuade ca icajidsa tahi. Naraha uva inine ohuaha cacabono najarina denima cabono-dsanapohuijine uva cacahuadepa ininedsa moroninedsatira ba ba ihippi najari. Eppe bote naco pore pore ihinana-jari. Nadsapa inine huire tadsapa bono cajid-sanapohuijine. <sup>3</sup> Aji tiadeni naqui najarossa tiquinajaro. Ohuatti tiadenidsa huati onajarojine huireqquiri tiquinajaro. Nadsapi tibonomanani-jine tinajoramanajaro. <sup>4</sup> Nadsama ohuadsa paji timadimananarini naridsaji. Ohuapi tiadenidsa paji omadirini nanitohui. Inine edeccana cacabono najari. Inine pohua mottapa cabononora tahi. Najarossa tiquinajaro. Tiadeni ohuadsa timadimananissa tejeradsapi ima bicani tinamananijine tipajiramana-jeranitohuiraha.

<sup>5</sup> —Nadsama ohuapi uva ede ojan. Tiadenipi uva inine tiquejenani. Ohuadsa timadimananissa tadsapi tiadenidsa omadinitohui. Nadsama tiadenipi pina uva inine cacabonojide rajarissa tiquinajaro. Nassa tiadenidsa omadi-jeradsapi ima bicani tinanamana-jeranitohuiraha. <sup>6</sup> Ohuadsa madimanahissa tajarajaripa huahuattajo toquejenahitohui, pina uva inine ca toppidsa hua tajarissa quinahitohui. Uva inine dseqqueri nadsa inaccamanadsapa botta botta tajarissa quinahitohui.

<sup>7</sup> —Naraha ohua tinebomana-jeradsa occa marinaja naqui tinebomana-jeradsapi tohui tiquinaniccatohui ohuadsa huati huati titiquina nana. Nadsapa ticcadeni huatinaja tiadenidsa tojahitohui, onajaro. <sup>8</sup> Jehe, Dio

Attissa tinanaridsamanadsapi pina uva inine cacabonojide rajarissa tiquinanijine. Nema tinanamanani madija qqui toquinadsapa occa Abidsa: “Jehe, Diopa bica tahi” quinahijine. Jehe, nema tinanamanadsapi pajissa occa madija tiquejenani ahuato tanitohui –nade Jeso.

*Jeso pocca mamari tabaqqidsa: —Otesedeni –najari*

<sup>9</sup> —Ohuapi tiadenidsa ohuati huana tehe nema onajonajaro. Pina Abi ohuadsa huati huana tajarissa onajaro. Occa tohuati huanehedsa tiajimana tejeraji. <sup>10</sup> Occa dossenijidsa iboraqquri tiquinadsapi occa tohuati huanehedsa timadimanani paji nanijine. Aji pina ohua occa Abicca dossenijidsa ibora onadsa pocca tohuati huanehema omdiridsajarossa tiquinaji, onajaro.

<sup>11</sup> —Aji huati onajaropi occa huatidsehe tiadenidsa onananiijine. Occa huatidsehe tibodidenidsa pajiranissa tanijine, onajaro. <sup>12</sup> Ajijaropi tiadenidsa occa dosseniji: Pina tetideni cahanerara canaji. Pina aji ohua tiadenidsa ohuati huana tajarossa tiquinaji. <sup>13</sup> Tohuati huanehe deni tojajaropi ajima najarona paji: Madija pohua tesse tocassiejerahijinepa pohuana pohua ccaccorajarina paja. <sup>14</sup> Nadsama occa dossenijissa tinanamanadsapi otesse tiquejenani. <sup>15</sup> Jidapapi tiadenidsa: “Occa medsedeni” onejerani. Madija medse inanabaqquijari pa pocca medsedeni pocca ima ssamoqquri najari. Naraha ohuapi occa Abi ohuadsa huati huati tajari nemanene tiadenidsa ohuacomerajaro. Najaroa aji tiadenidsa: “Otesedeni” onajaropaji.

16 —Tiadenipi otohui tiquinapo-jeraraha ohuana tiadeni ocattejidsa-baqquijaro. Nani tiadenina ohuatti mari ticanabaqquiridsahijine. Nahi madija ohuadsa toquejenahijine. Najaro imapi pina uva inine huajjiradsa cacabono najarissa tiquinanitohui. Najari bonopa madija Diodsa toquejena-dsanapojari. Nema nadsapi ohua onima huati huati titiquina nadsapi Abipa ticcadeni huatinaja tiadenidsa da da nanaja nahitohui. <sup>17</sup> Nadsama ajijaropi tiadenidsa occa dosseniji: Tetideni cahanerara canaji, onajaro -nade Jeso.

*Ajijaro namicca imadsa madimanajaridenipa Jesodsa huattajojo, pohua huatimadenidsa huattajojo tajari*

18 —Ajijaro namicca imadsa madimanageridenipa tiadenidsa jiperaqquri nadsapa tibodideni huatomanaji: Pohuadenipa ohuadsa jiperaqquri napojari. <sup>19</sup> Tiadenipi ajijaro namicca imadsa timadimanadsapi pohuadenipa tiadenidsa jipaqquri nahitohuiraha nema tiquinejerajaro. Ajijaro namicca imadsa timadimanaporaha ohuapi tiadeni ocattejidsabaqquijaro, ajijaro namicca imatohui timadimana-jeranijine. Jidapapi ajijaro namicca imatohui timadimana-jerajarojine tiadenidsa jiperaqquri najari. <sup>20</sup> Aji tiadenidsa huati onapojarocca tetideni huatoma-manana. Medsedenipa pohuadeni medsededsa deni toquejena-jarahi. Ohuadsa jara jara quinadsapa tiadenidsa naco jara jara quiquinanahitohui. Occa marinajadsa jehe quinadsapa ticcadeni

marinajadsa naco jehe quinahitohui. <sup>21</sup> Jehe occa tiquejenajarojine jidacca huati onapojaro huapima tiadenidsa nama quinahitohui. Occa Abi ohua Cadossedesa noccodeni jidsaqqiri nadsa nama quinajari.

<sup>22</sup> —Nadsama pohuadenidsa huatide occajona-jeradsapi pohuadenipa ima cappiramanahitohuiraha. Pohuadenidsa huati onaraha pajissa quina-jaradsapa ima cajimanajari. Pohuadeni-jinena poccadeni ima inatabaccoramanajaro. <sup>23</sup> Ohuadsa huattajojo tadsapa occa Abidsa naco huattajojo tajari. <sup>24</sup> Nadsama ojinepi pina madija ohuahajinessa nejerani. Occa nahatohue denima bica tanicca qqui toquina-jaradsapa ima cappiramanahitohuiraha. Naraha occa nahatohue bica tani qqui qqui toquinaraha pajissa quina-jaradsapa ima cajimanajari. Nama quinadsapa ohuadsa huattajojo, Abidsa naco huattajojo tajari. <sup>25</sup> Nadsama poccadeni imapi pina Dio Atti dsodo napojarossa najaro inanamanajaro: “Tabaccorehe onana-jeraraha pohuama ohuadsa huattajojo tajari” najaro Dio Atti dsodo nanidsa.

<sup>26</sup> —Tiadeni Acco Camade tiadenidsa dosse onaronahitohui. Puhuapa Abihuajicca, pohua oni ohuahapa Dio Corime Pajissehe Maride. Nidsa najari ccaronadsana otahimari tiadenidsa ahuatoma ahuatoma nanitohui. <sup>27</sup> Tiadeni naqui otahimari tecomera-ridsamananitohui. Aji, ohuadsa tiquejenapodsa ohua qqui tajonamanajarojine jidapana otahimari nahatoqqiri tiquinanissa tani -nade Jeso atti.



# 16

*Jeso huatimadedeni tedsejemadenicca ima huati tapojari*

<sup>1</sup> —Aji tiadenidsa huati onajaropi ticcadeni jeheniji tinebomana-jeranijine. <sup>2</sup> Jodio poccadeni Dio Atti mamarihuaji jai tijedsimapomajeranijine tiadenidsa: “Ahuajipi jai tijedsima tejeraji” quiquinanahitohui. Nidsa ima onihi naqui tiadenidsa ssonarinitohui. Madija pohuadeni tocamaidساني-manadsa bodidenipa: “Ohuapi Diocca ima ohuacahuanissa tana” quinadsapa tiadeni inanadsoqqe-maneje camanitohui. <sup>3</sup> Ajijaro imapi nema inanamananitohui. Pohuadenipa Abidsa noccodeni jidsaqquri, ohuadsa naco noccodeni jidsaqquri najari. <sup>4</sup> Nidsa aji huati huati onajaro tiadenidsa bacco tadsapi tibodideni huatomamananitohui: “Ja, Jeso atti nama napode” tiquinanitohui. Najaro imapi tiadenidsa huati onapo-jerade, tiadenidsa omdiridsaccani onadsa -nade Jeso.

*Dio Corimepa ia Acco Camade*

<sup>5</sup> —Naraha jidapanana ohua Cadossedehuaji occanini onadsapi tiadenipi ohuadsa huati tineje cama-jerani. “¿Nejecohuaji ticcaninijine?” tiquinejerani. <sup>6</sup> Naraha occanini onani timitamanadsapi oji tiquinabote nadsa tibodideni huanacossajaro. <sup>7</sup> Pajissara tiadenidsa huati onana: Ohua occanidsapi tiadenidsa ima bicani tojanijine. Occani-jeradsapi tiadeni Acco Camade nohuerahitohui. Naraha occanidsana tiadeni Acco Camade dosse onaronahitohui -nade.

<sup>8</sup> —Nidsa tiadeni Acco Camade bacco naronadsapa ajijaro dsamacca madijadeni imasiri cajimanahi pohnadenidsa ahuato inananitohui. Ima onihi naqui: Imasiri cappiramanajaridenina Diodsa toquejenahijine pajiramanahi ahuato inananitohui. Ima onihi naqui: Imasiri cajimanajaridenipa Dio ettajobaqquidsa nanajidso toquejenahijine ahuato inananitohui. <sup>9</sup> Tiadeni Acco Camadepa madija ohuadsa pajissa quinaradsapa imasiri cajimanahi pohnadenidsa ahuato inananitohui. <sup>10</sup> Ima onihipi: Imasiri cappiramanadsa Diodsa toquejenahijine pajiramanajaripa aji ohuapi imasiri jirehe omadidsa occa madie pajiranissa tajarojine. Nema onadsapi Diohuaji occaninitohui. Nadsapi ohuaqqi tiquinapoma-jeranitohui. <sup>11</sup> Ima onihi: Dio huahuattajo inanabaqquidsa nanajidso toquejenahijine ahuato inanajaropi tahide ajijaro dsamacca dodossede Satana Diojine huahuattajo tojapojaripaja –nade Jeso.

<sup>12</sup> —Denima tiadenidsa ima huati onanijine ima ocajiraha najaro huapima timittamananijine tipajiramana-jeraccani. <sup>13</sup> Naraha nidsa tiadeni Acco Camade Dio Corime Pajissehe Maride bacco naronadsana ima huapima pajissaccara tiadenidsa inanadsanaponijine. Najaropi pohua mottacca ima jerani, Abi Dio huati tajari mittdsa tiadenidsa huati toqquimahitohui. Itedsejemacca ima naqui tiadeni tonahattabaqquihitohui. <sup>14</sup> Pohnadsa occa ima ahuato onanadsa tiadenidsa ahuato inananitohui. Nadsapa pohuajine ohuadsa: “Jehe, Jesopa nahato tahi, deni tojahi” tiquinanitohui. <sup>15</sup> Occa Abicca huapimapi

ohua naqui occa. Najarojine ohuattipi: Dio Corimedsa ahuato onanadsapi tiadenidsa ahuato inananitohui, onajaro -nade Jeso.

*Poccadeni ojiepi huatidsehe tojanitohui*

<sup>16</sup> —Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui -nade Jeso.

<sup>17</sup> Nadsapi ia pohua huatimadedeni iara imahaha icanade: —¿Nejecotohui atti nama najari? -inade. —¿Nejecotohuira iadsa: “Nidsa dsotodepi ohua qqui timanimana-jeranitohui, naraha denimapi ohua qqui timanimana-pomanitohui” napa? ¿Nejecotohuira iadsa atti: “Ohuapi occa Abi madihihuaji occaninjine” nanaja najarinaja? <sup>18</sup> ¿Nejecotohuira pohua attipa: “Nidsa dsotodepi” nanaja najarinaja? Pohua huati huati tajaripa ssamoqquiri inani -inade pohua huatimadedeni iapi.

<sup>19</sup> Naraha Jesopa pohua bodi nahato tapoja najari. Iapi pocca imatohui pahuadsa huati inanitohuiraha manacora iadsa huati tajaride: —Nadsa tiadenidsa huati onapopa: Nidsa dsotodepi ohua qqui timanimana-jeranitohui. Naraha denimapi ohua qqui timanimana-pomanitohui, onajarojinea aji tiadeni motta imahaha ticana-jaropaji. <sup>20</sup> Nadsapi pajissara tiadenidsa huati onana: Tiadenipi oji tiquinanitohui. Tibodideni naqui ocassera tanitohui. Naraha madija ajijaro namicca imadsa madimanajarideni huapimapa huatidsemanahitohui. Tiadenipi tibodideni ocassera taraha ticcadeni ojiepi huatidsehe tojanitohui. <sup>21</sup> Ajijaro imapi pina amoneje idsoni

comajarossa najaro. Ejedeni comene nacassera taraha tossonahi nattipa comene huatini ajima najaro. Nadsapi ponicca ejedeni tossonajarijine ponipi huatidsejaro. <sup>22</sup> Tiadeni naqui nema tiquinanitohui. Ocasserani temanaraha dsotodepi tiadeni qqui omanibaqqui-pomanitohui. Nadsapi tibodidenidsa huatidsehera tojanitohui. Najaro huatidsehapi madija ohuahajine tossamojeranitohui, onajaro.

<sup>23</sup> —Nidsa dsotodepi tohui tiquinaniccatohui ohuadsa huati tiquinejeranitohui. Pajissara tiadenidsa huati onana: Tohui tiquinaniccatohui ohua onima Abidsana huati tiquinadsapi Abina tiadenidsa da da ihinananitohui. <sup>24</sup> Tiadenipi ohua onima Abidsa huati huati titiquina nejeraccani. Nadsapi ohua onima Abidsa huati huati titiquina naji, ticajimananijine. Nani ticcadeni huatidsehe pajiranissa tanijine –nade Jeso.

*Jesopa ajijaro dsamacca imadsa deni tojjari*

<sup>25</sup> —Occa marinaja ajijaro namidsa imadinicca ima tadsajani tiadenidsa mari mari ohonana-jaro. Naraha nidsa dsotodepi occa marinaja ajijaro namicca ima tadsajani tiadenidsa huati onapoma-jeranitohui. Abi tahimari ahuato tanijinena tiadenidsa huati onanitohui. <sup>26</sup> Najaro huada bacco tadsapi tiadenina ohua onidsa huati huati titiquina nani bica tani. Nadsama ohuapi ticcadeni huatinaja Abidsa huati oqquima-jerani. Puhuapa tettideni mittahi. <sup>27</sup> Abipa tiadenidsa huati huana tahi. Ohuadsa tetideni huana tadsa: “Pajissa Diohuaji ccaronajari” tiquinadsapi Abipa tiadenidsa huati huana

tahi. <sup>28</sup> Ohuapi Abi madihihuaji omadiraha ajijaro namihuaji occaronajarode. Jidapapi ajijaro dsama onebodsas Abihuaji occamacossaninitohui, onajaro –nade Jeso.

<sup>29</sup> Nadsapi ia pohua huatimadedeni pohuadsa huati inade: —Jehe, jidapanana huati tinanissa tani. Ajijaro namicca ima jirehe huati tinadsapi imittani –inade. <sup>30</sup> —Tiapi ima huapima nahatojide tijirani nahatoqquiri inajaro. Jidapapi tiadsa imatohui huati inejeradsa naqui, ibodicca icca huatinaja nahato tinani, inajaro. Najarojinea pajissa Diohuaji ticcaronani nahatoqquiri inajaro –inade Jesodsa.

<sup>31</sup> Naraha Jeso iadsa huati tade: —¿Jidapanana pajissa tiquinanissa tajaroqui? <sup>32</sup> Jidapapi ohuadsa ima tojabote nani. Tiadenipi ticcadeni odsahuaji jai tijaniridsanitohui. Ohua tiaquibonimananitohui. Nadsapi ohua motta ojanitohui. Naraha ohuapi ohua motta jerani. Abipa ohuadsa madihi. <sup>33</sup> Aji ima huapima tiadenidsa huati onajaropi tibodideni huatoto cana-jeraniijine. Ohuadsa tiquejenadsapi jonehe, huatidsehe pajissacca ticajimananitohui. Ajijaro dsamadsa timadimanaccadsapi ocasserani tem-anaraha dacoco tijiraji. “Epeje inana” tiquinejerana. Ajijaro namicca dodossedepa ajamani tojahi. Ohuana pohuadsa deni ojani –nade Jeso.

## 17

*Jeso pocca Abidsa huati tajari*

<sup>1</sup> Najaro ima huati taha jicadsapa Jeso memehuaaji qqui tamacossadsa Diodsa huati tade: — Abi, jidapanana onajorehe jicani. Memehua-jicca deni tojehe ticca ejedenidsa da taji. Nahi ticca ejedenipa ticca nahatohue deni tojehecca ahuato inananijine huapimadsa. <sup>2</sup> Aji ohua ticca ejedenipi madija huapimadsa tijine tamine ojajaro. Aja ohuadsa tinanabaqquijaridenipa pohuadenidsa camittehe jiquejeranicca da onar-idsanijine. <sup>3</sup> Najaro camittehe jiquejeranicca cajimanahijinepa Tiadsa noccodeni tojidserajari. Tiana Dio ojari tajaro. Tiana ia Cacahuade pajissacca. Aji ohua Jesocristo ohua dosse taron-ajaropi ohuadsa naco noccodeni jidseraqqiri nahi. Madija Tiadsa, ohuadsa pajissa quinadsapa camittehe jiquejeranicca cajimanahitohui.

<sup>4</sup> —Nadsama ticca deni tojehepi ahuato onanajaro ajijaro dsamadsa. Aji ohua ticadossejaro huapimapi onajicanissa tani. <sup>5</sup> Abi, dsama nahato-jeraccadsama Tia tedseje deni tojehe ica-jijarode. Jidapapi najaro ohuadsa tinananiji, onajaro –nade Jeso.

*Jeso pohua huatimadedenitohui Diodsa huati tajari*

<sup>6</sup> —Jehe, madijapa ajijaro namicca imadsa madimanaraha tidinibaqquidsapa ohuadsa tinanabaqquijari. Najarideni onahattabaqquidsapa ticca imadsa nahatoqqiri nahi. Najaridenipa ticcaraha ohuadsa tinanabaqquijari. Tettidsa iboraqqiri nadsa ticca marinaja ecahuamananissa tani. <sup>7</sup> Jidapapa nahatoqqiri nahi aji huapima ocajijaro

naqui ticca daniji. <sup>8</sup> Aji ohuadsa Tetti da tajaropi pohuadenidsa da onaridsani. Najaropi pohuadenidsa tojani. Pohuadenipa Tiahuaji occajonanicca ima tocahatterara canahi. Pohuadenipa ohuadsa: “Pajissa Dio dosse inaronajari” quinahi.

<sup>9</sup> —Ohuapi najaridenitohui Tiadsa huati onajaro. Ajijaro namicca imasiridsa madimanageridenitohuipi huati onejerajaro. Aja ohuadsa tinanabaqquijaridenitohuira Tiadsa huati huati onajaro. Pohuadenipa ticca. <sup>10</sup> Aja occa huapimapa ticca. Ticca huapima naco occa, inajaro. Occa deni tojehepi pohuadenidsa ahuato tajaro.

<sup>11</sup> —Jidapapi ajijaro namidsa omadidsanapojerani. Tiahuaji occaniraha aja pohuadenipa ajijaro namidsa madimanaccahitohui. Jehe, Abi bicabote tijani. Aja ohuadsa tinanabaqquijaridenipa ticca dacorehedsa tecahuabaqquijo, huapima ojariqquimanahijine. Pina Tia ohua tedseje ijariqquijarossa quinahijine. <sup>12</sup> Ajijaro namidsa pohuadenidsa omadiridsadsapi aji ticca dacorehe ohuadsa tinanajarodsa ohuacahuabaquihissa tajari. Pohuadenipa ojaría amossinaja cama-jararaha ojariana paja amossi narihi nahitohui. Najaripa najidsohue jiquejeranihuaji tojahitohui, pina aji Tetti dsodo napojarossa nehe tojanitohui.

<sup>13</sup> —Jidapapi Tiahuaji occanina. Naraha ajijaro namidsa omadiccadsama ajijaro ima Tiadsa huati huati onajaro, nahi pohuadenipa pina aji occa huatidsehe ocajijarossa najarodsa huatidsemaneri nahijine. <sup>14</sup> Nadsama ticca marinajapi

pohuadenidsa onanaridsaraha ajijaro namicca madijaha pohuadenidsa huattajojo tajari. Pohuadenipa ajijaro namicca imadsa toquejenajarahi. Pina ohua ajijaro namicca ojajerajarossa quinajari. <sup>15</sup> Naraha Tiadsa: “Pohuadeni tiaccamacossani-baqquijo” onejerani. Imasiri jinede Satanacca maidsehedsa tojaparimanagerahijine onadsa “Tecahuabaqquijo” onajaro. <sup>16</sup> Ohuapi ajijaro namicca ojajerani. Pohuadeni naco pina aja ohuassa quinajari. Ajijaro namicca quejena-jarahi. <sup>17</sup> Ticca pajissehedsara tinanabaqquijo, onajaro, imasiri jirehe madimanahijine. Tettipi pajissa ponira. <sup>18</sup> Ajijaro namidsa omadinijinepi Tiana ohua ticadossejarode. Najarossa najaro ohuapi pohuadeni ocadossebaqqujari, ajijaro namicca madija motadeni mari icanabaqqui-ridsahijine, onadsa. <sup>19</sup> Occa madie nemanehi Tiadsa accora onajaro. Aja occa mamari tabaqquideni naco pina ohuassa quinahijine poccadeni madie nemanehi Tiadsa accoraqquri nahijine dissera onajaro. Ticca pajissehedsara madimana-dsanapohuijine –nade Jeso.

*Pohuadsa pajissa quinajaridenitohui Diodsa huati tajari*

<sup>20</sup> —Ohuapi occa mamari tabaqqui bodideni acco ticamabaqquijo onadsa Tiadsa huati huati onaraha dsotodedeniccatohui naqui Tiadsa huati huati onajaro. Nidsa occa mamari tabaqqui otahimari eccoraridsamanadsapi madija ohuaha dsotodedenicca naco ohuadsa pajissa quinahitohui. <sup>21</sup> Najarideni



naco ojariqquimanahissa tahijine, Abi, pina ohua Tia tedseje ijariqquijarossa quinahijine Tiadsa huati onajaro. Pohuadeni naco iadsa ojariqquimanahissa tahijine, onajaro. Nahi ajijaro dsamacca madijapa ohuadsa: “Pajissa Dio dosse inaronajari” quinahijine.

<sup>22</sup> Aji occa deni tojehe ohuadsa da tajaropi pohuadenidsa naqui da onaridsani. Nahi pohuadenipa ojariqquimanahissa tahijine, pina ia ijariqquijarossa quinahijine, onajaro.

<sup>23</sup> Ohuapi pohuadenidsa, Tiapi ohuadsa inajaro. Nahi pohuadenipa ojariqquimanahissa tahijine. Nadsapa ajijaro dsamacca madija nahatoqquiri nahijine ticca dosseniji occajonajarode. Ajijaro ima naqui nahatoqquiri nahijine: Tiapi pajissa quinajaridenidsa teti huana tajaro. Pina ohuadsa teti huana tajarossa najaro.

<sup>24</sup> —Nadsama Abi, ohuadsa tinanabaqquijaripa occaridsanihuaji ohuadsa jahiridsahijine, ticca daniji occa deni tojehe qqui toquinahijine onadsa. Najaro deni tojehepi dsama inahatojeraccadsama Tiapi ohuadsa teti huana tadsa ohuadsa da tajarode.

<sup>25</sup> Abi, ticca imapi pajiranissa tani. Ajijaro namicca madija Tiadsa noccodeni jidsaqquiri nahi. Naraha ohuapi Tiadsa onocco jidsera tani. Aja ohuadsa toquejenajaridenipa nahatoqquiri nahi: Ohuadsa: “Ajaripa Diocca dosseniji” quiquinanajari.

<sup>26</sup> Nadsapa ojine Tiadsa noccodeni jidseraqquiri nahi. Naraha denima noccodeni tojidseradsanapohuijinipa nema odsanaponitohui. Aji ohuadsa tohuati huanehe ticajijaropi pohuadeni naco cajimanahijine. Ohua naqui pohuadenidsa

omadiridsanijine -nade Jeso atti pocca Abidsa huati huati tadsa.

## 18

*Jeso dama quinahi*

*Mateo 26.47-56; Maraco 14.43-50; Roca 22.47-*

53

<sup>1</sup> Jeso Imehidsa huati taha jicadsapa Jeso pohua huatimade iapi pohua tedseje bijini oni Sedro jippehuaji jaijajarode. Aja Jeso itedseje toqquedsimahihuajipi ppa nahi caji tade. <sup>2</sup> Joda Iscariotepa Jeso ccaccorade, pohua naco nahihuaji nahato tajari. Nanihuajipi Jeso pohua huatimade iapi pohua tedseje maitta ihiqueriqqui rade. <sup>3</sup> Nahihuajina Jodapa romanodenicca soldado, dada toqquimahuajicca cacahuadedeni tedseje eccajonabaqqujaride. Dada toqquimade taminedeni, marinaja onini pariseodsa jehe quinajarideni tedseje dosse inajonabaqqui-manajari. Bacco najonamanadsapa dsepedenima jahijonade. Jororo, huahuacca, huahuajina, massito najonamanajaride. <sup>4</sup> Jesopa pohua todsepe tojahijine nahato taporaha pohuatohui jahijonajaridenihuaji toccadsa huati tade: —¿Nejecojaritohui jai tijajonajaro? -nade. <sup>5</sup> Naraha pohuadeni cacomeramanade: —Jeso Nasaretihuajiccatohui jaijajonajaro -quinade. Naraha Jeso pohua cacomerade: —Ohuapi aji -nade. Aja Jeso pohua ccaccorade Joda naco pohuadenidsama quejemade. <sup>6</sup> Jesopa —Ohuapi aji -nadsa pohuadeni nattihuaji ttiri tanimananaja edima bohua bohua bohua quinade namidsa.

<sup>7</sup> Naraha Jeso pohuadenidsa huati tapomade: —¿Nejecojaritohui jai tijajonajaro? —napomade. Naraha pohuadenipa: —Jeso Nasareti-huajiccatohui —quinade. <sup>8</sup> Naraha Jeso huati tapomade: —Nadsa huati onapopa: “Ohuapi aji” ohonanapa. Otohui tiquinadsapi aja ohuatimad-edenipa pohuadeni jai tojaniridsana, onajaro —nade.

<sup>9</sup> Najaropi pina Jeso Imehidsa huati tapodsa: —Abi, aja ohuadsa tinanabaqquijari pa amossinaja cama-jarana —napojarissa inananijine.

<sup>10</sup> Naraha Ssino-Pedropa pohua nacoricca massito dsoppa taneje jeo, taminecca medse oni Maoco huaribo nahatonihuaicca ca taneje tajo canade. Maocopa dada toqquimadedenicca tamine deni tojajaricca medse. <sup>11</sup> Naraha Jesopa Pedrodsa huati tade: —Ticca massito tinacoridsa dso ticadsaniji. Ajijaro imapi occa Abicca dosseniji ocasserani ohuanijine. Pohua Attidsa ibo onejerani —nade Jeso. <sup>12</sup> Nadsapa soldado huapima poccadeni tamine tedseje, jodiodeni mota aja Diodsa dada toqquimahuaicca cacahuadedeni quinadsa Jeso dama quinadsapa biji jore quinade.

*Tamine tahidecca Anasahuaji Jeso iaccamanajari*

*Mateo 26.57-58; Maraco 14.53-54; Roca 22.54*

<sup>13</sup> Nadsapa dada toqquimadedenicca taminebote onipa Anasacca odsahuaji iaccamanade. Pohuapa Caipacca coco. Caipapa najari huajanodsa dada toqquimadedenicca tamine deni tojajari. <sup>14</sup> Caipana jodiodenidsa huati tapojaride: —Madija ojaría huapima

manaconedeni dsoqquehina bica tahi, ia icca dsamacca huapima naco inajicaridsamana-jeranijine –napojaride Caipa atti.

*Pedro pohua namaidsapohuicca ima*

*Mateo 26.58, 69-70; Maraco 14.54, 66-68; Roca 22.55-57*

<sup>15</sup> Ohuapi Huano, Ssino-Pedro tedseje Jeso natti icadamissade. Dada toqquimadedenicca tamine deni tojajaricca boronidsa Jeso iaqquedsimamanajaride. Aja taminepa ohuadsa nocco jidsera tajarijine pocca boronidsa oqquedsimajarode. <sup>16</sup> Naraha Pedropa taminecca boroni huapihuaji siba hua nahuajaninicca noccobijidsa huade. Naraha oqquenadsa najaro odsacca medse noccobiji cacahuade tojajarodsa huati onadsapi Pedro naco qquedsimade. <sup>17</sup> Naraha Pedro qquedsimadsa najaro odsacca medse dsohuato noccobiji cacahuade huajaropi pohuadsa huati tade: —¿Tiapi aja dama quinajari huati-made tija-jeraqui? –nade. Naraha Pedro pohua namaidssadsa: —Ohuapi najaricca ojajerani –nade.

<sup>18</sup> Nadsapa dsome tossirini nadsa tamine deni tojajaricca dodosse tabaqqui, Diodsa dada toqquimahuajicca cacahuadedeni tedseje dsippo inadsamanadsa jia quinajaride. Pedro naco nahi huapima domo huahihuaji pohuadenidsama jia najaride.

*Dada toqquimadedenicca tamine deni tojapojari tahidecca Jeso pohua cacomerahijine huati*

*icanajari*

*Mateo 26.59-66; Maraco 14.55-64; Roca 22.66-71*

<sup>19</sup> Naraha dada toqquimadedenicca taminebote Anasana Jesodsa pocca mamari tabaqqicca imatohui huati, pocca marinajatohui huati tajari: —¿Ticca marinaja naqui nejecoma najaro imara mari mari titicanabaqqui najaritta? —nade tamine atti. <sup>20</sup> Naraha Jeso huati tade: —Nadsa madija huapima mittamanahijine mari mari ohocanabaqquiridsa nade. Jodiodeni quequeriqquimana nahihuaji aji icca Dio Atti mamarihuaji, aji Diodsa dada toqquimahuaji mari mari ohocanabaqquiridsa nade. Ohuapi cacomehedsa huati huati ohonana-jerade. <sup>21</sup> Nadsapi ¿nejeco imatohui ohuadsa huati tinajaro? Aja occa marinaja mittamanajaridenidsara huati tinaji: “¿Jesocca marinajapi nejecoma nejecoma najarotte?” taji pohuadenidsa. Pohuadenipa occa marinaja nahatoqquri nahi —nade Jeso. <sup>22</sup> Jeso atti nama nadsapa pohua inorihuaji huajari Diodsa dada toqquimahuajicca cacahuadepa Jeso pano pohua dsepedsa idanide. Nanaja Jesodsa pohua attipa: —Iapi dada toqquimadedenicca tamine deni tojajaridsapi nema inejerajaro —nade. <sup>23</sup> Naraha Jeso attia: —Jehe, jidacca huati huati onajaro ohuatti tabaccora tadsapi huapima mittamanahijine huati tinaji. Naraha jidacca huati onajaro tabaccora tejeradsapi ¿nejecotohui opano tidanijaroneje? —nade Jeso atti.

<sup>24</sup> Nadsapa tamine Anasa attipa: —Manaco

Caipahuaji toccana –nadsapa Jeso biji jore nahi nama naha Caipahuaji iaccamanade. Caipapa dada toqquimadedenicca tamine deni tojajari.

*Pedro pohua namaidsapomajaricca ima*

*Mateo 26.71-75; Maraco 14.69-72; Roca 22.58-62*

<sup>25</sup> Jesopa odsa bodihuaji nanajidso tojaraha Pedropa boronidsa dsippo jiade tojajari. Nadsapa nahi dsippo jiade toquejenajarideni Pedrodsa huati toquinajaride: —¿Tiapi ajajari maqquideje huatimade tija-jeraqui? –quinajaride. Naraha Pedro pohua namaidsapomade: —Ohuapi najaricca ojajerani –nade.

<sup>26</sup> Naraha dsotode naco dada toqquimadedenicca tamine deni tojajaricca dodossepa Pedrodסהuati tade. Najaripa Pedro pohuajine huaribo ca tocajidsajaricca madija. Najari attia: —¿Tiapi aja ahua ppa nahihuaji dama quinajari tedseje tia qqui onajerattaqui? –nade Pedrodסה.

<sup>27</sup> Naraha Pedro pohua namaidsapomadsapa: —Ohua jerade –nanaja tacara huahua najaride.

*Tamine Piratodסה Jeso iaccamanajari*

*Mateo 27.1-2, 11-14; Maraco 15.1-5; Roca 23.1-5*

<sup>28</sup> Ssiajadsa dsidsidsamassapi Jeso Caipacca odsadsa iaqquenamanadsapa manaco tamine Piratocסה odsahuaji iaccamanajaride. Tamine Piratopa romanodeni. Pohuapa jodiodenicca dsama cacahuade tojajari. Naraha ejete Pascoa bacco teje najaro Piratocסה odsa bodihuaji jai tojedsima-jarade. Ia jodiodeni icca marinajapi: —Pascoacca jipaqquedסה ijipa-jeraccadsa

jodio quejena-jarajaridenicca odsahuaji iqqued-simanijine oppina tani -ihinanajaro. Najaro noppineni cappinamanadsapa Piratocca odsa bodihuaji jai tojedsima-jarajaride. <sup>29</sup> Najaria aja Pirato qquenadsa pohuadenidsa huati tajari-paja: —Ajajari maqquidejepa ¿nejeco ima cajidsa teccajonamanajari? -nade. <sup>30</sup> Manaco Piratodsa huati toquinade: —Pohuajine tabaccora tejeradsapi tiadsa eccajona-jararaha -quinade. <sup>31</sup> Naraha Pirato attipa: —Ticcadeni ima cacat-temahuajira tiaccamanajo. Pocca ima tabaccora tadsapi tiadenina tinajidsomanajo. Pina ticcadeni marinajassa tinanamanaji -nade. Naraha jodiodenipa —Jeso dsoqquehitohui -quinadsa Piratodsa huati toquinapomade: —Ia jodiodenipi madija inanadsoqquehijinepi icca cacahuaniji jerani. Romanodeni tiadenina ticcadeni cacahuanijina paji. Madijacca ima tabaccora tadsapi tiadenina titinanadsoqquemana najari -quinade. <sup>32</sup> Nadsama najaropi pina Jeso pohua dsoqquehijinecca ima pohua huati huati tapojarissa nehe tojajarode.

<sup>33</sup> Nadsapa Pirato pocca odsahuaji toqquedsimani-pomade. Toqquedsimanidsapa Jeso huahua idsimadsa huati tade: —¿Tiapi jodiodenicca tamine tijaqui? -nade. <sup>34</sup> Naraha Jeso Piratodsa huati tade: —¿Najaropi tibodi huatodsa ohuadsa tetti nema tajaroqui? ¿Madija huati toquinahi timittadsarane? -nade. <sup>35</sup> Naraha Pirato huati tade: —¿Ohuapi jodio ojaqui? ¡Jodio ojajerani! ¿Nejecoma nadsa ticca madijacca marinajadsa ima tinanajaro nahato onanijine? Aja ticca dsamacca madija, dada

toqquimade tamedeni tedseje ohuadsa tia eccajonamanajaro. ¿Nejeco ima tinanadsatte? –nade Pirato. <sup>36</sup> Naraha Jeso pohua cacomerade: —Occa cacahuehepi ajijaro dsamacca jerani. Nassa jodiodeni ohua dama quina-geranijine occa mamari tabaqqui jodiodeni tedseje cahadirenaja. Naraha ajijaro dsamacca jerani –nade. <sup>37</sup> Naraha Pirato attia: —¿Tetti nema tadsapi tamine tijaqui? –nade. Naraha Jeso pohua cacomerade: —Pajissa ohuapi tamine, aji huati tinajaropaji. Nadsama ohuapi ajijaro dsamadsa ossonajaropi pajissara huati huati ohonabaqqui nahijine occajonajarode. Huapima pajisseheda jipaqquri najaridenina ohuatti mittamanajari –nade Jeso. <sup>38a</sup> Naraha manaco Pirato pohua cacomerade: —¿Nejecoma najarona pajissehe? –nade Jesodsa.

*Jeso tappa inahijineraha Barabana tohui quinajari*

*Mateo 27.15-21; Maraco 15.6-11; Roca 23.17-19*

<sup>38b</sup> Najaro huati taha jicadsapa tamine Pirato qquenapomadsapa jodiodenidsa huati tapomade: —Jehe, ohuapi ajajari maqquidejeca ima omittadsapi tabaccora tanicca nohuerani. <sup>39</sup> Naraha aji ticcadeni ejete Pascoa tojadsapi toponi cocorodsa coro todsimajarideni ojaría qquenahijine tohui tiquinadsapi ohuadsa huati huati titiquina nade. ¿Nejecojarina tappa onadsa qquenahijine tohui tiquinajaro? Aja ¿“jodiodenicca tamine” quiquinajaripa tappa



onahijineco? -nade Pirato. <sup>40</sup> Naraha jodi-  
 odenipa johuahua johuahua canapomade: —  
 ¡Najaripa pohua! ¡Tappa tinajarajo! ¡Paja  
 coro todsimapojari Barabana tijine qquenajo!  
 -quinade Piratodsa. Naraha Baraba pahuapa  
 toponi nanajidsoderaha.

## 19

—*Porimacossanidsa Jeso coba tidsanamanana*  
 -quinajari

*Mateo 27.22-23; Maraco 15.12-14; Roca 23.20-22*

<sup>1</sup> Nadsapa tamine Pirato soldado icadosse-  
 baqquidsa Jeso cossi quinade. <sup>2</sup> Soldadodeni  
 Jeso taticca cotihi atinema icohuamanaha ji-  
 cadsapa tatidsa ettarimanade. Nadsapa etero  
 macconi motaranicca pina tamineccassa najar-  
 odsa Jeso inehedsamanade. <sup>3</sup> Nadsapa Jesodsa  
 jai tojessidsa pohuadsa maidsamanajari: —  
 ¡Jodiodenicca taminepa bica tahi, bica tahi!  
 -quinade. Nadsapa pano idanimanade.

<sup>4</sup> Nadsapa Pirato qquenapomadsa  
 jodiodenidsa huati tade: —Jari, ohuattidsa  
 Jeso eqquenamana-pomahijine. Pohua qqui  
 tiquinadsapa nahatoqquiri tiquinanijine:  
 Ohuapi najari maqquidejecca ima omittadsapi  
 pocca ima tabaccora tanicca nohuerani -nade.

<sup>5</sup> Nadsapa Jeso tatidsa cotihi atinema huittari,  
 taminecca etero macco tajaro huedsa naha  
 eqquenamanade. Nadsapa Pirato atti: —  
 ¡Jari, ajajari maqquideje qqui tiquinajo!  
 -nade. <sup>6</sup> Naraha dada toqquimade taminedeni,  
 Diodsa dada toqquima odsa cacahuadedeni

tedseje Jeso qqui toquinadsapa paja johua toquinarihi nade: —¡Ahua porimacossanidsa dsoqquena, dsoqquena! —quinade. Naraha Piratopa: —¡Tiadenina tiaccamanadsa ahua porimacossanidsa coba tidsanamanana! Ohuadsapi pocca ima tabaccora tanicca nohuerani —nade. <sup>7</sup> Naraha jodiodenipa poccadeni ima huati toquinade: —Iapi icca marinaja ecahuadsapi Jesopa inanadsogquena, inajaro. Pohua attipa: “Ohuapi Dio Bedi ojani” nanaja naraha najaro ima iadsa bica tejerani inajaro —quinade.

*Jeso pohua cacomerahijine tamine Pirato huati tapomajari*

<sup>8</sup> Tamine Piratopa jodiodeni attideni: —Jesopa Dio Bedi ojani nahi —quinahi mittadsapa denima cappinade. <sup>9</sup> Nadsapa Jesodsa huati tahijine pocca odsahuaji toqquedsimani-pomade. Jesodsa pohua attipa: —Tiapi ¿nejecohuajicca tijani? —nade. Naraha Jesopa pohua cacoma nade. <sup>10</sup> Naraha Pirato attia: —¿Ohuadsapi tia tecomajaroqui? —nade. —¿Ohuadsa ssamo tinajarorane? Ohuapi ajijaro dsamacca daco ojirajaropi ohuatti ocajini. Tiqquenanijine huati onadsapi tiqquenanitohui. Tidsogquena onadsa naqui, tia coba idsanamananitohui —nade Pirato atti. <sup>11</sup> Naraha Jesopa pohua cacomerade: —Tiapi ohuadsa deni tija-jeraraha Dio tia cadossedsa deni tijadsa tetti ticajijaro —nade. —Tijine ohuadsa tabaccora taraha aja ohua ccaccajonadedenicca imana denima tabaccora tajaro —nade. <sup>12</sup> Nadsama Pirato Jeso atti

nama nahi mittadsapa Jeso tappa inahijinecca imatohui huati tapomaraha jodiodenipa johua johua quinade: —¡Jeso tappa tinadsapa romanodenicca tamine deni tojahicca pohua tesse tija-jerani! Madija attipa: “Ohuana tamine ojani” nadsapa romanodenicca tamine deni tojahicca huadi tojajari -quinajari Piratodsa.

*Piratopa Jeso dsoqqehijine pohua eccorajari  
Mateo 27.24-26; Maraco 15.15; Roca 23.23-25*

<sup>13</sup> Tamine Pirato jodiodeni atti nama quinahi mittadsapa Jeso amossinihuaji iaqquenamanapomahijine huati tajaride. Nadsapa Piratopa ima cacattemahuajicca huihuittaridsa huittarijaride. Pocca huihuittaripi pocca huahuari deni toja nahihuaji huittarijaride. Nanidsapi siba ppa naridsani, sseque tajararo. Jodiodeni atti ebreodsapi: Gabata, quiquinanajari. <sup>14</sup> Najaro huadadsapa jassinajacca huadatohui najoramanapojaride. Najaro jassinajacca huada sabadopì ejete Pascoacca jassinaja tojanijine. Nadsapa maji itetepi bacco tadsa Pirato jodiodenidsa huati tade: —¡Aja pajaha ticcadeni tamine! -nade. <sup>15</sup> Naraha jodiodenipa johuahua johuahua canadsapa: —¡Dsoqquena, dsoqquena! ¡Ahua porimacossanidsa coba tidsanajo! -quinade. Naraha Pirato attipa: —¿Ohua ticcadeni tamine coba odsanahijineco? -nade. Naraha dada toqquimade taminedeni pohuadeni cacomeramanade: —¡Najaripa icca tamine tojana inejerani! ¡Romanodenicca tamine deni tojahiccara ojarina inajaro! -quinade.

<sup>16</sup> Nadsapa Pirato pohuadenidsa Jeso da inade. Ahua porimacossanidsa coba idsanamanahijine soldadodeni iaccamanade.

*Jeso ahua porimacossanidsa coba idsanamanajari*

*Mateo 27.32-44; Maraco 15.22-32; Roca 23.26-43*

<sup>17</sup> Nadsapa Jeso iaccamanadsapa pohua coba dsanahijine ahua porimacossani dsojo inade. Ssono Totati Tonanissa nani quiquinanahihuaji jai tojemorajari. Najaro ssono onini jodiode ni atti ebreodsapi: —Cocotta —quiquinanajaride.

<sup>18</sup> Nahidsana Jeso ahua porimacossanidsa coba idsanamanajaride. Jesopa nahi madija cobaba dsanahi nocconidsa tojajaride. Pohua inoridsa ahuaaji ahuaaji quinade. <sup>19</sup> Nadsapi ima dsodo nani tamine Pirato dosse inajonadsa Jeso tetepihuaji coba idsanamanajarode.

Najaro dsodo nanipi: —Jesopa Nasaretihuaajicca, Jodiode nicca Tamine —najarode. <sup>20</sup> Najaro dsodo nanipi jodiode ni huapima hua quinade. Aja Jeso coba dsanahihuajipi odsa panani huajira tade.

Najaro ima dsodo nanipi jodiode ni pohuade ni atti ebreodsa, dsama Cresiacc a madija attidenidsa, romanode ni attidenidsa najarode. <sup>21</sup> Naraha dada toqquimade tamedeni qqui toquinadsapa tamine Piratohuaaji jai tojanidsa huati toquinade.

Pohuade ni attipa: —Aji tijine dsodo nani “Jodiode nicca Taminepi” dsodo tejeraji. “Ajajari maqquideje attipa: ‘Ohuapi jodiode nicca tamine ojani’ nanaja nade” najarora dsodo taji —quinade. <sup>22</sup> Naraha Piratopa: —Ojine dsodo najaropi, epeje —nade. <sup>23</sup> Nadsapa soldadode ni Jeso

coba idsanamanaha jicadsapa eteroripi soldado  
 4 quinajarideni inaccamanadsa pohuadenidsa  
 pohuadenidsa naridsade. Pocca etero dequeran-  
 icca naqui idimanade. Naraha najaropi sse-  
 quirani nemaneha ba naronani. <sup>24</sup> Nadsapa  
 soldadodeni pohuadenira imahaha canadsapa:  
 —Jehe, ssoja inari-gerana. Itesse ojariadsa to-  
 janijine siba bedenidsa coro coro inadsa qqui  
 inana. ¿Nejecojaridsana tojanijine? —quinade.  
 Najaro imapi Dio Atti dsodo napojarossa inana-  
 manajarode. Imapi ajima najaro: —Occa eteropi  
 icajaribaqqui-mananitohui —naponi nade Dio  
 Atti dsodo nanidsa. —Occa etero dequericca  
 naqui ¿nejecojaridsa tojanijine? quinadsa siba  
 bedenidsa coro coro quinahitohui —naponi nade  
 Dio Atti dsodo nanidsa. Soldadodenipa pina  
 najarossa inanamanajarode.

<sup>25</sup> Nadsama nahi Jeso coba dsanahidsapa  
 Jeso pocca ami, poni imanicotani, poni tassani  
 Cleopacca amoneje Maria, Maria Madarenahua-  
 jicca quinadsa domoni huajarode. <sup>26</sup> Nanidsa  
 Jeso pocca ami huani qqui tajaride. Ohuapi  
 Jeso huatimade. Ohuadsana Jeso huati caha-  
 nari canajaride. Ohuapi Jesocca ami inorinidsa  
 ohuani Jeso ohua qqui tadsapa imenidsa huati  
 tajaride: —Ami, aja tinoricca huajaripa ticca  
 ejedeni tojana —nade Jeso. <sup>27</sup> Pohua huatimade  
 ohuadsa naco huati tajaride: —Aji occa amipi  
 ticca ami tojana —nade. Nama nadsapa pohua  
 huatimade ohuapi Jesocca amipi occa odsahua-  
 jina onamadijarode.

*Jeso huatiajari*

*Mateo 27.45-56; Maraco 15.33-41; Roca 23.44-49*

<sup>28</sup> Pohuadenidsa huati taha jicadsapa Jeso pohuajine huapima inapajiranissa tani nahato tajari. Dio Atti dsodo napojarossa inanijine naqui huati tade: —Obacco dsarini —nade.

<sup>29</sup> Naraha nahidsa uva ppejene ssicatahi jojodsa cajimanajaride. Uva ppejene ssicatahidsa huassa tajari edsippamana, ahua isopo ininidsa oro quinadsapa Jeso ajaridsa da inamacossamanade.

<sup>30</sup> Jesopa uva ppejene ssicatahi so inaha jicadsapa huati tade: —Huapima jicanissa tani —nade. Nadsapa tocattedsa nadsa huatiade.

*Jeso ejinamanajari*

<sup>31</sup> Jeso dsogquehicca huadapi viernes. Najaro huadadsa jodiodenipa jassinajacca huada-tohui najoramanapojari. Ahua porimacos-sanidsa assiredeni coba dsanamanahi paja naccahijine jiperaqquri najari. Najaro jassinajacca huada sabadopi ejete Pascoacca jassinaja ima deni tojanicca. Nadsapa jodiodenipa tamine Piratodsa huati toquinade: —Soldado ticadossebaqquidsa coba dsanamanajarideni issodeni iaquidejidsa-ridsamanana. Cacotadsapa assiredeni naco dicca quinaridsana —quinade. Pirato jehe nadsapa soldado icadossebaqqujari.

<sup>32</sup> Nadsapa soldado coba dsanamanajarideni issodeni iaquidejidsa-ridsamanahijine jai tojade. Bacco toquinadsapa tahide Jeso inoricca cobaba dsanajari issodeni iaquidejidsa-ridsamanapode.

<sup>33</sup> Naraha Jeso huatiahi qq̄ui toquinadsapa pohua isso iaquidejidsa-manajarade.

<sup>34</sup> Jesopa huatiaraha nama naha ppari huahua-jinadsa soldado dso tanaja, pora, emene qq̄uena, passo qq̄uena nade.

<sup>35</sup> Ajijaro tiadenidsa huati onajaropi ohua onocodsa qq̄ui onajaro. Tiadenidsa pajissara huati onajaro Jesodsa jehe tiquinanjine. Ohuapi nahato onajaro ohuattipi pajissa. <sup>36</sup> Jeso tone idejidsamana-jarajaricca imapi Dio Atti dsodo napojarocca imadsa pajiranissa tani. Nani Dio Atti dsodo napojaropi: —Tone ojaría jai inanamana-jarahitohui -naponi nade Dio Atti dsodo nanidsa. <sup>37</sup> Dio Atti dsodo napojaró onihi naqui: —Ejinamanahi naco cattomama canahitohui -naponi nade Dio Atti dsodo nanidsa, inade.

*Jeso ppa idsamanajari*

*Mateo 27.57-61; Maraco 15.42-47; Roca 23.50-56*

<sup>38</sup> Jeso ejinamanahi nattipa Dsodse odsa Arimateahuaajicca madijapa Jeso assire ppa idsahijine tamine Piratodsa huati tajaride. Pohuapa Jessocaraha jiodeni noppine pohua cacomadsa madijari. Nadsapa Pirato jehe nadsa Dsodse tocanajoranidsa Jeso assire dicca inadsapa dsojo inade. <sup>39</sup> Nicodemo naco nahidsa bacco nade. Najaripa tahide dsomeraha Jesodsa qq̄uide tocadsa pohuadsa huati huati tajaride. Najarina 30 kilo majojo eccajonajarode. Najaro majojopi ahua amani tada tani onini mirra, ahua onihi majiconi onini aloe quejemajaro. Majoni bica tajaró. <sup>40</sup> Dsodsepa Nicodemo tedseje

Jeso assire etero dsojorani onini linodsa jore inaqquimanade, ahua majiconi majoni bica tajararo icanejemamanadsa. Jodiodenipa poccadeni madija dsoqquedsapa poccadeni ppanijipi nama nama quiquinanajaride. <sup>41</sup> Nadsama nahi Jeso coba dsanahi huajira tanidsapa ppa nahi caji tajaride. Nanidsapi tonoccobiri dsati sibadsa hui todsimani anijarode. Najarodsapa madija dsoqquehi podsa-jaracchahi. <sup>42</sup> Jodiodenicca jassinajacca huada bacco tabote najaroline najaro tonoccobiri huajira taniccadsa Jeso assire ibed-samanajaride.

## 20

### *Jeso nahatonijari*

*Mateo 28.1-8; Maraco 16.1-8; Roca 24.1-8*

<sup>1</sup> Nadsapi semana tojapomanicca huada tahidecca domingo dsidsidsamassa dsidsi tani paji naraha Maria Madarenahuajiccapi Jeso noccobirihuaji toccajarode. Bacco tadsapi qqui taneje tonoccobiripi tohuabeje najaro. Sibapi pajimaranihuajina huitteje najaro nade. <sup>2</sup> Nadsapi Maria joppa nanijaro, Ssino-Pedro ohua inajarodenidsa bacco nanijarode. Ohuapi Jeso pohua huatimade. Ohuadsana denima huati huana tajari. Maria attinipi ajima nanide: —¡Jeso noccobiri tohuabapa! Pohua assire idinemanadsa dsojo quinajarirana. ¿Nejecohuaji ibamananaja? Ssamomo inani —nanide Maria Madarenahuajicca attini.



—¿Pajissaqui? —quinadsa Pedro Huano tedseje qquide dsaja tajari

*Roca 24.9-12*

<sup>3</sup> Nadsapi Jeso huatimade ohua Pedro tedseje ima imittadsapi dsaja inade, Jeso noccobirihuaji. <sup>4</sup> Ipamehe dsaja inaraha Jeso huatimade ohuana huassi oneje najaro. Jeso noccobirihuaji bacco onapjarode. Naraha Pedropa dsotode bacco namissade. <sup>5</sup> Nadsama Jeso huatimade ohuapi odihuaji ocattedsimaneje Jeso jojore naqqui eteroa qqui onaraha oqquedsimajerade. <sup>6</sup> Naraha dsotodecca Ssino-Pedro bacco namissadsana Jeso noccobiri bodihuaji toqquedsimade. Pohua naco qqui taneje Jeso assire jojore naqqui eteroa podseje nanira qqui tajaride. <sup>7</sup> Pohua tati teteppepi pajimaranidsana padsoninehe podseje nani naqui qqui tajaride. <sup>8</sup> Dsotode ohua naqui oqquedsimadsana qqui onadsana: —Pajissa Jesopa nahatonijaria —onade. <sup>9</sup> Iapi Dio Atti dsodo naponicca ihimittapo naraha iadsa pina ponimassa nade. Najaro ima dsodo napjaropi: —Dsoqqueraha, nahatonihi-tohui —napjarode. <sup>10</sup> Nadsapi icca odsahuaji icadanide.

*Jesopa Maria Madarenahuajicadsa ahuatomajari*

*Maraco 16.9-11*

<sup>11</sup> Maria Madarenahuajicapi nani Jeso noccobiri huapihuaji ibodsa oji oji najaro. Oji oji naneje odi bodihuaji tocattedsima najaro. <sup>12</sup> Nanaja Diocca dodosse tabaqqui memehujicca eterorideni nopopo taha pamidsadsa canahi nade. Jeso assire podsahijinedsa pamidsajari

nade. Ohuahapa tatijinehuaji huittari, ohuahapa amorijinehuaji huittari najari. <sup>13</sup> Nadsapa Diocca dodosse tabaqquipa Mariadsa huati toquinajari: —¿Nejecotohui oji oji tajaro? —quinahi nade. Naraha Mariapi poni cacomerajaro: —Ohua Medsede dsojo ininemanajari. Amossi nadsa oji oji onajaro. ¿Nejecohuajina ibamanahi? —nani nade.

<sup>14</sup> Najaro huati tehe jica, poni idenihuaji qqui tanaja Jeso hua canahi nade. Mariapi Jeso qqui taraha nocconi jidsa tajaro. <sup>15</sup> Naraha Jeso ponidsa huati tajari: —¿Nejecotohui oji oji tajaro? ¿Nejecotaritohui qqui qqui taridsajaro? —nani nade. Naraha Maria poni bodinipi: —Ajajaripa ahua jicca ahua mohue ppa nahi cacahuade itide —nani nade. Nadsapi pohuadsa huati tajaro: —¿Tiana aja dsoqquejari assire dsojo tinejari itide? Jehe tadsapi ¿nejecohuaji tinebonaja? Ohuana tohui occadsa dsojo onani-hijine, onajaro —nani nade.

<sup>16</sup> Naraha manaco Jesopa ponidsa huati tajari: —¡Maria! —nani nade. Naneje pohuahuaaji qqui napomadsa jodiodeni atti ebreodsa huati tajaro: —¡Raboni! —nani nade. (Ettidsapi: ohua Maride, najaro.) <sup>17</sup> Naraha Jeso attia ponidsa: —Ohua mari tidsana-jeraji. Occa Abihuaji occamacossani-jeraccani. Pina ticcanidsa ohu-atti ohuemecotedenidsa huati tinanina: “Jeso attipa: ‘Occa Abi Diohuaji occamacossanina. Najaripa ticcadeni Abi Dio’ napaja” tinanina —nani nade Jeso.

<sup>18</sup> Nadsapi Maria Madarenahuajicca toccanidsa pohua huatimadedenidsa bacco

tanidsapi huati tajaro: —¡Ia Medsede qqui onapa! —nanijaro. Pocca ima naqui huati nanide.

*Jeso pohua huatimadedenidsaha ahuatonipojari (Tomas pohuadenidsa nohueraccadsa)*

*Mateo 28.16-20; Maraco 16.14-18; Roca 24.36-49*

<sup>19</sup> Jeso nahatonihicca huada najaro dsomedsa pohua huatimadedeni iapi odsadsa iqueriqquijarode. Noccobiji ecossaridsade, jodiodenicca taminedeni noppine. Nadsapi jassi inahujaniraha Jesopa nahi nocconidsa ahuatomadsa iadsa huati tade: —Nija, ticappinamana-jeraji. Diocca biquehera tiadenidsa tojana —nade Jeso.

<sup>20</sup> Najaro huati taha jicadsapa pohua dsepe capamehecca perecojine nohue, pohua pparicca huahuajinajine nohue inade. Iapi ia Medsede pajissa qqui inadsapi etidsede. <sup>21</sup> Nadsapa Jeso huati tapomade: —Ticappinamana-jeraji. Diocca biquehera tiadenidsa tojana. Pina occa Abi ohua dosse naronajarissa najaro ohua naqui tiadeni dosse onaridsabaquina —nade. <sup>22</sup> Nadsapa Jeso iahuaji jappo nadsa huati tade: —Dio Corimera ticajimanaji.

<sup>23</sup> Dio Corime ticajimanadsa madijacca imasiridsa: “Epeje, eti ajimani” tiquinadsapi jicani. Dio naco najaricca imasiridsa huati ajamahi. Naraha madijacca imasiridsa: “Epeje, eti ajimani” tiquinajeradsapi pocca imasiri jiquejerani. Dio naco najaricca imasiridsa huati ajama-jarajari —nade.

<sup>24</sup> Nadsapa Jeso huatimadedeni ia 12 inajaro ojariapa Tomas. Pohua tessedenipa pohuadsa: Baba quiquinanajari. Jeso ahuatonipodsapa

Tomas iadsa nohueradsade. <sup>25</sup> Naraha dso-tode Jeso huatimadedeni iapi Tomasdsa huati inade: —Maitta ia Medsede qqui inade -inaraha Tomas attipa: —Pohua dsepecca qqui onadsa odsepedsa perecojine odinidsa oro onadsana pajissa onanitohui. Pparicca toponi huahuajina-jinedsa naqui odsepedsa oro onadsana pajissa onanitohui -nade Tomas.

*Jeso ahuatonipomajari (Tomas qqui tadsa)*

<sup>26</sup> Nadsapi huada 8 nani nattini Jeso huatimadedeni iqueriqquipomade. Nadsapa Tomas iadsama quejemade. Noccobiji ecossaridsaraha jassi inahuajanini nocconidsa Jeso ahuatopomade. Nadsapa iadsa huati tapomade: —Nija, tiadenidsa Diocca jonehera tojaji -napomade Jeso. <sup>27</sup> Nadsapa Tomasdsa huati tade: —Tomas, odsepecca opparicca qqui taji. Tidsepedsa perecojine, huahuajinajine odinidsa oro taji -nade. —“Pajissa onejerani” tejeraji. Pina jehe taji -nade Jeso. <sup>28</sup> Nadsapa Tomas atti: —¡A, ohua Medsede, occa Dio! -nade. <sup>29</sup> Naraha manaco Jeso Tomasdsa huati tade: —Ohua qqui tinadsa pajissa tajaro. Madija ohuahapa ohua qqui toquina-jararaha ohuadsa pajissa quinajari. Najaridenidsana Diopa ima bicaní inanaridsanitohui -nade Jeso.

*Ajijaro papeo dsodo onajaropi Jesodsa: — Pajissa, Dio Bedi -tiquinanijine*

<sup>30</sup> Nadsama ajijaropi Jeso huatimade ia imadiridsadsa Jeso canahato-huajapohui canaridsajaride —Pajissa, Dio Bedi -inanijinede. Aja canahatori canajaricca ima motapi huapi

taraha ajijaro papeodsapi dsodo onejerani.  
<sup>31</sup> Nadsama ajijaro ojine papeodsa dsodo najarodsa naqui —Pajissa Jesopa Cristo-Mesia, Dio Bedi -tiquinanjine, onajaro. Pajissa tiquinadsapi ticassiejeranjine, onajaro.

## 21

### *Jeso pohua huatimadedenidsa ahuatonipomajari*

<sup>1</sup> Dsotode naco dsama arobeni Carireacca coridsa onini Tiberia inididsa Jesopa pohua huatimadedeni iadsa ahuatoni-pomajaride.

<sup>2</sup> Nanidsa iqueriqquijaropi Jeso pohua huatimade 7 inade. Ssino-Pedro, Tomas (pohua tessedeni pohuadsa: Baba quiquinanajari), Natanahē (dsama Carireacca odsa panani Canacca madija), Sebedeo bedi ohua, ocote Satiaco, denima Jeso pohua huatimade ohuaha pama nade. <sup>3</sup> Ssino-Pedropa: —Aba corode occana -nade. Naraha: —Ia naqui tiadsa jaijana -inade. Nadsapi jaijedsippadsa canoa imenidsa jaijedsade. Nadsapi najaro dsomedsa aba coro inaraha nohuerade.

<sup>4</sup> Nadsapi ssiajajonadsa Jeso ssiquidsa huahi qq̄i inaraha ssamoqq̄iri inade. <sup>5</sup> Naraha Jeso iadsa huahua nade: —Dsabissodeni ¿aba ticajimanaqui? -nade. Naraha: —Aba nohuerahi -inade. <sup>6</sup> Nadsapa Jeso attia: —Nani tibijideni nahatonihuaji tajapa coro ticadsippamanaji -nade. Nadsapi Jeso attissa inanamanadsa tajapa coro icadsippadsapi aba ijijari. Joca icanimoraraha ipajira-jerade.

<sup>7</sup> Nadsapi ohuapi Jeso huatimade ohuadsana huati huana tajari. Ohuattia Pedrodsa: —¡A, najaripa ia Medsede! —onade pohuadsa. Nadsapa Ssino-Pedropa pocca etero bodiccadsara aba coro coro naridsaraha ohuatti mittadsapa huassinaja pocca etero huedsa, joppa, cojo nadsa ssiquihuaji cona tajaride. <sup>8</sup> Naraha Jeso huatimade mota iapi canoadsa jajjade. Tajapa abama ori icanade. (Ssiquipi huaji tejerade, pina 100 metrossa najarode.)

<sup>9</sup> Nadsapi ssiquidsa bacco inadsa jajjemoradsapi qqui inanaja pan aba naha dsippo jadari tanidsa huadsana nade. <sup>10</sup> Nadsapa Jeso atti: —Aba jidapana coro nahi mota teqqemoramano —nade. <sup>11</sup> Nadsapa Ssino-Pedro canoadsa toqquedsanidsa tajapa equidi, ssiquihuaji joca icanimorade. Tajapadsapa aba birirajari 153 naha tocahuajaride. Aba huapi taraha tajapapi tajoppi nejerade. <sup>12</sup> Nadsapa Jeso pohua huatimadedeni iadsa huahua nade: —Nija, tijipamanaji —nade. Naraha iapi: —¿Nejeco madija tijani? —inanitohuiraha huapima icap-pinaqquide. Naraha ibodidsapi: —Ia Medsede —nade. <sup>13</sup> Nadsapa Jeso ccajonajari, pan idi nadsa iadsa da inaridsade. Aba naco da inaridsade.

<sup>14</sup> Jesopa huatiaraha nahatonijari. Nahatonihi dsotodepa pohua huatimadedeni iadsa ahuatonijari. Dsotode ahuatonipomajari. Dsotode ajijaro imadsa iadsa ahuatonipomajari, nade.

*Jesopa Pedro pohua cacomerahijine huati huati tajari*

15 Najaro ssiaja dsidsidsamassa ijipehe jicadsa Jesopa Ssino-Pedrodsa huati tade: — Ssino, Huano bedi tijani ¿tiana tibodidsa denima ohuadsa teti huana tajaroqui? ¿Titessedenipa ohuadsa poccadeni tohuati huanehe ajimani tojajaro tajaroqui? -nade. Nadsapa Pedro: — Jehe ohua Medsede, tiana nahato tinajaro tiadsa jipa onani -nade. Nadsapa Jeso Pedrodsa: — Nadsama occa edede bedi tititapabaqqui nana -nade.

16 Naraha denima huati tapomade: —Ssino, Huano bedi tijani ¿tiapi ohuadsa teti huana tajaroqui? -napomade. Naraha Pedro huati tapomade: —Jehe ohua Medsede, tiana nahato tinajaro tiadsa jipa onani -nade. Nadsapa Jeso attia: —Nadsama occa edede tecahuabaqquina -nade.

17 Naraha Jesopa pohuadsa huati tapomade: —Ssino, Huano bedi tijani ¿tiapi ohuadsa jipa tinajaroqui? -napomade. Jesopa Pedrodsa huati tajari, huati nimanijari, huati nimanipomajari nadsapa Pedro pohuadsa tocasserani nadsa bodi qquedsajari. Nadsapa pohua cacomerade: — Ohua Medsede tiana nahato tinehe jicajaro. Nahato tinajaro tiadsa jipa onani -nade. Nadsapa Jeso huati tade: —Occa edede tititapabaqqui nana, onajaro. (Aja Jeso atti nama najaripa “Occa madija mari mari titicanabaqqui nana” najari.)<sup>18</sup> Ohuapi pajissara tiadsa huati onajaro: Dsabisso tijadsapi ticca etero tedsadsa tia tohuini tanihuaji titicca naraha jadahi ticajadsapi tibiji da tadsa madija ohuahana ticca etero tia nehedsahitohui. Jipera tinaraha nani motta

tia iaccamananitohui -nade Jeso. <sup>19</sup> Jeso ima huati tajaripa: —Pedro ajama nadsa dsoqquehitohui -najari. Pocca dsoqquehe nema nadsapi huapimadsa Diocca deni tojehe ahuato tanijine. Nadsapa Jeso attia: —¡Ohuadsa dissera tinaji! -nade Pedrodsa.

*Pedropa Jeso pohua huatimade pocca cacatid-secca imatohui huati tajari*

<sup>20</sup> Nadsapa Pedro pohua nattihuaaji qqui naninaja, Jeso huatimade ohua pohuadeni natti occamissajarode. Ohuadsana Jeso huati huana tajari. (Ohuana ejete Pascoacca dsome tahideccadsa ijipaqquidsa Jeso inoridsa ohuittaridsa pohuadsa huati onajarode: —¿Nejecojarina tia ccaccorahijine? -onade Jesodsa.) <sup>21</sup> Nadsapa Pedro ohua qqui tadsapa Jesodsa huati tade: —Ohua Medsede ¿ajajaripa nejecoma napadsaja? -nade. <sup>22</sup> Naraha Jesopa: —Jipa onadsapi Huanopa ajijaro dsamadsa madi-dsanapohuipaja nadsa occanipomadsa naco madihipaja onanahitohuiraha najaropi ticca cacahuehe jerani. Ohuadsara dissera tinaji -nade Jeso Pedrodsa. <sup>23</sup> Nadsapi imecote huapimadsa ponima ima tojaridsajarode. —Jeso huatimade Huanopa huatia-jarahitohui -nanaridsamana najaride. Naraha Jeso attipa: —Dsoqque-jarana -najararaha, Jeso pohua attipa: —Jehe, jipa onadsapi Huanopa occanipomadsa madihipaja nahitohuiraha najaropi ticca cacahuehe jerani onajaroraha -najaride Jeso. Aja Jeso huati huati tajaripa ohua Huano occa ima.



—*Jeso tahimari dsodo onajaropi pajissa -najari Huano*

<sup>24</sup> Ajjaro ima nemanehapi pajissa. Jeso huatimade ohua qqui onajaro dsodo onajaro. Nadsama najaropi nahatoqquiri inajaro. Najaropi pajissa. <sup>25</sup> Nadsama aji Jeso inahatorid-sajaro naqui huapi taraha najaro motapi dsodo onejerani. Obodidsa ohuattipi najaro tohuatti huapima dsodo onehe jicadsapi papeo dsama huapima ijiridsanitohuiraha. Epejeni.

CXXX

**El Nuevo Testamento en el idioma Culina  
(mádija) del Perú**

**Kulina: El Nuevo Testamento en el idioma Culina  
(mádija) del Perú New Testament**

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

4c7c82dd-1f0f-5341-b6e6-26970c27fee2